

Imbumbanyigisho: IKINYARWANDA CY'UMUTOZA

Inomero iranga imbumbanyigisho: CCMKN701

Ubushobozi: Gukoresha Ikinyarwanda cy'Umutoza

Ikicro: 7

Ishami: Yose

Agashami: Twose

Amasaha ateganyijwe: 30

Indengo: 3

Byateguwe na: NKUNDIMANA Jean Pierre

Email: nkundajp5@gmail.com

Tel: 0783183317

January 2025

Intego nyamukuru

Iyi mbumbanyigisho irasobanura ubumenyi n'ubushobozi bukenewe kugira ngo uwiga abashe gukoresha neza Ikinyarwanda atoza abandi ku ngingo zinyuranye.

Nyuma y'iri somo, uwiga azaba ashobora gukoresha ubuvanganzo nyarwanda ashidikirana n'abandi, gukoresha Ikinyarwanda kiboneye atoza abandi kugendana n'ikerekezo k'Igihugu no gukoresha Ikinyarwanda kinoze yitoza inshingano zinyuranye z'ubuyobozi.

IBIKUBIYE MU MBUMBANYIGISHO

Imbumbe ya 1: Gukoresha ubuvanganzo gakondo nyabami mu gushidikirana n'abandi

- 1.1. Gusobanura neza ubuvanganzo nyarwanda hashingiwe ku ngeri zabwo
- 1.2. Gusesengura neza ubuvanganzo gakondo nyabami hashingiwe ku turango twabwo
- 1.3. Gukoresha neza ubuvanganzo gakondo nyabami hashingiwe ku ikeshamvugo ribugaragaramo

Imbumbe ya 2: Gukoresha Ikinyarwanda kiboneye uwiga atoza abandi kugendana n'ikerekezo k'Igihugu

- 2.1. Gusobanura neza ubugêni bwo gutoza hakurikijwe umurongo w'inyoborabatoza
- 2.2. Kugaragaza insanganyamatsiko zatozwaho hashingiwe kuri gahunda za Leta
- 2.3. Gukoresha neza ikibonezamvugo mu mitoreze hashingiwe ku moko y'amagambo

Imbumbe ya 3: Gukoresha Ikinyarwanda kinoze mu kwitoza inshingano zinyuranye z'ubuyobozi

- 3.1. Kwandika neza inyandiko zo mu buyobozi hubahirizwa uturango twa buri nyandiko
- 3.2. Gutegura neza ijambo ry'ubuyobozi hakurikizwa inyobozi za buri bwoko bw'ijambo
- 3.3. Kumurika neza imiteguro itandukanye hakurikiza ubugêni bwo kumurika

IMBUMBE YA 1: GUKORESHA UBUVANGANZO GAKONDO NYABAMI MU GUSHYIKIRANA N'ABANDI

Umusaruro w'inyigisho:

Nyuma y'iyi nyigisho, umunyeshuri azaba ashobora:

- Gusobanura ubuvanganzo nyarwanda
- Gusesengura ubuvanganzo gakondo nyabami
- Gukoresha ubuvanganzo gakondo nyabami

1.1. Gusobanura ubuvanganzo nyarwanda

1.1.1. Inshoza y'ubuvanganzo nyarwanda

a) Igisobanuro

Ubuvinganzo ni uburyo bwo guhimba ibintu umuntu akoresheje amagambo aboneye, uburyo bugwiriyemo ikeshamvugo, haba mu mvugo cyangwa mu nyandiko. Ubuvinganzo buva ku gitekerezo cy'uvuga cyangwa uwandika, bugatwara uwumva cyangwa usoma kubera uburyohe bwabwo. Buba bugamije kuvuga ibyabaye, ibiriho cyangwa ibizaza, byaba ari ukuri cyangwa ibigenekerejwe. Ikintu cyose kigezweho gitya kitwa **umuvanganzo** (igihangano cy'ubuvanganzo).

Igihangano cy'ubuvanganzo ushaka kugihimba ajya ahantu hiherereye hatari ibimurangaza, agakurikiranya ibitekerezo bye, ingingo ku yindi, yarangiza akazabwira abandi ibyo yagezeho. Aho hantu hitwa **mu nganzo**. Ijambo inganzo kandi rivuga uburyo bwo guhimba umuntu yihariye. Ni cyo gituma umuntu ashobora kuvuga ko kanaka afite inganzo ityaye kurusha kanaka. Iyo mihimbire y'umuntu ku giti ke iyo hagize uyikurikiza bavuga ko yafatiye ku nganzo ya kanaka wayibimburiye abandi. Ubuvinganzo rero ni ijambo rigizwe n'uduce tubiri, kamwe gakomoka ku nshinga kuva (guturuka ahantu) n'izina inganzo. Muri iri jambo ubuvanganzo izina inganzo riba rivuga urwiherero umuhanzi atunganyirizamo ibitekerezo byiza n'imvugo inoze mbere yo kubishyira ahagaragara.

Mu nganzo kandi twavuga ko ari ahantu umuntu ajya hari umutuzo n'umutekano kugira ngo abashe gutekereza no gushyira ku murongo ibitekerezo bye abibayemo igihangano runaka cy'umwimerere kandi cyuje ubuhanga mu mikoreshereze y'ururimi.

Ubuvinganzo, muri iki gihe, twavugaga ko ari ijamba risobanura inyandiko cyangwa imvugo yahimbwe yuje ubwiza n'ubuhanga mu mikoreshereze y'ururimi.

b) Akamaro k'ubuvinganzo nyarwanda

Ubuvinganzo burigisha, bujya inama, burahana, burahanura, buraganira. Burata ubutegetsi, ibihugu n'uturere, buvuga Imana n'abayihaye, urukundo, ubwiza, ububi, amagorwa.... Butuma kandi amagambo atamenyerewe akwira mu mvugo, amenyerewe bikayaha kuramba mu rurimi, ayaretswe bukayaha kutazimira n'icyo yavugaga.

1.1.2. Ingeri z'ubuvinganzo nyarwanda

Ubuvinganzo nyarwanda bugabanyije mu ngeri nkuru ebyiri:

1. Ubuvinganzo nyemvugo cyangwa ubuvinganzo gakondo
2. Ubuvinganzo nyandiko (bwatangiranye n'umwaduko w'abazungu mu Rwanda).

Ubuvinganzo nyemvugo (gakondo) na bwo bwari bugabanyijemo ingeri ebyiri:

1. Ubuvinganzo nyabami (Ibisigo nyabami, ibyivugo by'ingabo, ubwiru, ubucurabwenge, amazina y'inka, ibitekerezo by'ingabo n'indirimbo z'ingabo).
2. Ubuvinganzo bwo muri rubanda.

1.1.2.1. Ubuvinganzo nyandiko

Ubuvinganzo nyandiko bwatangiranye n'umwaduko w'abazungu mu Rwanda, mu ntangiriro z'ikinyejana cya 20, ku mwaduko w'abakoroni. Ubuvinganzo nyandiko bukomatanya inyandiko z'ubuvinganzo zabayeho kuva aho umunyarwanda yahereye yandika atanga ibitekerezo bye mu nyandiko. **Ingero:** Inkuru ndende, inkuru ngufi, ubusizi bw'ubu, indirimbo, inyandiko z'ikinamico n'ibindi.

INKURU

Inkuru ni imvugo cyangwa inyandiko umuntu akoresha ku buryo abo abwira bamutega amatwi. Inkuru ni imvugo cyangwa inyandiko ivuga ibyabaye, umuntu yabihagazeho cyangwa yabibwiwe. Inkuru kandi ni ibintu by'ibihimbano umuntu avugaga cyangwa yandika ku buryo byumvikana nk'aho ari ukuri.

Inkuru yitwa izina hakurikijwe kamere y'ibivugwamo, imiterere cyangwa indeshyo yayo. Bityo, hashobora kubaho amoko atandukanye y'inkuru:

- Inkuru ngufi
- Inkuru ndende
- Inkurushusho
- Ikinamico
- Byendagushetsa
- Igitekerezo
- N'izindi.

Aya moko yose y'inkuru umuntu ashobora kuyashyira mu moko abiri: inkuru ndende n'inkuru ngufi.

A. Inkuru ndende

Inkuru ndende nk'uko iryo zina ribivuga ni inkuru iba ari ndende, ibarwa n'umubarankuru avuga uko yagenze. Bamwe mu basesenguzi b'inkuru ndende bayivuga berekana ko ishobora kuvuga ibyabayeho cyangwa umwanditsi akavuga ubuzima bwe (ibyamubayeho). Abandi bati: "Igomba kuba ari inkuru y'impimbano n'ubwo ibyo ivuga byashobora kubaho."

Igihurirwaho na benshi ni uko inkuru ndende igomba kuba ifite inkuru ibara, uruhererekane rw'ibikorwa, ikaba yanditse mu nyandiko isanzwe; atari mu mikarago nk'ibisigo kandi yifitemo ubwiza n'ubuhanga bw'imikoreshereze y'ururimi.

Ibi, babishimangira bagira bati: "**Inkuru ndende** ni uruhererekane rw'ibikorwa mpimbano bishobora kubaho cyangwa byabayeho, ikaba ifite imisusire ya gihanga kandi nyabugenye igaragaza ko umwanditsi ari intyoza mu kubara inkuru, mu kuyiha imiterere myiza y'ibikorwa no kubikurikiranya."

Uturango tw'inkuru ndende

Inkuru ndende irangwa n'imiterere yayo: Kuba ari ndende (irengeje paji 100), ibarankuru, abakinankuru (abantu cyangwa inyamaswa), hari ikivugwa, hari ahantu n'igihe bibera, kuba ari ndende, uburyo ibikorwa bikurikirana kandi bigenda bitera amatsiko usoma ku buryo atarambirwa gusoma inkuru ibarwa.

Urugero rw'inkuru ndende zasomwa:

- | | |
|---|--|
| - Munyakazi, S., <i>Ntabajyana</i> , 1952 | - Byuma, F., <i>Mureranyana</i> , 1981 |
| - Rukebesha, A., <i>Nyirabirahunga</i> , 1970 | - Niyonteze, P., <i>Imari ya shuni</i> , 1981-1982 |
| - Nsanzubuhoro, V., <i>Ntabyera</i> , 1971 | - Uwamungu, J., <i>Nyirabayazana</i> , 1981 |
| - Kamugunga, C., <i>Umusiramu</i> , 1973 | - Nkurikiyumukiza, F., <i>Yatashye atagomba</i> , 1987 |
| - Karege F., <i>Mwanankundi</i> , 1975 | |
| - Niyitegeka, M., Y.: | |
| ○ <i>Giramata</i> , 1988 | ○ <i>Wishavura</i> , 1989 |
| ○ <i>Urwibutso</i> , 1988 | ○ <i>Iyo mbimenya</i> , 1991 |

- Rugema, A., *Rwemerikije*, 1988
- Furere, R., M., *Mariya Kantarama*, 1998
- Karenzi, F., *Ishavu ry'abato*, 2000

B. Inkuru ngufi

Inkuru ngufi ni igihangano gishingiye ku kubarira abandi ibyabaye ubivuye imuzingo ukagera ku ndunduro, ariko mu buryo bworoheje butarimo isesengurabitekerezo ryimbitse, ridacukumbura insanganyamatsiko nyinshi. Umubarankuru yivugira inkuru z'ibyo yabayemo cyangwa yiboneye ubwe akabirondorera abandi. Bishobora kuba ari ukuri cyangwa ibihimbano. Inkuru ngufi iba igizwe n'ibice bibiri by'ingenzi: gusetsa no kwigisha.

Uturango tw'inkuru ngufi

Inkuru ngufi irangwa n'ibarankuru, abakinyarubuga/abakinankuru bakeya, akabuga nkuru, ari ngufi, imvugo y'ibiganiro n'imyubakire yayo idasobetse cyane (ibikorwa bikeya), insanganyamatsiko, irabangutse, imvugo y'ibiganiro n'ibindi.

Urugero rw'inkuru ngufi: Imana na Ngerageze, Serugarukiramfizi, Ngunda, ...

Imbata y'inkuru

Imbata y'inkuru iba ari umudandure ugizwe n'uruhuri rw'ibikorwa by'uruhererekane bikubiye mu murongo mbonera ugizwe n'imitago itanu: intango, kirogoya, inkubiri y'imikorwa, umwanzuro n'amaherezo.

1. Intango

Ni imiterere isanzwe y'ibintu. Ibintu biguma kuba uko biri iyo hatagize ikiza kubihungabanya. Urugero ku mwandiko:


Umwami na Semuhanuka, (intango irerekana imibereho isanzwe y'ibwami).

- 2. Kirogoya:** ni imbarutso ihungabanya ibyaribisanzwe. Kirogoya ni yo mu by'ukuri iba intandaro y'inkuru. Kirogoya ni ibikorwa binyuranye bituma ibintu byaribisanzwe bigenda (bihinduka) ukundi. Kirogoya iraboneka mu gitekerezo Semuhanuka yagize cyo kwimura umusozi).

3. **Inkubiri:** ni uruherekane rw'ibikorwa bigaragamo amakimbirane y'abanyarubuga bahanganye, bamwe baharanira ko ibintu biguma uko byaribisanzwe, abandi bahatanira ko bihinduka. (Semuhanuka ati: “nzimura umusozi” umwami n'abagaragu bati: “ntuzabishobora”).
4. **Umwanzuro:** Ni umuti. Ni imbaraga zituma amakimbirane yari ahari hagati y'abanyarubuga ahosha. (Umwami yageze aho yemerera Semuhanuka gukomeza umugambi we.
5. **Amaherezo:** Ni imibanire mishya y'abanyarubuga baribahanganye, nyuma y'ihosha ry'amakimbirane. Iyo miterere mishya ishobora kuramba cyangwa igahungabana haramutse habaye indi mbarutso. Abandi bemereye Semuhanuka kugera ku ntego ye yo kubona inka y'ingumba.

Ikitonderwa: Hari abasesenguzi babumbira mu mutago umwe mugari bita “ihindagurika” imitago ya kirogoya, inkubiri n'umwanzuro.

UMUTAGO W'INKURU



IKINAMICO

1. Igisobanuro

Ikinamico ni igihangano kifashisha uburyo bwo gukina imico y'abantu itandukanye. Mu ikinamico herekanwa umuco, ibikorwa, imyifatire n'imigenzo by'abantu. Uwo mukino ushobora kubera mu ruhame imbere y'abantu cyangwa ukanyuzwa mu bikoresho by'ikoranabuhanga by'inyakiramajwi nka radiyo n'iby'iyumvabona nka tereviziyo, mudasobwa n'ibindi. Ikinamico

iba igamiye kwigisha, gukosora ingeso n’imyifatire mibi, gushishikariza abantu kugenza neza n’ibindi.

Ikinamico ishobora kugaragaza ibikorwa by’umuntu umwe cyangwa benshi. Ishobora kandi gukinwa n’umuntu umwe ugenda yihinduranya (One man show), gusa akenshi iba ikinwa n’abantu benshi.

2. Uturango tw’ikinamico

Ikinamico ihimbye neza igomba kuba igaragaramo uturango dukurikira:

- a. Umutwe w’ikinamico:** umutwe w’ikinamico ugomba kuba uteye amatsiko abumva cyangwa abareba ikinamico. Ayo matsiko akaza gushira uko abanyarubuga bagenda bigaragaza.
- b. Umwinjizo:** ni amagambo atangira umukino, aba asa n’akebura abagiye gukurikira ikinamico ndetse abakururira gukurikira neza umukino.
- c. Abanyarubuga:** ni abakinnyi bakina umukino bagaragaza imyifatire itandukanye, bagenda bumvikana ndetse bakagaragara mu mukino.
- d. Ibice by’umukino:** ni ibice bitandukanye biba bigabanyije mu mukino wose, bitewe n’uko umuhanzi yabigennye.
- e. Umuseruko:** umuseruko urangwa no kwinjira cyangwa gusohoka k’umunyarubuga ku rukiniro.
- f. Agakino:** ni igice cy’umukino gishobora kugira imiseruko itandukanye bitewe n’igitekerezo gikubiye mu gice cy’umukino.
- g. Urukiniro:** ni aho agakino cyangwa igice cy’umukino kiba kiri bukinirwe. Urukiniro baruha umuteguro bakarutaka cyangwa bakaruha imirimbishirize bitewe n’ibyifuzo by’umuhanzi cyangwa umutoza.
- h. Inyobozi:** ni ibisobanuro bigaragara mu ikinamico, biyobora abanyarubuga uko bari bwitware mu mukino. Bikunze gushyirwa mu dukubo.
- i. Imvugo nkana:** ni amagambo umunyarubuga ashobora kuvuga mu gihe ari kugirana ikiganiro na mugenzi we, ariko mugenzi we akigiza nkana ko atayumvise.
- j. Imvugano:** ni ikiganiro kiba hagati y’abanyarubuga igihe bahererekanya amagambo.
- k. Inyishyu:** ni amagambo umunyarubuga runaka asubiza mugenzi we mu ikinamico.
- l. Umwivugisho:** ni amagambo avugwa n’umunyarubuga igihe ari wenyine yivugisha.
- m. Ururondogoro:** ni imvugo itinze y’umunyarubuga runaka.

n. Iherezho: ikinamico igira iherezho. Iherezho ry'ikinamico rishobora kumara amatsiko abayikurikiye cyangwa rigasiga abayikurikiye mu gihirahiro bibaza uko byagenze cyangwa uko bizagenda.

3. Amoko y'ikinamico

Dukurikije umuyoboro inyuzwamo, ikinamico ibamo amoko abiri:

- ❖ Ikinamico ikinirwa imbere y'indorezezi
- ❖ Ikinamico inyuzwa kuri radiyo cyangwa tereviziyo.

Dukurikije ibikorwa nyamutima ikina, dusangamo amoko atatu:

- ❖ Ikinamico nterabitwenge
- ❖ Ikinamico nteragahinda
- ❖ Ikinamico mberabyombi

Dukurikije imiterere, ikinamico tuyisangamo amoko abiri:

- ❖ Ikinamico isanzwe
- ❖ Ikinamico y'uruhererekane

Dukurikije insanganyamatsiko, ikinamico tuzisangamo amoko menshi:

- ❖ Ikinamico gakondo
- ❖ Ikinamico nyobokamana
- ❖ Ikinamico y'amateka
- ❖ Ikinamico ya poritiki
- ❖ Ikinamico y'urukundo
- ❖ Ikinamico y'imibereho
- ❖ N'izindi

4. Imyubakire (ibice by'ikinamico)

Ikinamico nk'inkuru ikinye igira imyubakire cyangwa ibice bikurikira:

- a) **Intango:** muri iki gice hagaragaramo *uko ubuzima buba busanzwe* muri rusange, abantu babanye neza nta kibazo bafitanye.
- b) **Kidobya:** nko mu nkuru, kidobya ni *akantu kaza kakaba imbarutso kagahindura ibintu uko byari bimeze*. icyo gihe uko ibintu byari bisanzwe birahinduka, niba ari nk'ikibazo kivutse kigashakirwa igisubizo.

- c) **Inkubiri y'ibikorwa:** muri iki gice **ni ho dusobanukirwa inkuru koko**. Abanyarubuga bakagaragaza ya myifatire cyangwa imico itandukanye baba bakina.
- d) **Umwanzuro:** muri iki gice **ni ho tubona uko inkuru irangiye**. Mu mwanzuro, ikinamico ishobora kurangira imaze amatsiko cyangwa igasiga mu rujijo abayiteze amatwi cyangwa abayireba.
- e) **Amaherezo:** muri iki gice hagaragaramo **uko byagenze nyuma y'ikemuka ry'ikibazo runaka** cyangwa se nyuma y'uko ikibazo gikomeza kuba insobe. Aha ni na ho hagaragara abagiriye inyungu muri kwa gukemuka cyangwa kudakemuka kw'ikibazo.

5. Uko ikinamico yandikwa

- Umuhanzi w'ikinamico agomba kubanza **guhitemo insanganyamatsiko** agiye kwandikaho kuko imico y'abantu aba agiye gushyira mu mukino igomba kuba **ifite intego runaka yo kwigisha, gucyaha, kunenga, kugira inama n'ibindi**.
- Iyo amaze guhitamo insanganyamatsiko, ahitamo **abanyarubuga** akabatwerera imyifatire n'imiterere igaragaza neza ibyo agiye gukina.
- Mu kwandika ikinamico, umuhanzi agomba kuzirikana **uko atangira umukino we n'uko aza kuwusoza**, atanze igisubizo k'ikibazo cyari ingutu cyangwa asigiye abawukurikiye umukoro wo gukomeza kwibaza uko bizagenda.
- Ikinamico igomba **kwandikwa mu buryo bw'ikiganiro**, aho abanyarubuga usanga bahererekanya amagambo, ndetse hakagenda hagaragazwa izina ry'ugiye kuvuga. Gusa aho biri ngombwa usanga umukinnyi ashobora gukina yivugisha we ubwe.
- Umuhanzi w'ikinamico kandi bitewe n'ibyifuzo by'uko ashaka ko umukino we ukinwa agenda **agaragaza inyobozi**, zandikwa mu dukubo, zigaragaza uko abanyarubuga bagomba kwitwara, aho umukino runaka ubera n'imirimbo ihatatse. Inyobozi kandi **zituma umutoza w'abakinnyi abafasha kwitwara uko umuhanzi w'ikinamico yabyifuje**.

Dore **ibigomba kwitabwaho mu kwandika ikinamico:**

- *Umuhanzi agomba kwita cyane ku nsanganyamatsiko agiye kwandikaho* bityo akayishakira umutwe bifitanye isano. *Umutwe w'ikinamico* ugomba kuba *uteye amatsiko* abagiye kuyikurikira cyangwa abasomyi.
- Umuhanzi agomba *kwita cyane ku bo ageneye umukino* we, mu rwego rwo kugena imvugo (iy'ubusabane, isanzwe, ihanitse, iya gisizi...) aza gukoresha. Agomba kumenya kandi ikigero barimo, imico yabo n'uko babayeho kugira ngo agene uburyo aza gukoresha ababwira, bityo umukino ugire icyo ubamarira, bitewe n'icyo agamije kugeraho.
- *Abanyarubuga bagomba kwisanisha* neza *n'ibyo bakina* haba mu mvugo ndetse no mu ngiro.
- Umuhanzi agomba kuzirikana *igihe ikinamico igomba kumara*, bitewe *n'aho igomba kunyuzwa n'icyo igamije*. Hari amakinamico ashobora kugira uduce dutoduto tugenda dutangazwa mu gihe runaka, ikaba yamara igihe kirekire, nk'urunana, museke weya n'izindi. Umuhanzi anazirikana ko igihe ikinamico ikinwa itagomba kurambirana cyane.

6. Guhitamo abakinnyi b'ikinamico

Umuhanzi w'ikinamico agomba kugena uko abakinnyi bitwara, cyane ko **baba bagomba kugaragaza imico y'abantu basanzwe mu buzima bwa buri munsu**. Rimwe na rimwe usanga abakinnyi bahabwa amazina ahita aranga imyitwarire yabo, nk'abo bita ba Rubundakumazi, Nzavugankize, Rusisibiranya, Kajarajara, Kirikumaso n'andi.

Gusa abacengeye neza iyi nganzo y'ikinamico bemeza ko atari byiza kwita bene aya mazina kuko biba bisa no kumara amatsiko abakurikiye ikinamico. Bavuga ko byaba byiza abakinnyi bagiye bahabwa amazina asanzwe atagaragaza imyitwarire yabo, noneho uko bakina, ababakurikiye akaba ari bo batahura imyitwarire y'abakinnyi. Ni yo mpamvu **mu guhitamo abakinnyi hagomba kurebwa umuntu uri bwigane neza umunyarubuga runaka**.

7. Abanyarubuga mu ikinamico

Mu ikinamico *abanyarubuga barimo ibice bibiri by'ingenzi*. Habamo **umunyarubuga mukuru**. Umunyarubuga mukuru ashobora kuba ari umwe cyangwa ari benshi. Habamo kandi **n'abanyarubuga bungirije** bashobora kuba bunganira umunyarubuga mukuru kugira ngo agere

ku ntego yiyemeje (**abunganizi**) cyangwa se bakaba bamubangamira ngo atagera ku ntego yiyemeje (**imbogamizi**). Ni ukuvuga ko mu ikinamico dusangamo umunyarubuga mukuru n'abanyarubuga bungirije. Ariko **hashobora no kubamo abanyarubuga batari ngombwa**. Abo banyarubuga mu by'ukuri nta gikorwa gifatika bakora, ndetse bashobora no kuva mu ikinamico cyangwa mu nkuru ntibigire icyo bitwara (nk'igihe umukino ubera mu isoko, abaremye isoko bose si ko bagira uruhare mu mukino).

8. Uko ikinamico ikinwa

Ikinamico iba igabanyijemo ibice. Iyo ari ikinamico yo ku rubuga aho ikinirwa (urukiniro) hagenda hahinduka uko buri gice kirangiye. **Buri gice na cyo kiba kigabanyijemo uduce (imiseruko)** tugenda duhindagurika, buri gihe uko hinjiye umukinnyi mushya cyangwa se hagize usohoka ku kabuga nkuru. **Abakinnyi b'ikinamico ku rukiniro baba bagomba gusa neza nk'abanyarubuga bakina mu myifatire yabo.** Mu gukina ikinamico kandi **inyobozi ni ngombwa cyane** zigomba kubahirizwa kugira ngo umukino ugende neza nk'uko umuhanzi wayo yabyifuje.

URUGERO RW'IKINAMICO: UBWENGE BUZA UBUJJI BUHISE

Umwinjizo w'umukino

Muri uyu mukino: **“Ubwenge buza ubujiji buhise”**, muriyumviramo ukuntu Nyinawumuntu, yatsimbararaga ku myumvire idahwitse yo kubyara abana benshi, ngo akunde yororoke nk'umusenyi wo ku nyanja. Nyamara yagiye ku kigo nderabuzima, na bwo ku bwa burembe, yumvise uko urubiruko rugisha inama rushaka kumenya iby'ubuzima bw'imyororokere, ndetse n'abatanze ubuhamya ku byiza byo kuboneza urubyaro, afata ikemezo cyo guhinduka no kuba intumwa nziza ku bandi bafite imyumvire itaboneye.

Abakinnyi dusanga muri uyu mukino n'imiterere yabo:

Nyinawumuntu: Ni umugore ubyara indahekana. Nyuma y'igihe kirekire ahora mu makimbirane n'umugabo we yaje kwisubiraho.

Mugwiza: Ni umugabo wa Nyinawumuntu. Ashyira mu gaciro, ndetse yifuza ko we n'umugore we

baboneza urubyaro.

Mugisha: Ni umugabo uri mu kigero k’imyaka 43. Na we yacengewe n’umuco wo kuringaniza urubyaro ndetse abishishikariza abandi.

Iribagiza: Ni umuyobozi w’Ikigo Nderabuzima cya Kinigi akaba n’inzobere mu bijyanye n’ubuzima bw’imyororokere no kuboneza urubyaro.

Fofu: Ni umukobwa uri mu kigero k’imyaka 20 ukora mu kabari. Akunze guhura n’ikibazo cy’abagabo bamushuka ko bamukunda, akabima amatwi.

Gwiza: Ni ingaragu afite imyaka 21. Akunda gushukwa n’urundi rubyiruko ngo akore imibonano mpuzabitsina ariko akagira amakenga ndetse agakomera ku bumanzi bwe.

Murenzi: Ni umusore w’ibigango n’igikuriro. Afite imyaka 23. Azwiho gutwara abagore b’abandi.

Gakwaya: Ni se wa Murenzi, agisha inama kandi ni inyangamugayo.

IGICE CYA MBERE

Agakino ka mbere

Aka gakino karakinirwa mu ruganiriro kwa Mugwiza na Nyinawumuntu. Ni mu gitondo bambaye imyambaro idashamaje nk’abakene, Mugwiza yicaye ku ntebe ya Kinyarwanda, Nyinawumuntu yicaye ku kirago; mbese biragaragara ko bari mu rugo rutifashije.

Mugwiza: (Yicaye wenyine yiyumvira) Mbe Nyinawumu...?

Nyinawumuntu: (Ijwi ryumvikanire kure, ndetse abanze kwisyigiza) Asyi! Ariko wowe ni uguhora umpamagara gusaaa! Vuga ndakumva!

Mugwiza: (Yimyoze) Igira hino uce akabogi ku muce ariko ngire icyo nkwibariza, ntuzi ko ijamba ryiza ari mugenzi w’Imana kandi ubamba isi ntakurure!

Nyinawumuntu: Ubu ntunzindukiye ntarikorera uturimo di! Vumvura vuba wasanga ari ikinkiza uyu muruho n’agahinda nterwa n’uru rugo rutindi!

Mugwiza: Ariko uzitonganya uzageze ryari? Ayo maganya uhorana ukagira ngo si wowe

wayikururiye n'izo ndahekana zawe?

Nyinawumuntu: Ugize ngo iki...? Umpamagariye kuntuka se? Mva iwacu hari inda naje nikoreye ku mutwe? Ariko koko bararya zikishyura! Umenye ko umanika agati wicaye wajya kukamanura ugahaguruka! Nta soni!

Mugwiza: (*Atuje cyane*) Tuza ariko nivugiraga mugore nkunda weze inono ku menyo, kibero kezeho amaribori, ukaba ikemezo cy'urugwiro. Nagira ngo twiganirire iby'ubu buzima bwacu, tuza rwose.

Nyinawumuntu: Ntuza ntuza iki? Ni uko usanzwe ndakuzi kandi uhishe mu nda ntiyibwa n'imbwa. Uhora umbwira ngo mbyara nk'urukwavu! Ariko ni abange koko! Ko utamfasha kubarera se, shyuhuuuu! Ariko nagorwa nagorwa!

Mugwiza: (*Ase nugira uburakari*) Hama hamwe uwanze kumva ntiyanze no kubona. Nkubwira ngo uboneze urubyaro, ukananira! Icara urambye wumve ingaruka!

Nyinawumuntu: Wahondaga utanoga di! Ngo bagire ngo! Umuturanyi wacu ko yihaye kuboneza urubyaro, byagenze bite? Nta bo wumva babisamiraho se? Abapagani gusa! Ijambo ry'Imana riratubwira riti: "Mubyare mwororoke mugwire mwuzure isi, mungane nk'umusenyi n'inyenyeri." Ni nde wababwiye ko isi yuzuye se?

(*Atuje cyane asa n'uwinginga*) Nyamara nkubwire saro risumba ayandi nahawe na Rudasumbwa, amahane yawe nta cyo azakugezaho! Nashakaga kukubwira ngo tuge kugisha inama ku kigo nderabuzima, cyane ko numvise umuhwituzi avuga ko ku Kigo Nderabuzima cya Kinigi hari iyo gahunda yo kugira inama abaturage ku bijyanye n'ubuzima bw'imyororokere no kuboneza urubyaro.

Nyinawumuntu: (*Acururuke gato*) Nange mbikenge undi mukiro wari umpamagariye umuseke ugitamuruka mu cyoko! Ibitesha umuntu igihe ntibibura! Batanga se utujumba n'udushyimbo byibura ngo twihere abana? Izo mburamukoro gusa! Ugeyo wenyine n'ubundi uwiruka mu ntabire y'undi ntabura amaguru. Nge sinishoboreye ngiye kwihingira! (*Ahaguruke agende, Mugwiza asigare wenyine yumiwe*)

Agakino ka kabiri

Aka gakino karakinirwa mu gikari cy'urugo kwa Mugwiza n'umugore we Nyinawumuntu agaragara ko atwite. Nyinawumuntu afite isuka mu ntoki nk'ugiye guhinga, Mugisha aze kubakangurira kwitabira amahugurwa, bazane udutebe bicareho baganire, utwana ikenda tw'indahekana dushonje twambaye ubucabari twicaye ku muryango w'inzu tubitegereza.

Mugwiza: Ubu koko amaherezo azaba ayahe?

Nyinawumuntu: *(Akubite igitwenge aseke cyaneeee)* Ngo amaherezo azaba ayahe? Ubaye wa wundi uhora yibaza iby'uko bwira n'uko bucya se! *(Aririmbe yishongora: Ese ko bucya bukiraaa amahereeezo azaba ayahe weee!)*

Mugwiza: *(N'ijwi ryihanangiriza)* Ariko Nyinawumu! Uwiruka atizwa umurindi n'umwirukankana koko. Sinzongera kukubwira ibyo kuboneza urubyaro no kumenya iby'imyororokere, gusa uzirengere ingaruka. *(Ahite yumva umuntu ubaramutsa)*

Mugisha *(N'ijwi risa n'irirenga)* Mwaramutse aba hano? Ni Mugisha ubasuhuza.

Mugwiza: Mwaramutse? *(Mugisha yinjire)*

Nyinawumuntu: Ese ni wowe Mugi, ko uturamukiye se, uragenzwa n'iki? Reka nzane udutebe two kwicaraho. *(Azane udutebe twa kinyarwanda bicare)*

Mugisha: Ni ubuhoro ariko! Numvise mwari mu kiganiro ariko musakuza, nza kureba ibyo murimo!

Nyinawumuntu: Sinzi ibyo yari arimo ambwira ra!

Mugisha: Umva kandi. *(Aseke gato)* Ntubizi kandi numvaga muvuga ku ngingo nziza?

Nyinawumuntu: Yewe ga yewe ga! Uzi ko uwububa abonwa n'uhagaze bahu! Burya bwose wumvirizaga ibyo twavugaga?

Mugisha: Oya sinumviriza abantu. Nihitiraga amagambo agira atya angwa mu gutwi.

Mugwiza: Ni byo rata twavugaga ibyo kujya kugisha inama ku kigo nderabuzima, ku bijyanye n'ubuzima bw'imyororokere no ku kuboneza urubyaro.

Mugisha: Ntiwumva; nange ubu ndi kugana ku kigo nderabuzima. Namwe abahwituzi babagezeho?

- Mugwiza** Batugezeho ariko nararigushije, Nyinawumuntu yanze andaba ivu mu gahanga! Aracyari wa wundi boshye akabaye icwende koga nti...reka nicecekere nako.
- Mugisha:** Ubwo se yabikora bahu? Dore ubu bukene bw'akarande buterwa no kuba mutaraboneje urubyaro. Rero ndabona anatwite indi!
- Mugwiza:** Ndeka undorere. Ntidushobora kubona ibitunga abana bahora bicira isazi mu jisho, kwambara ukuri byo barabimenyereye, kubavuzza ni ikibazo! Icyangira umuntu gitera agahinda gusa!
- Mugisha:** Izo ni ingaruka nyine! Aho isi igeze kirazira kikaziririzwa kubyara abo udashoboye kurera, kuko ni ukwiyica uhagaze ukica n'ubuzima bw'abo ubyara.
- Nyinawumuntu:** *(N'agasuzuguro)* Mwasomye ntimwasogongeye ariko! Ubuzima bwicwa n'iyo miti njya numva! Nge hari icyo ntaka uretse ubukene?
- Mugwiza:** Yego nyine iyo tubyara abo dushoboye kurera, ntuba utaka ubwo bukene!
- Nyinawumuntu:** *(Ase n'ugira amakenga)* Gute se?
- Mugisha:** Igihe uta urera abana barenga ikenda bose, iyo uza kuba ufite babiri uba ugikoresha mu kubashakira ibibatunga no kubateganyiriza ejo hazaza.
- Mugwiza:** Si uko! Ubu se baziga koko, kandi ubu amashuri ari wo murage? Kera ababyeyi bagiraga iminani baragaga abana babo. Ubu abacu tuzabaraga iki?
- Nyinawumuntu:** Nimuhebere urwaje rero, none se twakwihakana urubyaro rwacu.
- Mugisha:** Guhunga ibibazo si ubutwari ni ubugwari bukabije, kuko intore ntiganya ishaka ibisubizo. Byongeye kandi Leta y'u Rwanda nta we ishaka ko abaho nabi aririra mu myotsi. Ubu se mwe gahunda ya Gira Inka Munyarwanda ntiri hafi kubageraho!
- Nyinawumuntu:** *(N'ibyishimo byinshi)* Ni byo se! Ayo ni amashyamba mugeni have sigaho!
- Mugisha:** Ni ukuri rwose. Gusa mugomba kwitabira gahunda za Leta zirimo kuboneza urubyaro, kugana ibigo nderabuzima mukagisha inama ku buzima bwanyu, n'ibindi. Isaha ziragiye ahubwo muze tugende tudatinda.

- Mugwiza:** Nge nahagurutse. Haguruka nawe Nyinawumu... Singenda ngusize!
- Mugisha:** Ntiwumva ko nta rundi rwitwazo Nyinawumu...! Erega gahunda za Leta kuzitabira ni byiza birigisha kandi bigafasha abantu no guhindura imyumvire!
- Nyinawumuntu:** *(Abanze kwiyumvira)* Tugende ariko ni uko abaye wowe Mugi...!
- Mugwiza:** Nyinawumu? Tuvugishije ukuri, hari uko ntakugize ukananira?
- Nyinawumuntu:** Wowe se ko utifungishije ngo baguhindure ikiremba?
- Mugwiza:** Byo se nari kubikora tutabyumvikanyeho? Erega byose bikorwa mu bwumvikane, mu bufatanye n'ubwuzuzanye bw'abashakanye.
- Mugisha:** Erega ntibinabuza umuntu gukora imibonano mpuzabitsina, bibuza kororoka gusa. Uzi ko mutazi ubuzima bwanyu bw'imyororokere! Mureke twihute ndabizi ku kigo nderabuzima murahungukira byinshi.
(Bahaguruke bagende).

IGICE CYA KABIRI

Agakino ka mbere

Aka gakino karakinirwa ku kigo nderabuzima, karakinwa na Iribagiza, Fofu, Gwiza, Gakwaya, Murenzi, Mugisha, Mugwiza na Nyinawumuntu. Iribagiza ari kugira inama abaturage bicaye mu gacaca, bacoca amagambo.

(Asuhuza abo bari kumwe) Muraho mwese! Nimugire ubuzima bwiza, mukure muzi ubuzima bw'imyororokere kandi mwororoke muringaniza urubyaro! Nagira ngo abafite ibibazo byihariye, duhereye ku rubyiruko, babanze babitugezeho tubone aho duhera.

Nitwa Fofu mfite imyaka makumyabiri, nkora mu kabari. Abagabo n'abasore bantesha umutwe bambwira ko ndi mwiza, bakankorakora cyangwa bagashaka kunsoma iyo ndi mu kazi, nkabyanga. Nakora iki ngo banshikeho?

Nange nitwa Gwiza mfite imyaka 21. Bagenzi bange bahora banyumvisha ko nkwiye gushaka abakobwa cyangwa abagore dukorana imibonano mpuzabitsina, ngo ni bwo nzakira ibishishi mu maso n'ubugabo bwange ngo bugakura neza da! Ni byo koko?

Nge mungire inama, uyu muhungu wange Murenzi, numva bamwita umupfubuzi ngo abagore benshi ni we bayobotse. Iyo ngeso ntizatuma yisazira. (*Abari aho bose bumirwe batangire kujujura*)

Ndabashimiye kuba mugishije inama ku bibazo muhura na byo, mu rwego rwo kumenya ubuzima bwanyu bw'imyororokere. Kuvugisha ukuri ni indangagaciro ikwiye kuturanga. Reka mpere ku kibazo cya Fofu. (*Ahamagare Fofu*) Fofu we?

Karame!

Abo bagabo bagushuka bagukorakora, bikubaho buri muni? Ese na bagenzi bawe mukorana ni ko bibagendekera?

Iribagiza: Ni byo koko abakobwa bahura n'ababashuka bashaka kubashora mu ngeso mbi z'ubusambanyi, kubashora mu biyobyabwenge, kubacuruzza mu mahanga n'ibindi byinshi biteye agahinda. Buri wese agomba kwimenya, akifata, akirinda izo nkozi z'ibibi ziba zishaka kubata mu kangaratete, ukaba watwara inda idateganyijwe cyangwa y'imburagihe. Ushobora no kwandura indwara zandurira mu mibonano mpuzabitsina. Komera ku mugambi wawe wo kwimenya, ukomera ku busugi bwawe. Si byo?

Fofu: Murakoze kungira inama nziza!

Iribagiza: Wowe rero Gwiza. Umubiri w'umuntu ugira imisemburo igenda itera impinduka bitewe n'ikigero ugezemo iyo ukura.

Ibishishi ufite ni ukubera ikigero cy'ubukure ugezemo. Ntaho bihuriye no gukora imibonano mpuzabitsina. Naho iby'ubugabo bwawe, ingingo z'umubiri w'umuntu zikura uko Imana yazigennye n'uko yaziremye, keretse bahayeho impamvu y'ubumuga runaka. Kandi na bwo umuntu ugize ikibazo ajya kwa muganga, abaganga bakamufasha.

Hanyuma wowe Mure! Ibyo so yakuvuzeho ni byo?

Murenzi: *(Adidimanga)* Urumva nyine, nyine, urumva... Ni ni ni byo rwose simbihakana. *(Abantu bajujure)*

Iribagiza: *(Acecekeshe abari mu nama)* Ubwo se uzi ibibazo urimo kwikururira?

Murenzi: Ibihe bibazo se kandi? Ni umwuga wange. Abashaka iyo ndyo barayibuze ndayibagaburira. None se wabona imboga ukazirengeshwa? *(bamwe bagwe mu kantu, Gwiza akwenkwenuke, ubona ko bidasanze kumva ibyo bintu)*

Iribagiza: Mbabajwe n'uko ubivugana ishema aho kwigaya. Iyo si indangagaciro y'umuco wacu. Ubwo uzi indwara uzanduriramo nka Sida, imitezi, uburagaza, mburugu n'izindi? Bavandimwe muri aha, dufatanye kubyamaganira kure.

Murenzi: *(Avugane agahinda)* Rwose mumbabarire byose nabiterwaga n'ubujiji, kandi mbarahiriye ko ntazabisubira ukundi.

Iribagiza: Mumfashe gushimira Murenzi wiyemeje guhindura imyitwarire akaba atazongera kwijandika mu bikorwa by'urukozasoni. Noneho tubaze na bariya babyeyi bagire icyo batubwira ku byiza byo kumenya ubuzima bw'imyororokere no kuboneza urubwira. *(Bose bamukomere amashyi)* Reka twumve Mugisha ibyo atubwira.

Mugisha: (*Age imbere*) Murakoze kumpa ijambo, baca umugani ngo: “Utaranigwa agaramye agira ngo ijuru riri hafi!”

Ngishakana n’umugore wange Beza, twabanje kubura urubyaro, tujya mu bapfumu biba iby’ubusa. Twagiye kwa muganga, batugira inama, ikibazo cyacu kirakemuka, tubona umwana. Ubwo umugore wange ati: “Nkababyara nkimara agahinda!” (*akubite agatwenge*) Nange nti: “Nyabuna aho ibihe bigeze tugomba kuboneza urubyaro.”

Kuva ubwo ntitwongeye gucana uwaka, amahoro mu rugo agenda nka Nyomberi. (*yitse umutima gato*) Nuko kera kabaye, tuza guhura n’umubyeyi ukiri muto cyane rwose, afite utwana tune tw’indahekana, twambaye ubucabari, umwanda ari wose, inzara sinababwira, mbese ubona ko bazahajwe n’ubukene. Umugore wange ahita aturika ararira. Mubajije icyo abaye ati: “Mbabajwe na turiya tuziranenge!” Naramubwiye nti: “Natwe nitutaboneza urubyaro ngurwo urudutegereje.” Ati: “Uramenye uramenye niba ari ibi ntitugomba kuzarenza abana babiri, ubundi tugafata akana kamwe muri utu tukakarera, tukagabanyiriza umuruho iyi ndushyi.” Ibyo twabishyize mu bikorwa, none ubu tumaze gutera imbere, abana bacu twarabakujije, turabateganyiriza, biga heza, dutuye neza, tumeze neza rwose. Muntu uri aha hitamo imara ipfa kuzabaho neza nkatwe cyangwa kuba magorwa. Ni ibyo nababwira. Murakoze! (*Bamukomere amashyi menshi*)

Iribagiza: Ndumva nta kindi nakongeraho. Kumenya ubuzima bw’imyororokere no kuboneza urubyaro ntako bisa. Ni urufunguzo rw’imibereho myiza, iterambere, ibyishimo n’umugisha mu muryango. (*Abaze niba hari ushaka kugira icyo yongeraho*).

Nyinawumuntu: Mbashimiye inama nziza mutugejejeho. Rwose kugeza ubu, nari naranangiye umutima, naranze kumva ibyiza byo kuboneza urubyaro, none ndabimenye. Nabitonganiye n’umugabo wange igihe kirekire, yagira ngo aravuze nti: “Kavuge idahiye!” Nari naramuhinduye umupagani utazi ijambo ry’Imana kugeza mbyaye abana ikenda bese kandi ejobundi nzabyara undi. Rwose musabye imbabazi imbere yanyu ambabarire. Nubwo nisanye nasandaye! Ubu niyemeje kubabera intumwa ku bandi bese bafite imyumvire idakwiye nk’iyo nari mfite.

Iribagiza: Mumfashe dushimire uyu mubyeyi. (*Bese bamukomere amashyi menshi*) Mwumvise ko tugomba kwitabira inyigisho ku buzima bw’imyororokere tukamenya imihindukire y’imibiri yacu, tukaboneza urubyaro kandi tukamenya indangagaciro na kirazira by’umuco wacu.

Twese tumenye ubuzima bwacu. Mugire amahoro.

Nyinawumuntu

na Mugwiza : Bahaguruke bahoberane n’ubwuzu bwinshi (*Abari aho bakome mu mashyi.*)

Umwitozo mu matsinda

Muhange agakino (Ikinamico ngufi) ku nsanganyamatsiko zikurikira:

1. Gahunda “Ndi umunyarwanda.”
2. Ibiyobyabwenge mu rubyiruko
3. Akamaro k’amashuri y’imyuga n’ubumenyingiro
4. Uburinganire n’ubwuzuzanye mu muryango
5. Uburenganzira bw’umwana
6. Urukundo
7. Imiyoborere myiza
8. Kwakirana urugwiro abatugana
9. Kwita ku bidukikije
10. Kwihangira umurimo no kwigira

Ikitonderwa: Mukurikize uturango tw’ikinamico, ako gakino mugafate mu mutwe maze muzagakinire bagenzi banyu.

INKURU ZISHUSHANYIJE

Inshoza y’inkuru ishushanyije

Inkuru ishushanyije, ni inkuru ibarwa amagambo aherekewe n’ibishushanyo. Bene iyo nkuru ishobora kugaragaramo amashusho yivugira adaherekewe n’amagambo ku buryo uyisoma amenya icyo iyo shusho isobanura.

Uturango tw’inkuru ishushanyije

Inkuru ishushanyije irangwa n’amashusho mbere na mbere. Igira abanyarubuga, ikagira urusobe rw’ibikorwa kuva ku ntangiriro kugera ku musozo. Buri munyarubuga arangwa n’igishushanyo gisa ukwacyo yaba ari umuntu akambara ukwe, ku buryo ntawamwitiranya n’undi. Amagambo umunyarubuga avuga aganira na bagenzi be ashyirwa mu kaziga kabwase cyangwa mu gakiramende gafite akarizo kerekeza ku gishushanyo kimugaragaza. Amashusho n’amagambo agabanywa mu tuzu, buri munyarubuga uri mu kazu avuga rimwe risa. Ibiganiro bitondekwa uva ibumoso ujya iburyo, ukabona kumanuka. Ibyo bikubahirizwa mu gutondeka utuzu no mu gutondeka ibiganiro byo muri buri kazu. Iyo hakenewe ibisobanuro, umubarankuru abitanga mu gakiramende katagira igishushanyo.

Urugero rw’inkuru ishushanyije: KAGENZI MU ITERAMBERE

Kagenzi avuye mu nama
y'Umurenge.

Mbega ngo Leta y'u Rwanda
iranteturura! Uzi ko ntari kuzapfa
nikamiye n'ay'umuyenzi aka ya
mvugo y'Abanyarwanda!
























Kagenzi ageze iwe aganira n'umugore we ku nka bagiye kubagabira.





Nyuma y'amezi abiri, Kagenzi ahawe inka yatumiye inshuti n'abaturanyi ngo baze kuyireba.



“Mbega mbega bagenzi! Ni inka se wokagira Imana we, ko ari igitangaza! Uruzi ukuntu ari zimwe za kiyambere zigira umukamo mwinshi! Mu minsi mike Kagenzi n’umuryango we baraba batemba itoto kubera inshyushyu, ikivuguto n’ibirunge!”



Mwabonye ariko n'ukuntu yitonda! Uzi ko nyagaza ikemera, nkayikora mu ruhanga no ku mabere ntinyiyame kandi itanzi! Ubundi bavuga ko inka nyinshi zisuzugura abagore, ariko iyi yo wagira ngo n'uburinganire irabuzi pe!

Hahahahahaha!



Abaturanyi batangiye kuganira ku cyo iyo nka izabamarira.

"Si izo nyungu gusa. Iyi nka, natwe ubu tugiye kuzayikuraho icyororo. Reka ahubwo ntangire gutera urubingo kuri ya miringoti mperutse guca mu murima wange! Wabona ari nge ugabanye izava kuri iyi ngweba ye!"

"Ubwo Kagenzi abonye inka duturanye, najya arangiza gufumbira imirima ye, azajya adusagurira ku ifumbire, natwe tubone iyo gushyira mu mirima yacu, ireke kugunduka. Uzi ko aho ujugunye amase himeza dodo!"








Hashize umwaka Umuyobozi w'Umurenge ategura umunsi mukuru wo kwizihiza ibirori by'abahawe inka muri gahunda ya "Gira inka Munyarwanda"









Birangiye Kagenzi aza imbere kugira ngo atange ubutumwa bwo gushimira uwamugabiye.





Umwitozo ku guhanga inkuru ishushanyije

- Hanga inkuru ishushanyije ku nsanganyamatsiko y'ubufatanye hanyuma witegure kuyimurikira abandi banyeshuri mwigana.

1.1.2.2. Ubuvanganzo nyemvugo

Ubuvanganzo nyemvugo bwo muri rubanda

Ubuvanganzo bwo muri rubanda ni ibihangano byahimbwe n'abantu ba kera, bakaba barahimbaga batandika, bakabifata mu mutwe. Ibyo bahimbaga babishyikirizaga ab'igihe cyabo bikabizihira mu bitaramo, bakagenda babiraga abo basize, bityobityo bakagenda babiherekeranya mu mvugo. Ubu buvanganzo bwo muri rubanda bukubiyemo ibintu byinshi byari byarasakaye muri rubanda. Nta muntu bwitirirwaga ko yabuhimbye.

Ingeri z'ubuvanganzo bwo muri rubanda

Muri ubu buvanganzo hakubiyemo ingeri nyinshi. Muri zo twavugaga: imigani miremire, ibitekerezo byo muri rubanda, imigani migufi (imigenurano), insigamigani, inanga zo muri rubanda, uturingushyho tw'abasizi, ibisingizo by'inyamaswa, ibisakuzo, amagorane, urwenya ibyivugaga, indirimbo, ibihoro, n'ubuvanganzo bw'abana, ubuvanganzo bujyanye n'imyuga (amavumvu, amasare, amahigi, ibihamagaro, ibyidogo by'isuka,...), ubuvanganzo bujyanye n'imihango n'imigenzo gakondo (kunywana, kuragura, guterekera, gutukura umwana, kwita umwana izina, guhura, kugangahura, kugombora, kuroga,...). icyakora hari ibyo Abanyarwanda benshi bari bahuriyeho kandi n'ubu buvugaga agaciro.

Ubuvanganzo nyemvugo nyabami

Ubuvanganzo nyabami ni ibihangano byahimbirwaga ibwami. Bwari bukubiyemo ibintu byari byerekeranye n'ibwami, abami, ingoma ya cyami n'ibindi byajyanye na yo.

Ingeri z'ubuvanganzo nyabami

Mu ngeri z'ubuvanganzo nyemvugo nyabami twavugaga: ubwiru, ubucurabwenge, ibitekerezo by'ingabo, ibyivugaga by'ingabo, indirimbo z'ingabo, ibisigo nyabami n'amazina y'inka.

A. IBISIGO (NYABAMI)

Intangiriro

Ibisigo bikunze kwitwaga nyabami byatangiyeye ku ngoma ya Ruganzu Ndoli; ni bwo byatangiyeye kwitwaga bityo. Mbere hari ibyitwaga *ibinyeto* (riva ku nshinga kunyeta bivugaga gusingiza cyangwa kurata). Mu binyeto Kagame avugaga ko umusizi yahangaga agasingiza kagufi k'imirongo

nk'icumi cyangwa makumyabiri, kakaba ari ak'umwami umwe, umwe. Nyuma, ku ngoma ya Ruganzu ni bwo **Nyirarumaga** yize uburyo bwo guhuriza mu gisigo kimwe abami benshi cyangwase akavuga umwami umwe mu gisigo kirekire. Mu kubitangira yahuriye bya binyeto mu gisigo kimwe yise “*Umunsi ameza imiryango yose*”.

Mbere abahanzi b'ibinyeto bitwaga “*abenge*”. Bityo guhera ubwo wa mwengekazi w'umusingakazi atangije ubwo buryo bushya, bitwa abasizi. Abandi benge bahise bamukurikiza maze kuva icyo gihe bahabwa agaciro ibwami kandi ibwami akaba ari na bo babagenga. Abasizi bishyize hamwe, bakagira gahunda y'uko bazajya batura umwami ibisigo banarema umutwe uyoborwa n' “*intebe y'abasizi*”. Abasizi nta kindi basabwaga gukora uretse guhimba.

Amoko y'ibisigo nyabami

Ibisigo nyabami birimo amoko atatu: ibisigo by'ikobyoy, ibisigo by'ibyanzu n'ibisigo by'impakanizi.

a) IKOBYO /IKUNGU

Ni ibisigo bigiye umujyoy umwe, bikagira interuro (intangiriro) n'umusayuko. Ntibigira ibika bitandukanye ahubwo byo bigiye umujyoy umwe. Aho bihuriye n'ibindi ni uko bigira indezi (amagambo asingiza umwami). Birahurutuye, nta n'ubwo ari birebire.

Urugero ni “*None imana itumije abeshi*” cyasizwe na Mutsinzi agitura Kigeli Rwabugili amuhanuririra abaroze se Rwogera ngo abarimbure (Abagereka bo kwa Rugereka).

b) IBYANZU

Ni ibisigo bigabanijwemo ibika bita ibyanzu bigiye bitandukanywa n'inyikirizo. Mu byanzu, iyo bavuga amateka y'abami ntibabakurikiranya uko bagiye bima ingoma n'uko ibikorwa byabo byagiye bikurikirana.

Urugero ni “*Naje kubara inkuru*” cyahimbwe na Sekarama ka Mpumba agitura Rwabugiri mbere yo gutera i Ndorwa.

Icyo gihe igikomangoma cyo mu Ndorwa cyari cyatumyeho Rwabugiri ngo bamubwire ko na we ari umwami kandi akitwa Rugaju. Ibyo bikibutsa ko Gahindiro wari wigaruriye Ndorwa yishwe na Rugaju rwa Mutimbo, Ndorwa ikaba inyazwe Rugaju. Igihe Rwabugiri yari amaze gutsinda yongeye guturwa igisigo cyitwa: “*Bahiriwe n'urugendo*”.

c) IMPAKANIZI

Ni ibisigo usanga umusizi yaragendaga avuga amateka y'abamin'ibikorwa byabo abakurikiranya uko bagiye bima ingoma, agaheruka uwo atura igisigo. Impakanizi yagiraga ibice by'ingenzi bitatu:

- **Interuro**, umusizi avugamo muri rusange ibyo agiye gukomozaho ku bami bose no kugaragaza ko aje kurabukira umwami.
- **Igihimba**, kigizwe n'ibika bivuga abamibigenda bitandukanywa n'inyikirizo yitwa impakanizi.
- **Umusayuko**, umusizi asingizamo umwami agitura uri ku ngoma ndetse akaba yaboneraho no kwisabira umuriro.

Urugero ni *“Ukwibyara gutera ababyeyi ineza”* cya Nyakayonga ka Musare wa Karimunda.

Impugukirwa.:

1) Uretse ubwo bwoko butatu tumaze kubona hari n'ibisigo by'ubuse bamwe bita *“ibyivugo by'ubuse”*. Muri byo umusizi yashoboraga gutera umwami cyangwa abandi ubuse, abavugaho ibintu bisa n'ibisebya kandi bisekeje. Uwo bavugaga ntiyagombaga kurakara, naho iyo yarakaraga bakamwita *igifura*. Bene ibyo bisigo by'ubuse ni byo Kagame yiganye mu guhimba *“Indyoheshabirayi”* kuko na yo itera ubuse, umwami Rudahigwa n'abatware ku bijyanye n'ubusambo bw'ingurube.

2) Mu kuvuga umwami n'ibyo yakoze, abasizi birindaga kugaragaza amakosa umwami yaba yarakoze. Musare yahagaritswe ku ngoma ya Kigeri Ndabarasa kubera ko ngo yari yaserereje umwami. Ngurusi na we yavuze amakosa y'umwami ku ngoma ya Kigeri Rwabugiri ariko nta cyo bamutwaye. Hari aho yari yagize ati: *“Mbwire umwami urugo ruzatwika urwe, awucirira hakiri kare”* mu gisigo cyitwa *“Urugo rugwije imbaga”* Rwabugiri ni ko kumubwira ati *“noneho si ugusiga urasebanya”*. Ruhinda rwa Kinyakura ngo na we hari aho yavuze ibyerekeye n'ubwiru ku ngoma ya Yuhi Mazimpaka, bamushyira ku ngoyi. Ni mu gisigo cyitwa *“Ndi umupfumu w'inka”*, yaje gusaba imbabazi mu gisigo yise *“Ndi umuyobohe w'abami”*.

B. IBYIVUGO

Ibyivugo ni ubuvanganzo bufatiye ku byerekeye intambara. Nubwo buri mugabo byari ihame ko agira ikivugo cye, ariko siko bose bari bafite ubuhanga bwo kubihimba. Ababihimbaga babitaga

‘**INTITI**’ akaba ari zo zifashishwaga mu guhimbira abandi ibyivugo. Twafata nk’urugero rwa Biraro bya Nyamushanja wahimbye ikivugo gisingiza umuheto wa Kigeli Rwabugili kitwa “Inkataza –kurekera”. Ibyivugo rero ni nk’ibisingizo bisingiza intwari ku rugamba, bigasingiza intwari, zikarata n’ubutwari bwabo. Uwivuga niwe ubwe uba yitaka, ataka n’intwari ze.

Mu byivugo habagamo **ibigwi** (Umubare cyangwa se amazina y’abo nyirukwivuga yatsinze ku rugamba) n’**ibirindiro** (Ibikorwa by’akataraboneka yerekaniye ku rugamba).

Uwabaga yarambitswe Umudende cyangwa se impotore n’uwacanye uruti yarabyivugaga.

- **Umudende:** icyuma kimeze nk’umukwege bambaraga mu ijosi gitunzweho amashinjo (inyuma bicuze nk’umuhunda ucuritse birimo amarebe nk’ayo mu nzogera). Uwambaraga Umudende yabaga yarishe ababisha cyangwa abanyamahanga barindwi abatsinze mu itsimbiro.
- **Impotore:** Yari umuringa w’amazi uzinze nk’injishi y’inyabubiri wambarwaga ku kuboko kw’iburyo. Wambikwaga uwabaga yarishe ababisha cyangwa abanyamahanga cumi na bane abatsinze mu itsimbiro.
- **Gucana uruti:** Uwabaga yacanye uruti ni uwabaga yarishe ababisha cyangwa abanyamahanga makumyabiri n’umwe abatsinze mu itsimbiro. icyo gihe yagororerwaga inka nyinshi ndetse n’imisozi, agasonerwa no kujya ku rugamba mu minsi yo kubaho kwe kose, ahubwo akaba umujyanama w’i Bwami mu bijyanye n’intambara.

Nubwo habagamo amakabya menshi, ibyivugo byatumaga aba kera bagira ubutwari ku rugamba bagashira ubwoba.

Ibyivugo byari ugutatu:

- **Ibyivugo by’iningwa:** Byari bihimbitse neza ariko ari bigufi.
- **Ibyivugo by’imyato:** Byabaga ari birebire kandi bikagira ibice bitaga’’ IMYATO’’
- **Ibyivugo by’amahomvu cyangwa by’ubuse:** Ni ibyivugo bisetsa, umuntu yakeka ko bisebanya. Byahimbwaga mu bitaramo by’amatorero kandi uwo babihimbiye ntarakare. Iyo yarakarraga bamwitaga “IGIFURA cyangwa IKINYAMUSOZI”. Bigaragara ko atamenyereye kubana n’abantu cyangwa se kuganira.

C. UBWIRU

Ubwiru ni ingeri y’ubuvanganzo nyarwanda igizwe n’imihango yahimbwe mu gihe kitaramenyekana neza (ariko mbere y’umwami NDAHIRO Cyamatare), bukaba bwari bugamije gushimangira ubushobozi ndengakamere bw’umwami, kumuha ububasha kuva yima ingoma. Izo nzira zari 18, zikaba zerekeye ku bintu binyuranye byari bishishikaje ubwami, ibigomba gukorwa mu kwima no kwimikwa, ibigomba gukorwa mu gushaka uburumbuke, ibyerekeye intambara n’ibindi.

Kubera ko inzira zari nyinshi, zagabanywaga abiru benshi, bagakomera ku ibanga kandi bakirinda kwibagirwa.

Ubwiru muri iki gihe, umuntu yabugereranya n’itegeko nshinga. Naho abiru bakaba abanyamabanga, uretse ko ubwiru bwo butatangarizwaga rubanda nk’uko bikorwa ku itegeko nshinga.

Mu nkoranya ya Tervuren/IRST ho bavuga ko ubwiru ari **imihango y’amabanga y’i bwami**. Ngo iyo mihango yabaga yarateganyirijwe guha umwami ububasha butari ubw’abandi igihe yimikwaga, bigatuma abukomeza kandi akabukoresha igihe ari ngombwa. Yose hamwe yari nk’amategeko agizwe n’ibice 18 bita inzira, agateganya uburyo buhambaye bwo kurengera igihugu.

Muri make, umuntu yavugaga ko ubwiru ari “imihango umwami yakoraga cyangwa yakorerwagaho kugira ngo aronke ububasha buhambaye bwo kurengera igihugu”.

Amazina y’inzira zari zigize ubwiru

Mu nzira 18 zariho, izashoboye gutahurwa ni 17 kuko iya 18 ari yo **inzira y’imfizi y’i bwami** ntiyashoboye kuboneka.

Inzira zabonetse ni izi zikururikira:

1. **Inzira ya Rukungugu:** Ni inzira yavugaga ibyerekeye amapfa, igihe habaga hateye amapfa.
2. **Inzira ya Kivu:** Igihe habaga hateye umwuzure, iyo nzira yari iyo gutsirika imyuzure.
3. **Inzira y’Inzuki:** Yari inzira igamije irumbuka ry’inzuki mu gihe ubuki bwagumye, igakorwa igihe cyo kweguka imizinga no guhakura.

4. **Inzira ya Muhekenyi:** Yari igamije gutsemba indwara z'ibyorezo z'inka n'ibindi byonnyi.
5. **Inzira y'Umuhigo:** Yabaga yerekeranye n'imihango yo guhiga inyamaswa.

Ikitonderwa:

Izi nzira 5 za mbere zari zigize imihango ikorwa igihe ikenewe gusa, nta gihe gihamye yari ifite.

6. **Inzira y'Umuriro:** Yari inzira igamije “kubyarira umuriro”. Ni ukuvuga ko bacanaga bundi bushya umuriro wa Gihanga. Wibitsaga iyimikwa ry'Abami b'Umuriro ari bo ba Yuhi. Iyo nzira yari igamije kongera inka n'abantu mu Rwanda, igakorwa na Yuhi.
7. **Inzira ya Gicurasi:** Habaga Igisibo/Ikiriyo cyo kwibuka urupfu rwa NDAHIRO Cyamatare. Umwijima wa Gicurasi washushanyaga urupfu naho iboneka rya Kamena rigashushanya uburumbuke n'ubuzima, iyi nzira yagaragazaga imihango yo kwirabura no kwera ngo u Rwanda rurumbuke.
8. **Inzira y'Umuganura:** Yari inzira igenga imihango yo kuganura, habaga umuganura wo kuganura umwami.
9. **Inzira y'Ishora:** Yari inzira igenga imihango yo gushora, yibutsaga iyimikwa ry'Abami b'Inka ari bo bo MUTARA na CYILIMA.
10. **Inzira y'Inteko:** Yari inzira igenga imihango yo gukora inteko zo gutabara igihe cyo kurwanira ingoma.
11. **Inzira yo Kwambika ingoma:** Iyo ingabo z'u Rwanda zatsindaga igihugu runaka, bambikaga ingoma ibishahu.
12. **Inzira yo Kwasira:** Iyo mihango yagengaga uburyo bunyuranye bwo kwambika ingoma ibishahu.
13. **Inzira y'Inkiko Yabyaye Umugaru:** Yagengaga iby'inkiko z'u Rwanda. Yakorwaga igihe cyo kwagura imipaka y'igihugu.
14. **Inzira y'Urwihisho:** Yibutsaga igihe k'ibitero bikaze by'u Rwanda n'u Burundi. Iyo umwami w'u Burundi yabaga yatanze, umwami w'u Rwanda yagombaga kumara ahantu iminzi 8 atabonana n'umugore kandi akiragiza abakurambere.
15. **Inzira y'Ikirogo:** Yavugaga ukuntu umwami w'u Rwanda ashingurwa igihe yabaga yatanze.

16. **Inzira y'Urugomo:** Yakorwaga igihe cyo kugaba ibitero ku bantu bagomeye ingoma.
17. **Inzira y'Iyimika:** Yavugaga uburyo umwami yimikwa nyuma y'uko undi yatangaga.
18. **Inzira y'Imfizi y'i Bwami:** Iyo nzira y'imfizi z'i bwami ntirashobora kuboneka.

Dufashe nk'urugero ku nzira y'umuganura, dusanga ko umuganura wabaga mu kwezi kwa Nyakanga, ukaba umunsi mukuru wo kwibuka amasaka ya mbere yasaruwe mu Rwanda rumaze kunamuka; akaba rero imyaka ya Ruganzu ngo kuko yunamuye u Rwanda. Icyo gihe ngo u Rwanda rwakoze iminsi mikuru ikomeye yo gusangira umutsima w'amasaka ya mbere, ari ko kuganura. Ku munsi w'uwo muganura, umwami ubwe ni we watekeraga rubanda, mu by'umuhango nyine: akarika, inkono yatura agaturira, akavuga umutsima, akagabura, maze u Rwanda rwose rugasangira kivandimwe nyine. Muri iki gihe umuntu yabyita ubusabane.

D. UBUCURABWENGE

Intangiriro

Kera u Rwanda rwagiraga abanyabwenge bitwa **Abacurabwenge**, bakaba ari bo bamenyaga ibisekuruza by'abami n'abagabekazi. Abashakashatsi b'Abazungu, nka ba Padiri André Pagès (1933) n'abandi, bagiye bandika amwe muri ayo mazina, ariko bakandika ibyo bakuye muri rubanda, bituzuye, kandi bidakurikiranya ayo mazina neza. Padiri Alexis Kagame ni we waje kumenya ko haba abagenewe uwo murimo. Arabegera, bamubwira ibisekuruza by'abami n'abagabekazi arabyandika, aza kubisohora mu gitabo "Inganji Kalinga", mu gice yise "**Ubucurabwenge**".

Ubundi ariko, ijamba "**ubucurabwenge**" si ukuvuga iryo rondora ry'ayo mazina gusa. Ahubwo ni ubumenyi bw'icyo ayo mazina agenda yerekana, uko u Rwanda - ari yo si yose nyine - rwavutse, rugakura, rugaca ubwenge, rurera n'abami. **Abacurabwenge batubwira ko abami ba mbere na mbere bakomokaga mu ijuru.** Bavuka kuri Sabizeze, mwene Nkuba, "Umwami wo Hejuru". Sabizeze rero yari yavutse mu gicuba, nyina yabuganiyemo amata, akagishyiramo umutima w'imana yeze. Amaze gukura, yumva nyina Gasani avuga uko kuntu yavutse, biramurakaza, arivumbura, ati "sinduraramo". Ni bwo rero amanutse ku isi. Ni n'aho izina rya "Kigwa" ryaturutse.

Kigwa amanuka mu ijuru, aza ku isi, yururukiye ahitwa ku Rutare rwa Kinani, mu Mubari. Akaba yamanukanye na Mukuru we Mututsi, na Mushiki wabo Nyampinga. Ahasanga abo bita Abasangwabutaka, arabahaka, na bo baramuyoboka. Bigezeho arashaka, abyara Muntu, Se w'abantu bese bo ku isi. Abo bami baturutse mu ijuru bitwa **"Ibimanuka"**. Bibera aho, ibihe birahita, ibindi birataha. Kera kabaye, bene Muntu bamaze gucura ubwenge, ibimanuka birataha, bisubira mu ijuru. U Rwanda bisiga biruraze GIHANGA cya Kazi. Bene Gihanga rero ni bo bitwa Abami b'Umushumi.

Se wa Gihanga, Kazi, yari ikimanuka, ariko yari yarashatse Nyirarukangaga rwa Nyamigezi ya Kabaja, umwami w'Abazigaba, bakaba Abasangwabutaka. Murumva rero ko Gihanga yari "ikivange" cy'abaturutse mu ijuru n'abakuriye ku isi. Abami b'Umushumi na bo bakazakurikirwa n'abitwa "Abami b'Ibitekerezo". Ngiyo inkomoko y'Abami b'u Rwanda, kandi ni na yo y'abantu bese.

Muri rusange, **ubucurabwenge** ni umuvugo muremure uvuga ibisekuru by'abami n'abagabekazi. Abari bashinzwe ubucurabwenge bitwaga **abacurabwenge**. Abacurabwenge bagombaga kuba atari benshi kubera ko ubucurabwenge bugizwe n'umuvugo umwe rukumbi ukurikira:

Uyu mwami twimitse ni **MUTARA**, izina rye ari Umututsi ni **RUDAHIGWA**. Nyina ni **NYIRAMAVUGO**, izina rye ari Umututsi ni **KANKAZI** ka Mbanzabigwi ya Rwakagara, rwa Gaga, rya Mutezintare, wa Sesonga, ya Makara, ya Kiramira, cya Mucuzi, wa Nyantabana, ya Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba **Umukobwa w'Abega**. Nyina ni Nyiranteko ya Nzagura, ya Mbonyingabo akaba Umukobwa w'Abashambo. Aho ga nyine, **Abega bakabyarana abami n'Abanyiginya**.

Mutara ni uwa **YUHI**, izina rye ari Umututsi ni **MUSINGA**. Nyina ni **NYIRAYUHI**, izina rye ari Umututsi ni **KANJOGERA** ka Rwakagara, rwa Gaga, rya Mutezintare, wa Sesonga, ya Makara, ya Kiramira, cya Mucuzi, wa Nyantabana, ya Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina ni Nyiramashyongoshyo ya Mukotanyi, wa Kimana, cya Kabajyonjya, ka Rwaka, rwa Yuhi

Mazimpaka Umwami wa Rubanda: akaba Umukobwa w'Abanyiginya. Aho ga nyine, Abega bakabyarana abami n'Abanyiginya.

Yuhi ni uwa KIGERI, izina rye ari Umututsi akaba RWABUGIRI. Nyina ni NYIRAKIGERI, izina rye ari Umututsi akaba MURORUNKWERE wa Mitari ya Cumu, rya Giharangu, cya Mutima, ya Matana, ya Babisha, ba Samutaga, wa Byunga, bya Bigirimana, bya Sagashya ka Sakera, ka Sakayumbu, ka Mwezentandi, wa Ntandayera, wa Mukono, wa Mututsi: akaba Umukobwa w'Abakono. Nyina ni Nyirangeyo ya Rukundo, rwa Maronko: akaba Umukobwa w'Abashambo. Aho ga nyine, Abakono bakabyarana abami n'Abanyiginya.

Kigeri ni uwa MUTARA, izina rye ari Umututsi akaba RWOGERA. Nyina ni NYIRAMAVUGO, izina rye ari Umututsi akaba NYIRAMONGI ya Gaga, rya Mutezintare, wa Sesonga, ya Makara, ya Kiramira, cya Mucuzi, wa Nyantabana, ya Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina ni Nyiragahwehwe ka Minyaruko, ya Kabeba, ka Byami, bya Shumbusho, rya Ruherekeza, rwa Zuba, rya Gitore, cya Kigeri Mukobanya Umwami wa Rubanda: akaba Umukobwa w'Abanyiginya. Aho ga nyine, Abega bakabyarana abami n'Abanyiginya.

Mutara ni uwa YUHI, izina rye ari Umututsi akaba GAHINDIRO. Nyina ni NYIRAYUHI, izina rye ari Umututsi akaba NYIRATUNGA rya Rutabana, rwa Nyakirori, cya Makara, ya Kiramira, cya Mucuzi, wa Nyantabana, ya Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina ni Nyiramwami wa Shumbusho, rya Muhoza wa Ruregeya: akaba Umukobwa w'Abagesera. Aho ga nyine, Abega bakabyarana abami n'Abanyiginya.

Yuhi ni uwa MIBAMBWE, izina rye ari Umututsi akaba SENTABYO. Nyina ni NYIRAMIBAMBWE, izina rye ari Umututsi akaba NYIRANTAMBA rya Sesonga, ya Makara, ya Kiramira, cya Mucuzi, wa Nyantabana, ya Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina ni Nyiramacyuriro ya Rusimbi, rwa Magenda, ya Gasimbuzi ka Senyamisange, ya Muyogoma, wa Juru, rya Yuhi

Gahima umwami wa Rubanda: akaba Umukobwa w'Abanyiginya. Aho ga nyine, Abega bakabyarana abami n'Abanyiginya.

Mibambwe ni uwa KIGERI, izina rye ari Umututsi akaba NDABARASA. Nyina ni NYIRAKIGERI, izina rye ari Umututsi akaba RWESERO rya Rutabana, rwa Muhoza wa Ruregeya: akaba Umukobwa w'Abagesera. Nyina ni Mboyire ya Rujuhe, rwa Censha, rya Nyirabahaya: akaba umukobwa w'Abahondogo. Aho ga nyine, Abagesera bakabyarana abami n'Abanyiginya.

Kigeri ni uwa CYILIMA, izina rye ari Umututsi akaba RUJUGIRA. Nyina ni NYIRACYILIMA, izina rye ari Umututsi ni KIRONGORO cya Kagoro, ka Nyamugenda: akaba Umukobwa w'Abega. Nyina ni Nyanka ya Migambi, ya Rukundo, rwa Ntaraganda, ya Nkoronko: akaba umukobwa w'Ababanda. Aho ga nyine, Abega bakabyarana abami n'Abanyiginya.

Cyilima ni uwa YUHI, izina rye ari Umututsi akaba MAZIMPAKA. Nyina ni NYIRAYUHI, izina rye ari Umututsi akaba NYAMAREMBO ya Majinya, ya Byunga, bya Bigirimana, bya Sagashya, ka Sakera, ka Sakayumbu, ka Mwezentandi, wa Ntandayera, wa Mukono, wa Mututsi: akaba Umukobwa w'Abakono. Nyina ni Nyamyishywa ya Musanzu, wa Cyankumba, cya Juru, rya Yuhi Gahima umwami wa Rubanda: akaba umukobwa w'Abanyiginya. Aho ga nyine, Abakono bakabyarana abami n'Abanyiginya.

Yuhi ni uwa MIBAMBWE, izina rye akiri Umututsi akaba GISANURA. Nyina ni NYIRAMIBAMBWE, izina rye ari Umututsi akaba NYABUHHORO bwa Rwiru, rwa Rubona, rwa Mukubu, wa Mushyoma, wa Bitungwa, bya Nkona, ya Ruhaga, rwa Matashya, wa Gihumbi: akaba Umukobwa w'Abaha. Nyina ni Nyaramugondo, wa Muyogoma ya Musanzu, wa Juru, rya Yuhi Gahima umwami wa Rubanda: akaba umukobwa w'Abanyiginya. Aho ga nyine, Abaha bakabyarana abami n'Abanyiginya.

Mibambwe ni uwa KIGERI, izina rye akiri Umututsi akaba NYAMUHESHERA. Nyina ni NYIRAKIGERI, izina rye akiri Umututsi akaba NCENDERI ya Gisiga, cya Semugondo: akaba

Umukobwa w'Abega. Nyina akaba Ncekeri, ya Ruhomwa rwa Kinanira, cya Juru, wa Yuhi Gahima umwami wa Rubanda: akaba umukobwa w'Abanyiginya. Aho ga nyine, Abega bakabyarana abami n'Abanyiginya.

Kigeri ni uwa MUTARA, izina rye ari Umututsi akaba SEMUGESHI. Nyina ni NYIRAMAVUGO, izina rye ari Umututsi akaba NYIRAKABOGO ka Gashwira, ka Burigande, bwa Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina akaba Mfitiki, ya Ruherekeza rwa Zuba, rya Gitore, cya Kigeri Mukobanya umwami wa Rubanda: akaba umukobwa w'Abanyiginya. Aho ga nyine, Abega bakabyarana abami n'Abanyiginya.

Mutara ni uwa RUGANZU, izina rye ari Umututsi akaba NDORI. Nyina ni NYIRARUGANZU, izina rye ari Umututsi akaba NYABACUZI ba Kibogora, akaba Umukobwa w'Abakono. Nyina akaba Nyirarugwe rwa Nkuba, ya Bwimba, bwa Gitore, cya Kigeri Mukobanya umwami wa Rubanda: akaba umukobwa w'Abanyiginya. Aho ga nyine, Abakono bakabyarana abami n'Abanyiginya.

Ruganzu ni uwa NDAHIRO, izina rye ari Umututsi akaba CYAMATARE. Nyina ni NYIRANDAHIRO, izina rye akiri Umututsi akaba NYANGABO ya Ntabana, ya Kamima: akaba Umukobwa w'Abega. Nyina akaba Buhorwinka bwa Kigohe, cya Cyahi, ya Mukubu, wa Cyange, cya Nyacyesa, cya Mukobanya umwami Ndobu, Umwami wa Rubanda! Akaba umukobwa w'Abanyiginya. Aho ga nyine, Abega bakabyarana abami n'Abanyiginya.

Ndahiro ni uwa YUHI, izina rye ari Umututsi akaba GAHIMA. Nyina ni NYIRAYUHI, izina rye ari Umututsi akaba MATAMA ya Bigega, bya Ruhaga, rwa Matashya, wa Gihumbi, akaba Umukobwa w'Abaha. Nyina akaba Nyabyanzu bya Nkuba, ya Nyabakonjo, akaba umukobwa w'Abongera. Aho ga nyine, Abaha bakabyarana abami n'Abanyiginya.

Yuhi ni uwa MIBAMBWE, izina rye ari Umututsi akaba MUTABAZI. Nyina ni NYIRAMIBAMBWE, izina rye akiri Umututsi akaba NYABADAHHA ba Ngoga, ya Gihinira, cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina akaba

Mageni ya Gikari, cya Nsoro: akaba umukobwa w'Abahondogo. Aho ga nyine, Abega bakabyarana abami n'Abanyiginya.

Mibambwe ni uwa KIGERI, izina rye ari Umututsi akaba MUKOBANYA. Nyina ni NYIRAKIGERI, izina rye akiri Umututsi akaba NYANGUGE ya Sagashya, ka Sakera, ka Sakayumbu, ka Mwezentandi, wa Ntandayera, ya Mukono wa Mututsi: akaba Umukobwa w'Abakono. Nyina akaba Nyiravuna rya Rweru, rwa Nsoro: akaba umukobwa w'Abahondogo. Aho ga nyine, Abakono bakabyarana abami n'Abanyiginya.

Kigeri ni uwa CYILIMA, izina rye akiri Umututsi akaba RUGWE. Nyina ni NYIRAKILIMA, izina rye akiri Umututsi akaba NYAKIYAGA cya Ndiga, ya Gahutu, ka Serwega, rwa Mututsi: akaba Umukobwa w'Abega. Nyina akaba Nyabasanza ba Njwiri, ya Mupfumu wa Ndoba, Umwami wa Rubanda, akaba umukobwa w'Abanyiginya. Aho ga nyine, Abega bakabyarana abami n'Abanyiginya.

Cyilima ni uwa RUGANZU, izina rye akiri Umututsi akaba BWIMBA. Nyina ni NYIRARUGANZU, izina rye akiri Umututsi akaba NYAKANGA ka Tema, rya Rima, rya Bare, rya Gongo, rya Muzora, wa Gahuriro, ka Jeni, rya Rurenge: akaba Umukobwa w'Abasinga. Nyina akaba Nyabitoborwa bya Muzora, wa Mushambo, wa Kanyandorwa, ka Gihanga: akaba umukobwa w'Abashambo. Aho ga nyine, Abasinga bakabyarana abami n'Abanyiginya.

Ruganzu ni uwa NSORO, izina rye akiri Umututsi akaba SAMUKONDO. Nyina ni NYIRANSORO, izina rye akiri Umututsi akaba NYAKANGA ka Gatondo: akaba Umukobwa w'Abasinga. Nyina ni Nyirakiziga cya Ruhinda, rwa Mbogo, ya Gashwere: akaba umukobwa w'Abega. Aho ga nyine, Abasinga bakabyarana abami n'Abanyiginya.

Nsoro ni uwa SAMEMBE. Nyina ni MAGONDO ya Matashya, Umukobwa w'Abaha. Aho ga nyine, Abaha bakabyarana abami n'Abanyiginya.

Samembe ni uwa NDOBA. Nyina ni MONDE ya Gahutu, ka Serwega, rwa Mututsi: akaba Umukobwa w'Abega. Aho ga nyine, Abega bakabyarana abami n'Abanyiginya.

Ndoba ni uwa NDAHIRO, izina rye akiri Umututsi akaba RUYANGE. Nyina ni NYIRANDAHIRO izina rye akiri Umututsi akaba CYIZIGIRA: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Ndahiro ni uwa RUBANDA. Nyina ni NKUNDWA ya Mbazi, ya Nyundo: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Rubanda ni uwa RUKUGE. Nyina ni NYIRANKINDI ya Kiragira: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Rukuge ni uwa NYARUME. Nyina ni NYIRASHYOZA rya Muzora: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Nyarume ni uwa RUMEZA, Nyina ni KIREZI cya Rugwana: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Rumeza ni uwa YUHI. izina rye ari Umututsi akaba MUSINDI. Nyina ni NYIRAYUHI, izina rye akiri Umututsi akaba NYAMATA ya Rwiru: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Yuhi ni uwa KANYARWANDA, izina rye ari Umututsi akaba GAHIMA. Nyina ni NYIRAKANYARWANDA, izina rye akiri Umututsi akaba NYAMUSUSA wa Jeni, rya Rurenge: akaba Umukobwa w’Abasinga. Aho ga nyine, Abasinga bakabyarana abami n’Abanyiginya.

Kanyarwanda ni uwa GIHANGA CYAHANZE INKA N’INGOMA: Umwami wa Rubanda wa mbere. Nyina ni NYIRARUKANGAGA rwa Nyamigezi ya Kabeja: akaba Umukobwa w’Abazigaba. Aho ga nyine, Abazigaba bakabyarana abami n’Abanyiginya.

Gihanga ni uwa Kazi ka Kizira, cya Gisa, cya Randa, rya Merano, ya Kobo, ka Kijuru, cya Kimanuka, cya Muntu, wa Kigwa, cya Nkuba, Ngaho iyo Mwama Mukuru wa Samukondo, mu mizi yanyu mikuru.

Akamaro k'ubucurabwenge:

Ubucurabwenge bufite akamaro kanini mu kumenyekanisha amateka y'ubwami bw'u Rwanda mu gihe inyandiko yari itaragera mu Rwanda. Ku byerekeye amateka yo gusimburana ku ngoma, ntawashidikanya ko abacurabwenge babikurikiranyaga neza uko byagenze, nk'uko n'ubushakashatsi bwabigaragaje, n'ubwo tutazi neza igihe abo bacurabwenge batangiriye kubufata mu mutwe.

E. AMAZINA Y'INKA

Nk'uko amateka y'ubuvanganzo nyarwanda abigaragaza, **Amazina y'inka** ni nk'ibyvugo cyangwa ibisingizo by'inka z'Inyambo. Iyi nganzo ikaba yaratangiye ku ngoma ya Yuhi IV Gahindiro ahasaga mu w'1746. Ni bwo Abanyarwanda babifitiye ubushake n'ubushobozi bibanze ku bwiza n'akamaro kanini inka zari zifite, batangiyeye kuzivuga bazirata ndetse bakazirwanisha no ku rugamba.


Aborozi bafite ingeri y'ubuvanganzo ijyana n'uwo murimo w'ubworozi nyine. Hari **ibihamagaro** ari byo bavuga udusingizo duhamagara inka igiye gukamwa cyangwa kumurikwa. Hari n'**indirimbo z'inka** zigizwe n'*amahamba*, *amabanga*, *amahindura*, *amararo*, *imiyengayengo*, *amajuri*, *ibyisigo*. Muri izo ndirimbo izamenyekanye cyane ni "**Inzira nziza**", **Imyoma** cyangwa **Imyama**.

Ntabwo rero bikwiye kwitiranywa n'amazina y'inka cyangwa ibyvugo byazo.

Amazina y'inka yahimbwaga n'**abisi**. Basingizaga gusa inka nziza mu nyambo beretswe.

- Iyo izo nyambo zabyaraga **uburiza**, bazihimbiraga igisingizo kigufi kitwa **incutso**.
- Iyo zamaraga kubyara **ubuheta**, bazihimbiraga **umuzinge**.

Uwo muzinge wabaga ugizwe n'imivugo cyangwa se ibika washoboraga gusozwa n'**umusibo** (udusingizo tw'inka imwe) cyangwa se **imivunano**, ari byo bivuga "ibisingizo bihabwa buri nka yahimbiwe incutso."



Imvano y'inganzo y'amazina y'inka

Mu Rwanda rwa kera inka yari ifite agaciro gakomeye. Inka ni yo yarangaga ubukire. Ni yo yari ifaranga ry'ubu. Inka ni yo yari ipfundo ry'ubuhake. Tuzi kandi neza ko ubuhake bwarambye mu Rwanda. Bwanahambiraga umugaragu kuri shebuja, akitwa umuntu we, akamwirahira. Bwagiye buvuna benshi bakabuvugiraho. Bati: «ubuhake burica; ubuhake bujya kukwica buguca iwanyu; ubuhake bwananiranye bukukisha umugabo ikijyaruguru» n'ibindi.

Hari n'abo bwatoneshaga bakarenguka. Bati «ubuhake bwa cyane bukunyaza mu ngoro». Bwateraga ubwibombarike. Bati: «iyi ubuhake buteye hejuru uratendera». Ariko rero kandi uwafataga nabi abagaragu yarabigayirwaga; umugaragu wahemukiraga shebuja yaragayikaga. Uwabaga ahatse abagaragu yagombaga kubagoboka bari mu byago. Umugaragu na shebuja babaga bafitanye ubumwe bukomeye bwafatiye ku nka. Iyo ubwo bumwe bwazagamo agatotsi ku mugaragu, shebuja yaramunyagaga, naho byaba biturutse kuri shebuja, umugaragu akamwîmuura akajya gukeza ahandi.

Intwari yo ku rugamba yagororerwaga inka. Inka yungaga inshuti. Uwahemukiye undi mu bintu bikomeye, akamuha ikiru k'inka. Inka yahuzaga inshuti kuko abahanaga inka babaga babaye inshuti z'amagara.

Inka bayikwaga umugeni. Umusore wabaga yaraye arongoye baramubyukutukirizaga, inka zikamukamirwa. Mu itwikurura ry'umugeni bazanaga amata. Umubyeyi yarabyaraga, bajya kumuhemba bakazana amata.

Umwana iyo yahambaga se cyangwa sekuru yahabwaga inka y'inkuracyobo (inkuramwobo). Umwana wahambaga nyina cyangwa se nyirakuru byitwaga gukamira nyina cyangwa nyirakuru. Mu mihango yo kwera hazagamo ibyerekeye kujya ku kibumbiro, hakazamo ibyo guha amata abana b'uwatabarutse.

Mu ndamukanyo z'abanyarwanda dusanga abantu bifurizanya gutunga. Bati «gira inka» - «ndashimye/ndazishimye», «amashyo» - «amashongore».

Nta wakwiyibagiza ko mu byo **Abanyarwanda bafatiragaho bagena ibihe by'umunsi**, inka yari iri mo.

Baravugaga bati:

- * Inka zivuye mu rugo (aho ni nko mu ma saa moya)
- * Inka zikamwa (aho ni nko mu ma saa moya na 15 – ubwo ziba zikamirwa ku nama, ku irembo)
- * Inka zahutse (aho ni nka saa mbiri)
- * Inyana zahutse (aho ni nka saa moya irengaho duke)
- * Inyana zitaha (nko mu ma saa yine)
- * Mu mashoka (nko mu ma saa saba)
- * Inka zikuka cyangwa mu makuka (nko mu ma saa munani)
- * Inyana zisubira iswa (nko mu ma saa kenda)
- * Inka zihinduye (nko mu ma saa kumi)
- * Inyana zitaha (nka saa kumi n'imwe)
- * Inka zitaha (nka saa kumi n'ebiri n'igice)
- * Inka zikamwa (nko mu ma saa moya).

Uwagendera byonyine kuri ibi byose tumaze kubona ntiyangazwa no kubona haravutse ubuvanganzo bufatiye ku nka.

Ibyo bigaragarira :

- **Mu mahamba:** ni indirimbo zaririmbwaga n'abashumba bacyuye inka. Izo ndirimbo zirazwi mu Rwanda hose.
- **Mu mabanga** cyangwa mu **mahindura:** indirimbo abashumba baririmbaga inka zirisha, zitaha, batarazikata inkoni ngo ziboneze zitahe.
- **Mu nzira:** indirimbo zaririmbirwaga inka mu gihe zabaga zigana amabuga cyangwa ibibumbiro.
- **Mu ndama:** indirimbo baririmbaga mu gihe inka zabaga zibyagiye ahantu, bazishoye amabuga cyangwa ibibugazi. Izo ndirimbo hari n'ubwo zaririmbwaga mu minsi mikuru,

bamurika inka. icyo gihe abagore n’abakobwa bahimbazaga izo ndirimbo baziha amashyi.

- **Mu byisigo:** indirimbo zo mu gihe cyo kudahira. Basingizaga amazi ahiye hamwe n’inka zabaga zayashotse.
- **Mu myama (mu myoma):** indirimbo zaririmbwaga mu gihe k’impeshyi, zigisha (zigana ahari ubwatsi).

Imiterere y’amazina y’inka n’ubwiza bwayo

Mu mazina y’inka, abisi bavumbuye inganzo ishingiyeye ku ipima rigendera ku kabangutso. Ni ukuvuga imikoreshereze y’ubutinde bw’inyajwi.

Babipimye bate rero?

Reka tugendere kuri uru rugero kugira ngo dushobore kubyumva.

«Rutiimiirwa ziri mu mihigo»

Turabona muri uyu mukarago ko inyajwi ya mbere ifite ububanguke, iya kabiri n’iya gatatu zikagira ubutinde, izikurikiyeho zose zikagira ubutinde ububanguke.

Akabangutso kakaba rero gahwanye n’inyajwi ibangutse, naho inyajwi inimbitse (itinze) ikagira utubangutso/utubeshuro tubiri.

Urugero tumaze kubona rukaba rugaragaramo **utubangutso 12**.

Abasesenguye amazina y’inka babyitondeye basanze:

- **Hari agizwe n’imikarago ifite utubangutso 9**

Urugero: **Inka ya Rumonyi**

$R\bar{u}t\bar{a}gw\bar{a}b\bar{i}z(a) \bar{i}m\bar{i}n\bar{e}g\bar{a} = 9$

(i) $nk\bar{u}b\bar{a} z\bar{e}s\bar{a} m\bar{u} b\bar{i}h\bar{o}g\bar{o} = 9$

$Rw\bar{a} m\bar{u}g\bar{a}b\bar{o} ny\bar{i}r\bar{i}g\bar{i}r\bar{a} = 9$

(i) $mb\bar{i}z(i) \bar{i}s\bar{a}ng\bar{a}n\bar{i}zw(a) \bar{i}ng\bar{o}m\bar{a} = 9$

$n'\bar{u}m\bar{u}g\bar{a}b\bar{e} w'\bar{i} R\bar{u}y\bar{u}mb\bar{a} = 9$

(i) $k\bar{t}s\bar{e}s\bar{u}r(a) \text{ } \check{t}mb\check{t}b\check{t} = 9$

[...]

- **Hari amazina y'inka agizwe n'imikarago ifite utubangutso 10**

Urugero: **Inka y'i Nyanza**

Ruti rwuuhira isahaaha
ingabo zihomerera impuunzi
rwaa manywa ya rugemahabi
Inkaburano y'impingaane
Ya rukanikandoongoozi
Irazimena zigakubita
Zigituruka mu kireere.
[...]

- **Hari agizwe n'imikarago y'utubangutso 12**

Urugero : Inka ya Musoni.

Rwiiyamirira yuuhira imbuga
Inkuba zihiindura abanyabihogo
Rwaa Miriindi ya Siimugomwa
Imaana yaremye inyamibwa y'Impeta
Ntiibeho urugiingo uyihinyura
Yamara kuyigira intayoberana.
[...]

Ikitonderwa:

Mu ibara ry'utubangutso, iyo inyajwi ebyiri zikurikiranye,

- Amagambo 2 akurikiranye: irya 2 ritangiwe n'inyajwi, inyajwi isoza irya 1 iburizwamo.
- Inyajwi itangira umukarago ntibarwa.

Akamaro ko kwiga amazina y'inka

Umuntu yakwibaza niba kwiga amazina y'inka ubu hari akamaro bifite. Uwabyibaza ntibyaba ari ugutazira (ugukabya). Birumvikana ko muri ibi bihe ndetse n'ibizaza ntawe uzongera kujya mu byo kwita inka. Ariko kumenya ubuhanga bw'inganzo iyi n'iyi ya kera nta cyo byishe, ndetse ni

byiza. Cyane cyane byagira akamaro mu gihe umuntu yacengera iyo nganzo, hanyuma yamara kumucengeramo na we akaba yafatiraho akayikoresha mu bundi buryo.

Nka Musenyeri Alegisi Kagame yacengeye iyi nganzo y'amazina y'inka, hanyuma aza kuyigenderaho ahimba «**Umuririmbyi wa Nyiribiremwa**» n'«**Indyoheshabirayi**».

Byongeye kandi umuntu ushaka kumenya ubuhanga bw'abahanzi b'i Rwanda ntagere kuri iyi nganzo y'amazina y'inka, ngo arebe ubuhanga bw'itondeke ripimye, yaba atakobwe (ahombye) byinshi. Ubwo buhanga bw'itondeke ripimye bavuga ko ntaho rikunda kuboneka muri Afurika uretse mu Rwanda (Francis Jouannet), Prosodie et Phonologie Non Linéaire, 1985, p.73). Ibyo byaba ari nka bya bindi byo kwambara ikirezi ntumenye ko kera. Mu mazina y'inka harimo ubuhanga buhanitse. Uretse ubwo buhanga bw'itondeke ripimye, usangamo **injyana**, ari iy'isubirajwi, ari iy'isubirajambo; usangamo **ubuhanga bwo gukoresha ijambo ryabugenewe**; usangamo **uburyo bwo gukoresha imibangikanyo**; usangamo **imizimizo** myinshi inyuranye. Usangamo n'icyo abisi ubwabo bita **ingaruzo** (ijambo rishingiza cyangwa se interuro y'amagambo asingiza abami muri rusange cyangwa ingoma, hakaba n'asingiza umwami uyu n'uyu, ibikorwa bye cyangwa amatwara ye).

Uwashaka kumenya imyifatire y'Abanyarwanda bo hambere, agashaka kumenya ibyo babaga bimirije imbere, yabisanga mu mazina y'inka.

Abisi n'ingoma babayeho		
Abisi		Ingoma
1	Nkibiki	Gahindiro
2	Mugaragu	Gahindiro na Rwogera
3	Bwarike bwa Mahanane	Gahindiro na Rwogera
4	Bukambe	Rwogera na Rwabugiri
5	Bikungero bya Murema	Rwogera na Rwabugiri
6	Ndangamira ya Muyobokeye	Rwabugiri
7	Mareba	Rwabugiri
8	Rukazambuga rwa Serupfura	Rwabugiri

9	Rutaneshwa rwa Bikungero	Rwabugiri na Musinga
10	Ndibiyariye	Musinga na Rudahigwa
11	Nyagahungu	Rudahigwa
12	Sebikara Mariko	Rudahigwa

F. IBITEKEREZO BY'INGABO

Ibitekerezo by'ingabo ni ibitekerezo byahimbwaga n'abatekereza b'i bwami bafatiye ku byavuzwe n'abavuzi b'amacumu bakutse ku rugamba. Ibitekerezo by'ingabo bivuga kandi ingabo n'ibitero zagabye. Muri ibyo bitekerezo, hagenda hazamo ibyivugo byazo, ariko si buri gihe. Umwami Kigeri Rwabugiri ari mu bagabye ibitero byinshi.

Umuvuzi w'amacumu yabaga ari umuntu uzimbukiwe kandi uzi kuvuga neza, abandi babaga bahisemo ngo aje kubwira umwami ibyabereye ku rugamba n'ibirari by'ingabo zo mu mutwe we kuva mu igaba kugeza mu ndunduro. Yavugaga abishe, abakomeretse, abagize ubutwari, ariko akirinda kuvuga abahunze n'abagize ubwoba. Yavugaga abatekereza b'i Bwami bamwumva, bakabifata bakazarushaho kubinoza, kuko bari abahanzi b'abanyamwuga, bakazajya babisubiramo mu bitaramo by'i Bwami, nyuma bikazakwira mu bandi. Bene ibyo bitekerezo, icyabitandukanyaga n'ibindi ni uko byavugaga ibyerekeye ibitero kandi kenshi hakabamo n'ibyvugo by'abantu n'iby'ingabo.

Dore kimwe mu bitekerezo by'ingabo:

a. Mutaga ati: “Ziriya ngabo ni izihe?”

Budengeri ati: “Ni Abarasarurinze bakaba intore zawe”

b. Ati: «Ziriya ngabo zindi ni izihe? »

Ati: «Ni Abarasiragushimwa, bakaba intore zawe»

c. Ati: «Ziriya zikurikiyeho ni izihe ni izihe?»

Ati: «Ni inzobe za Karabandaye»

d. Ati: «Ziriya zindi zikurikiyeho se ni izihe?»

Ati: «Ni Imisambi yo ku Ngara»

e. Ati: «Ziriya zindi zikurikiyeho se ni izihe?»

Ati: «Ni Abahiga b'i Mahembe»

f. Ati: «Ziriya zombi zikurikiyeho se ni izihe?»

Ati: «Ni Amatatare y’Urubambyingwe»

g. Ati: «Abakurikiyeho se, bariya bacuze akabunda?»

Ati: «Mbese mwami w’u Burundi, ugiye kwiyoberwa?

abo ni Intalindwa n’Ibenga, intore za Semwiza»

h. Ati: “Uriya Murundi uziri imbere ni nde?”

Ati : “Ni Gitwe cya Nkiramacumu: Semwami aragabye.”

i. Ati: «Umukurikiye uriya ni nde?»

Ati : «Ni Rutembya rwa Nyabiguma, Ijigija ryo mu Ibenga»

j. Ati : «Uriya umukurikiye uriya ni nde?»

Ati: «Ni Rusengo rwa Kanagwa,

Umusunikira ku manga, wa rusunikirizi,

Rucurira ingogo ahatemba,

yitwaza Ikimpaye Ruhanda ikaza!

Incira yo mu migende,

iziciramo ibigondo,

bakazarushya igombora»

k. Ati: «Uriya umukurikiye se ni nde?»

Ati: «Ni Biryabayoboke bya Kanagwa,

Umugabo Sezigama,

uzigama incuro nk’incuti,

akicira mu bwerangabo bwa Murama,

agafata mpiri y’umwami»

l. Ati: «Uriya se umukurikiye ni nde?»

Ati: «Ni Fumbije rya Birambo:

Rubwiliza ingorore,

Imbanzamihiho zikubana,

Mu Nkorwa kwa Gakoro»

m. Ati: «Uriya se umukurikiye ni nde?»

Ati: «Ni Rwishyura rwa Mihigo:

Ntiyishyura ingoma y’umwami ibirago,

nka Ndahagaze i Mugongo»

n. Ati: «Uriya se umukurikiye ni nde?»

Ati: «Ni Sentama ya Ndimurwango:

Rububuta yambuye umugore umugabo,

amugomeza umugezi wa Nyange,

amugira mushishi wari kweyera »

o. Ati: «Uriya se umukurikiye ni nde?»

Ati: «Ni Kagere ka Ndongozi,

Umurundi wa Mwezi».

p. Ati: «Uriya se umukurikiye ni nde?»

Ati: «Ni Kabuye ka Rubambana, ku Musasa,

Umurundi wa Ntare».

q. Ati: «Uriya se umukurikiye ni nde?»

Ati: «Ni Kanyinya ka Rukiliza,

Umunyankiko wimiriye i Buha»

r. Ati: «uriya se umukurikiye ni nde?»

Ati: «Ni Rutamu rwa Ngambwa,

Nyamutera mu kico,

ubukombe bukagwa».

s. Biyereka batyo ingabo za Mutaga,

Semwiza, Inyarubuga,

Urukebetse, Uruziranenge,

Intambwe iroha, Intalindwa n'Ibenga zigatabara:

Nyamuribora ay'ingondo,

Naho abatindi bimaza ingongo.

G. INDIRIMBO Z'INGABO

Indirimbo z'ingabo, kimwe n'ibyvugwa, na zo zarataga ingabo hagamijwe gutuma zihorana ijabo mu guhiganwa ku rugamba no mu nkera z'imihigo. Ibwami habaga hari abacuranzi bakomeye babikiraga umwami. Abari bashinzwe kwigisha indirimbo z'ingabo bitwaga **ibikore**. Ibikore bikomoka kuri Kanyankore Kanyoni Baziga Kirima Rujugira.

Mu bitaramo by'ingabo kandi bajyaga bidagadura bakaririmba, bagacuranga inanga, bakavuga imitoma cyangwa bagatera n'urwenya.

1.2. Gusesengura ubuvanganzo gakondo nyabami

1.2.1. Uturango tw'ubuvanganzo gakondo nyabami

✓ Uturango tw'ibisigo

- Byandikwa mu buryo bw'imikarago.
- Uturango tw'ikeshamvugo: Imizimizo, isubirajwi, isubirajambo, isubirantondeke, iyitirira,....
- Igisigo nyabami gikoresha amagambo afubitse kandi anogeye amatwi.
- Interuro y'igisigo nyabami igirwa n'amagambo akunze kwihwanya n'izina ryacyo.
- Ibisigo nyabami bigira indezi: Amagambo asingiza umwami n'ingoma.
- Imvugo ihanitse itagikoreshe ubu yitwa urunyakirima.
- Kivuga ku buzima bw'abami n'ingoma zabo.

✓ Uturango tw'ibyivugo

- Kuba birebire
- Kuvuga ibyerekeranye n'ubutwari bw'ingabo ku rugamba
- Kuba bikubiyemo ibigwi n'ibirindiro.
- Mu turango tw'ikeshamvugo hagaragaramo ikabya, insobeke, ihuza nyito n'imizimizo.

✓ Uturango tw'amazina y'inka

- Yanditse mu buryo bw'imikarago;
- Usangamo injyana (ipimye);
- Ikeshamvugo: isubirajwi, isubirajambo;
- Ubuhanga bwo gukoresha ijambo ryabugenewe;
- Gukoresha imibangikanyo;
- Imizimizo myinshi inyuranye.

- icyo abisi ubwabo bita ingaruzo (ijambo risingiza cyangwa se amagambo asingiza abami muri rusange cyangwa ingoma ya cyami).

✓ **Uturango tw'ubwiru**

- Bugizwe n'inzira 18
- Amabanga y'ibyakorerwaga ibwami: iyimikwa n'itabarizwa ry'abami

✓ **Uturango tw'ubucurabwenge**

- Umuvugo uvuga ibisekuru by'abami n'abagabekazi
- Kwandikwa mu bika
- Kuvuga amateka y'abami n'ingoma

✓ **Uturango tw'ibitekerezo by'ingabo**

- Kuvuga ingabo n'ibitero zagabye
- Kuvuga ubutwari bw'ingabo n'intwari zazo

✓ **Uturango tw'indirimo z'ingabo**

- Kunogera amatwi
- Gutera ingabo akanyabugabo
- Kurata ubutwari bw'ingabo n'intwari zazo
- Rimwe na rimwe zabaga ziherekejwe n'ibicurangisho bya gakondo nk'inanga n'ibindi.

1.2.2. Insanganyamatsiko ziri mu buvanganzo gakondo nyabami

✓ **Ingingo z'umuco mu buvanganzo gakondo nyabami**

Ingingo y'umuco ni ingingo iba igaragara mu gihangano cg mu ngeri y'ubuvanganzo runaka, igaragaza imigenzereze cg imyifatire yumvikanyweho yarangaga abantu bagize agace cg igihugu mu gihe runaka.

Urugero:

Zimwe mu ngingo z'umuco dusanga mu buvanganzo gakondo nyabami, twavugaga nko:

- Kubaha umwami n'ingoma n'abatware
- Iyo imyaka yabaga yeze abaturage bajya kuganuzza umwami ku byo bejeje
- Abagore n'abakobwa ntibajyaga ku rugamba
- U Rwanda rwatwaga, ntirwaga
- Inka z'inyamba zari zifite agaciro gakomeye cyane ku buryo zakoreshezwaga no mu birori n'imihango binyuranye
- Abanyarwanda baganaga ibihe by'umunsi bashingiye ku bikorwa by'inka
- Mu bitaramo binyuranye by'ibwami, hakoreshezwaga ibitekerezo by'ingabo, ibyivugo by'ingabo, indirimbo z'ingabo, ...

✓ **Ingingo z'amateka mu buvanganze gakondo nyabami**

Ingingo y'amateka ni ingingo iba igaragara mu gihangano cy'ubwami by'ubwami runaka, igaragaza amateka azwi avugwa muri icyo gihangano cyane cyane ahanze ibyabaye ku ngoma, ubutegetsi, mu igenekerezo ry'igihe kizwi. Bikamenyekana bigahererekanywa na n'ubu bikaba bizwi n'abatuye agace cy'igihugu runaka.

Urugero:

Zimwe mu ingingo z'amateka dusanga mu buvanganze nyabami:

- Bimwe mu bitero by'ingabo z'u Rwanda rwo hambere
- Iyimirwa ry'abami b'u Rwanda
- Imitegekere y'abami b'u Rwanda
- Ibikorwa by'abagabekazi
- Abatware babaye ibirangiririre
- Ibihe bigiye bitandukanye byagiye bisimburana mu gihe cyahise, ...
- Uburyo rubanda rwubahaga umwami n'ingoma

- Iyo imyaka yabaga yeze abaturage bajya kuganuka umwami ku byo bejeje
- Abagore n'abakobwa ntibajyaga ku rugamba
- U Rwanda rwatemberaga, ntirwamwaga
- Inka z'inyamba zari zifite agaciro gakomeye cyane ku buryo zakoreshezwaga no mu birori n'imihango binyuranye
- Abanyarwanda baganaga ibihe by'umunsi bashingiye ku bikorwa by'inka
- Mu bitaramo binyuranye by'ibwami, hakoreshezwaga ibitekerezo by'ingabo, ibyivugo by'ingabo, indirimbo z'ingabo, ...

1.2.3. Isanisha ry'ubuvanganzo gakondo nyabami n'imibereho y'uyu munsi

✓ **Mu muco nyarwanda**

Mu buhanzi

- Nk'uko mu Rwanda rwo hambere, habagaho abahanzi b'ibihangano byiza binyuranye, n'ubu babaho
- Bimwe mu bihangano byo hambere nk'ibisigo ubu kubisobanukirwa si ibya buri wese kubera amwe mu magambo y'amanyakirima (ya kera atagikoreshwa) yabikoreshwagamo.
- Zimwe mu ngeri z'ubuvanganzo gakondo nyabami zigenda zikendera (zitagikoreshwa ubu), cyane cyane iziyanye n'umwami n'ingoma: Ibisigo nyabami, ubwiru, ubucurabwenge.

Mu myemerere

Aho haziyeye idini rishya rya gikirisitu na kisiramu, hari bimwe mu byakorwaga mu buvanganzo gakondo nyabami byagiye bikendera kubera gufatwa nk'imihango ya gipagani. Urugero ni imihango yakorwaga mu bwiru n'ubucurabwenge.

Mu bugêni

Iyo witegereje ubugeni bwo muri iyi minsi ubona butagifite ingufu cyane kuko aho amashuri aziye, iby'ubugeni byagiye bikendera.

✓ **Mu bukungu**

- Mu Rwanda rwo hambere, inka ni yo yari ikimenyetso cy'ubukungu, ariko ubu ifaranga ni ryo ryayisimbuye.

✓ **Muri politiki**

- U Rwanda rwahozwe rutegekwa n'umwami afashijwe n'abatware ariko ubu ruyobowe na Perezida wa Repubulika afatanyije n'abaminisitiri.
- Kera hariho ubwiru ariko ubu Igihugu kiyoborwa hagendewe ku itegekonshinga n'andi mategeko arishamikiyeho.
- Kera, umwami ni we wakemuraga ibibazo by'abaturage ku buryo budasubirwaho ariko ubu hashyizweho inzego nyinshi z'ubuyobozi zikemura ibibazo by'abaturage. Aha twavugaga n'inzego z'ibanze z'ubuyobozi, abunzi, inkiko, urwego rw'umuvunyi n'izindi.

1.3. Gukoresha ubuvanganzo gakondo nyabami

1.3.1. Ingeri z'ubuvanganzo gakondo nyabami

- ✓ Ibisigo nyabami
- ✓ Amazina y'inka
- ✓ Ibyivugo by'ingabo
- ✓ Ubwiru
- ✓ Ubucurabwenge
- ✓ Ibitekerezo by'ingabo
- ✓ Indirimbo z'ingabo

• Ikeshamvugo mu buvanganzo gakondo nyabami

1. Inshoza y'ikeshamvugo

Ikeshamvugo ni ubuhanga bukoresha imvugo inoze, yuje ikinyabupfura, ifite inganzo kandi ivugitse ku buryo bunoze. Ikeshamvugo rero ahanini rikoresheye mu guha agaciro umuntu uyu n'uyu cyangwa ikintu iki n'iki bitewe n'akamaro gifite mu muco w'Abanyarwanda, bityo hakirindwa gukoresha izina ryacyo mu buryo bukocamye. Mu ikeshamvugo ni ho hakoresheye ijamba "Ntibavuga, bavuga".

2. Ikeshamvugo rijyanye n'umwami n'ingoma

a) Ikeshamvugo rikoresheye ku mwami

Ntibavuga	Bavuga
------------------	---------------

Kujya ku ngoma	Kwima
Kurongora k'umwami	Gutarama
Umugore w'umwami	Umwamikazi
Umwana w'umwami	Igikomangoma
Nyina w'umwami	Umugabekazi
Inzu y'umwami	Ingoro
Inzu nkuru umwami araramo	Kambere
Kuryama k'umwami	Kwibambika
Kubyuka k'umwami	Kwibambura
Kurya k'umwami	Kurora
Kujya mu bwiherero	Gutwikira ibirenge
Umwambaro wa cyami batamirizaga	Ikamba, igisingo
Gutembera/kugenda k'umwami	Kurambagira
Gupfa k'umwami	Gutanga
Umurambo w'umwami	Umugogo
Gushyingura umwami	Kumutabariza
Imva y'umwami	Umusezero
Kwicara k'umwami	Guteka
Intebe y'umwami	Inteko
Uburiri	Igisasiro
Aho aramirizwa	Ijabiro
Kumuha ikuzo	Kumuramya
Aho umwami yabonaniraga n'abaturage	Ku karubanda
Gutanga itegeko	Guca iteka
Ingobyi bahekagamo umwami	Ikitabashwa

b) Ikeshamvugo rishingiye ku ngoma

Ntibavuga	Bavuga
------------------	---------------

Gutangira kuvuga	Gusuka
Kurangiza kuvuga	Gutunga
Kugurwa	Gukoshwa
Kumanikwa	Kujishwa
Gushyushywa	Koswa
Gufashwa hasi	Kururutsa
Kubazwa	Kuramvurwa
Gushyirwaho impu	Kuremwa
Kwikorerwa	Kuremerwa
Gusaza	Gutaha
Gutoboka	Kubyara
Gusaduka	Kurara (rivugwa nk'umugabo)
Gufatwa	Gusegurwa
Kumeneka	Kuribora

3. Ikeshamvugo rijyanye n'inka n'amata

a) Ikeshamvugo rishingiye ku nka

Ntibavuga	Bavuga
Gushira inyuma	Guhumuza inyuma
Kurangiza gukama	Guhumuza
Kurangiza gushitura	Guhaza
Kurorera gukamwa	Guteka
Gusuhuka	Kugisha
Gukamana ingoga/vuba	Gukama kera
Gukomeretsanya kwazo	Gusarika
Gukamwa make	Gukamwa menshi
Kubuza inyana konka	Kuyiramura/kuyimira

Guca umurizo	Kogosha
Itagira amahembe	Inkungu
Gukurura babyaza	Kuvutira
Gukamisha yombi	Kuvuruganya
Kurekura inyana ngo yonke	Kwinikiza
Kuba ku nda kwazo	Kwerera
Kuzijyana, kuzishorera	Kuzirongora
Umushumba zasize	Yasomeyehe, zarengeyehe
Kwiruka zigusiga	Gutana
Guhanagura inka	Kuzihonora
Guta umuziha kwazo	Gufuma
Kwenda kwima zitararinda	Kuba mu bitwarize
Kuzivomera	Kuzidahira
Kuzishyira imfizi	Kuzibangurira, kuvuna umurizo
Kubura amazi kwazo	Kurumanga
Guca inka ibere	Kuryogosha
Kurwara ibisebe ku mabere	Kurwara ibisare
Ibihamagaro byazo	Amazina yazo
Uzitegeka	Umutahira
Guhatira inka ngo yonse iyayo	Gutsindira
Kunanirwa kubyara kw'inka	Gukika
Uzirabira	Umushumba, umufatankoni
Umushumba utazi undi mwuga	Rwoga
Ukuka amase	Umurenzamase
Isaso yazo	Icyarire
Amaboko y'inka mu ibyara	Inkoni
Inzu y'inyana	Uruhongore

Utubere tw'inyongera tudakamwa	Indorerezi
Idafite impakamano	Inyamuno
Agahu irigata yapfushije	Akaraga
Aho zinywera ku mugezi	Umwaro
Umugezi zafukuriwe	Ikibumbiro
Ibizihanagura	Inkuyo
Inyana ntizisubira ku gasozi	Zisubizwa iswa
Inka ipfushije iyayo	Isuri
Aho umuriro wazo uri	Igicaniro
Kwatsa igicaniro	Gukangura igicaniro
Igicaniro ntikizima	Kirasinzira
Gupfa kw'imfizi	Gusinzira
Inka umukobwa ahabwa n'umubyeyi we ku mwana we wese	Inka y'icyari
Konka itari nyina	Kugoba
Kurangiza kunywa kwazo	Gukuka
Gusigwa amase ku mabere banga ko zonka	Guhoreza
Kwishyura wemeza ko uwakugwatirije akukana ingwate	Gukoma ihembe
Inyana yishyurwa uwagwatirije	Umukangara
Igumbaha ikagumbahuka	Ingumba
Igumbaha igaheranwa	Inshura
Iziba kwa nyirazo	Intarama,intahira
Izijyana na nyirazo ku macumbi	Ingishywa, inyarurembo
Inyana yatinze kwima	Urubereri
Inyana itima rwose	Isave
Kugabana inka ya mbere	Gucyura ubuhake
Kugabana ubwa kabiri	Guhetwa impetano
Izikamirwa shobuja zizagaruka	Inkuke

Umushumba w'inka ntarya	Aranywa
Inyana ikivuka	Umutavu
Uduse tw'umutavu	Uduswe
Kwica akamasa k'inka bashaka gutsindira inyana	Kugakubita
Inka umuntu yihahiye	Imbata
Inka y'ubutwari	Inka y'umuheto
Inka itarapfusha	Inka y'isugi
Inka ucibwa kubera wahunze urugamba	Inka y'imirindi
Inka umubyeyi asigaranye amaze kuraga abana be	Ingarigari
Inka ikomoka ku yo wakoye	Indongoranyo
Inka umukobwa ahabwa n'iwabo yajyanye urugori rwa mbere	Inka y'urugori
Umuriro wazo wirukana isazi	Igicaniro

b) Ikeshamvugo rishingiye ku mata

Ntibavuga	Bavuga
Amazi asohoka mu moko mbere y'uko inka ibyara	Inkanya
Amata bagikama	Inshyushyu
Kuyasuka mu gisabo	Kuyabuganiza
Kuyavanamo amavuta	Kwavura/gusobanura
Kûubika icyansi, igisabo	Kukiranga
Kurangiza koza icyansi	Guhumuza
Kumena amata ubishaka	Kuyabikira, kuyabyarira
Kuyamena agucitse	Kuyabogora
Uduta	Amata
Amata y'inka ikibyara	Umuhondo
Amata y'inka yenda guteka	Amagonera, amasuga, amanga
Amata y'inyana yanze konka	Amakaba

Amata y'inka yimye	Amasitu
Ayaraye ataravura	Umubanja
Ayiriwe ataravura	Amirire
Amaze kuvura	Ikivuguto
Ay'abashumba	Imyezo
Ay'ikivuguto kitavuruze	Amenda
Agati bavurugisha	Umutozo
Umuheha banywesha amata	Umuceri
Ay'inka yapfushije	Ubusuri
Amata ava mu koza igisabo cg mu mavuta	Umujago
Amata avanze n'amazi	Umwera
Ayo ikamwe bwa kabiri	Amarindira

4. Ikeshamvugo rijyanye n'ibikoresho byiganza mu buvanganzo gakondo nyabami nk'igisabo, icyansi, ingobyi n'ibindi

a) Ikeshamvugo rishingiye ku gisabo, icyansi, ingobyi, isekuru, umuheto n'injishi

Ntibavuga	Bavuga
Ntibimanikwa	Birajishwa
Ntibirurwa	Birururutsa
Ntibimeswa	Birahanagurwa
Ntibisaza	Birakura
Ntibyikorera	Biraremerwa
Ntibishyushywa	Biroswa
Ntibigurwa	Birakoshwa
Ntibimeneka	Biraribora
Ntibibazwa	Biraramvurwa
Kubika igisabo	Kukiranga

Kurangiza kucyoza	Guhumuza
Umupfundikizo w'igisabo	Inzindaro
Umupfundikizo w'icyansi	Umutemeri
Utubuye bahonda bakadukoresha boza icyansi/igisabo	Imonyi

- **Ibitaramo bishingiye ku buvanganzo gakondo nyabami**

Igitaramo ni urubuga abantu runaka bafite icyo bahuriyeho baturiramo bafite intego yo kugaragaza ibyo bifuzwa kuzageraho, ibyo bagezeho, bashima muri bo ababaye intwari cyangwa bakagaya ibigwari. Igitaramo kandi ni urubuga rw'imirerere aho abato batowazwa kumenya imiryango yabo, isano, imico y'umuryango inshuti n'ikizira bigatowazwa mu gitaramo cyo kurera no kwimakaza urukundo mu bantu no kumenya imiryango no kuyigiramo akamaro, bigakorwa kandi bishimye kubera ibyiza byibukwa.

Gutarama wari umuco nyarwanda wari ukubiyemo byinshi kuko ni ho abakuye n'abakiri bato baganiriraga bagahabwa impanuro zijyanye n'imigenzereze myiza ishimwa n'abandi yarangaga abakurambere babo igashingirwaho kugira ngo igihugu kibashe kubaho mu mahoro, kugira icyubahiro, ishema n'igitinyiro kuko babaga barimakaje indangagaciro na kirazira zishingiye ku gukunda igihugu n'abagituye, kugira ubutwari, gukunda umurimo, ubwitange n'ubumwe.

✓ **Igitaramo k'imihigo**

Imihigo ni uburyo bukoreshwa mu muco nyarwanda wo kumenyekanisha ibyo uteganya kuzakora mu gihe runaka, uburyo uzabigeraho n'ibyo uzifashisha kugira ngo ubigereho. Imihigo ni igenamigambi wiha rigufasha kwiyemeza kuzagera ku byo uteganiye. Imihigo ikorwa n'uzayesa, akayikorera imbere y'uzamugenzura kugira ngo yemeze ko yayigezeho n'uburyo yayigezeho.

Igitaramo k'imihigo banakita **inkera y'imihigo**. Ni umuhango abahize gukora igikorwa bahigura ibyo bakoze n'uko babikoze kugira ngo batsinde. Muri iki gitaramo ingabo zamurikaga imihigo y'ubutumwa zahawe; basuzumira hamwe ibyagenze neza, ibitaragenze neza n'impamvu zabiteye hakomezwa n'ingamba zikwiye gufatwa muri gahunda iri imbere. Aho ni ho batangiraga amashimwe anyuranye: gushimwa mu ruhame, impeta cyangwa umudari w'ishimwe, uruti n'umurinzi... icyo gihe babyitaga kumurika imihigo, bigategurwa kuko

cyabaga ari igikorwa gisoza (kwiyeraka Abayobozi babatumye). Muri icyo gihe inzoga y'imihigo ikanyobwaho n'uwahize abandi. **Intore zitoranyamo abashinzwe ibi bikurikira:**

- a. Gushoza igitaramo,
- b. Kwinikiza igitaramo indirimbo y'inshotora abataramye ngo bavuge ibigwi n'imihigo byabo,
- c. Gutereka inzoga y'imihigo ihabwa uwivuze neza kurusha abandi,
- d. Userukira abandi mu kuvuga ibigwi no kumenyesha ibyo zahigiye kuzageraho,
- e. Igihe cyo kumurika imihigo, Intore zose zirangwa no kuba zikeye kandi zitavunda cyangwa ngo zisahinde.

✓ **Igitaramo nyizihizangoma**

Ni urubuga rwabaga rugenewe rubanda ngo bakeze umwami kubera ibyiza bamukeshya. Rubanda rwafataga umwanya rugataramira umwami mu bihangano binyuranye birimo ibisigo, indirimbo n'imbyino, ibitekerezo, n'ibindi.

✓ **Igitaramo cy'uburerê mboneragihugu**

Ni urubuga rwatoretzwagamo imigenzereze myiza n'imico y'uburere bw'umuryango uyu n'uyu, ibisekuru by'umuryango, isano y'abasangiye umuryango n'ibyo bazira, inshuti n'amaboko umuryango ufite. Igitaramo cy'uburere mboneragihugu kandi cyatozaga abantu kumenya kuvuga neza mu ruhame, kumenya kuganira no guhana ijamba, ikinyabupfura no kurwanira ishyamba umuryango no guharanira ishema ryawo. Iki gitaramo kandi cyari urubuga rwo kugayiramo ibigwari n'abanyamico mibi basebya umuryango runaka binyujijwe mu migani migufi n'imiremire, ibyivugo, ibisigo, ibisakuzo, imbyino, indirimbo, imisango, amahamba... byose bigamije gutoza, kumenya imico y'umuryango n'inshuti zawo n'ibyo uzira; kuko baca umugani ngo 'Utaganiriye na se ntamenya icyo sekuru yasize avuze'.

✓ **Igitaramo cy'Umuryango**

Ni igitaramo cyakorwaga mu rugo kigahuza ababyeyi n'abana babo ku mugoroba bakitse imirimo. Abagize umuryango baturiraga hamwe abakuru bagaca imigani, bagasakaza, bakaririmba n'ibindi abana bateze amatwi. Muri bene iki gitaramo ni ho bigishirizaga abana gutarama no kuvuga neza badategwa. Aha ni ho kandi ababyeyi batorezagaga abana babo

ingangagaciro na kirazira by’umucyo nyarwanda. Bene iki gitaramo cyarindaga abana ubuzererezi no kuja mu ngeso mbi kuko iyo babaga bateraniye hamwe n’ababyeyi babo barabahanaga bakanabahanura.

✓ **Igitaramo cy’Umuganura**

Ni umuhango wabagaho mu gihe cy’umwero w’imyaka cyane mu mpeshyi aho abana bagize umuryango bazanira umubyeyi wabo ibiribwa n’ibinyobwa bikomoka ku musaruro wa mbere bagasangira basabana, bishimira umusaruro bagezeho kandi baja ingamba z’igihe gikurikira. Muri icyo gitaramo kandi habamo igikorwa cyo guhiga kuko hari abazana ibyiza cyangwa biryoshye kurushya abandi. Bwari uburyo bwo gusuzuma intambwe umuryango wateye mu bukungu.

IMBUMBE YA 2: GUKORESHA IKINYARWANDA KIBONEYE MU GUTOZA ABANDI KUGENDANA N’IKEREKEZO K’IGIHUGU

Umusaruro w’inyigisho:

Nyuma y’iyi nyigisho, umunyeshuri azaba ashobora:

- Gusobanura ubugeni bwo gutoza
- Kugaragaza insanganyamatsiko zatozwaho
- Gukoresha ikibonezamvugo mu mitoreze

2.1. Gusobanura ubugêni bwo gutoza

2.1.1. Inshoza yo gutoza

A. Igisobanuro cyo gutoza

Gutoza ni ugufasha abatozwa kugera ku myumvire, imyitwarire, imikorere, imibereho n’imibanire n’abandi birangwa n’indangagaciro z’umuco nyarwanda.

B. Ibisobanuro by’amagambo akoreshwa mu gutoza intore

 **Umutoza**

Umutoza ni umuntu ufite ubushobozi n'inshingano byo gutoza abandi umuco w'ubutore, ubumenyi bwihariye, ubunararibonye cyangwa ibikorwa by'indashyikirwa yagezeho.

Intore

Ni umuntu wese watorejwe mu Itorero ry'Igihugu cyangwa umuntu wese urangwa n'indangagaciro z'umuco nyarwanda kandi ukora ibikorwa by'ubutore bigamije iterambere ry'igihugu ke.

Itorero

Ni urubuga rutorezwamo Abanyarwanda kugira imyumvire, imikorere ishingiyeye ku ndangagaciro na kirazira z'umuco nyarwanda basangiye mu mibanire yabo, batorezwamo gukunda Igihugu no kugiteza imbere n'amahame agenga intore. Hakaba hari Itorero ku Mudugudu, Itorero mu Mashuri, Itorero ku Rugerero n'Itorero mu nzego z'Imirimo.

Inyoborabatoza

Ni inyandiko yerekana, muri rusange, imitoreze y'intore hashingiye ku ngingo nkuru z'ibiganiro, uburyo bwo gutoza, aho gutoreza, ibyiciro bitozwa n'uburyo bw'isuzuma ry'ibyagezweho.

Indangagaciro

Ni imyumvire, imitekerereze, imyifatire n'imigirire iranga abenegihugu runaka bemera kandi barata, bibahesha agaciro, bifuza ko byahora bibaranga bikanabitirirwa uko ibihe bisimburana, bityo bikaba amahame y'uburere atozwa abenegihugu bose.

Kirazira

Bavuga ko ikintu kizira iyo gitandukanye n'imigenzereze myiza y'umuryango w'abantu muri rusange. Kirazira rero igomba kumvikana nk'imyitwarire iyo ari yo yose inyuranyije n'amahame shingiro abantu bagenderaho kugira ngo babane neza kandi bafatanye kubaka Igihugu. Umuntu wese uziririza yihesha agaciro mu muryango w'abantu abana na bo.

Umuziro ni ikintu cyaciwe n'umuco w'Igihugu kandi gishobora kugirira ingaruka mbi umuntu ukirenzeho.

C. Intego nyamukuru y'Itorero

Intego nkuru y’Itorero ni ukubaka Umunyarwanda ukunda Igihugu, ufite indangagaciro na kirazira z’umuco Nyarwanda kandi ufite umuco w’ubutore.

Intego yo gutoza: gutoza intore bikorwa hagamijwe gutoza Abanyarwanda ibi bikurikira:

- Kugira imyumvire ishingiyeye ku ndangagaciro na kirazira basangiye mu mibanire yabo.
- Gukunda Igihugu no kugiteza imbere.
- Kumenya no gusobanukirwa imigambi Y’igihugu n’uburyo bwo kuyigeraho.
- Kwigirira ikizere cyo kwikemurira ibibazo no kwihesha agaciro.
- Kuba intore zibereye Igihugu zigaragara mu byiciro byose kandi zikaba umusemburo w’impinduka nziza.
- Kugira umuco w’ubwitange mu gukorera Igihugu.

2.1.2. Uburyo bwo gutoza

✓ Ikurikizwa ry’urwego, ibyiciro n’ingingo nkuru z’ibiganiro

Gutoza ukurikije urwego, ibyiciro n’ingingo nkuru z’ibiganiro

URWEGO-IBYICIRO INGINGO NKURU Z’IBIGANIRO	UMUDU- GUDU	AMASHURI	URUGERERO	INZEGO Z’IMIRIMO	ABATOZA
UBUNYARWANDA					
GUKUNDA IGIHUGU					
UBUTWARI					
UBUNYANGAMUGAYO					
UBWITANGE					
GUKUNDA UMURIMO NO KUWUNOZA					
KWIHESHA AGACIRO					

Muri buri rwego rutorezwamo hazirikanwa ibi bikurikira:

- Intego n’ikigamijwe

- Imyaka y’abatozwa n’ikiciro barimo (abana, urubyiruko, abakuze, ababana n’ubumuga, abahuje umurimo...)
- Aho batorezwa

✓ **Ikurikizwa ry’umurongo ngenderwaho**

Gutoza ukurikije umurongo ngenderwaho (approach):

- Gutoza intambwe ku yindi (progressive Approach)
- Kuzirikana uruhare rw’abatozwa (participatory approach)
- Kuzirikana ubundi bumenyi bw’abatozwa (Integrative approach)
- Kuzirikana ko gutoza indangagaciro ari igikorwa gihoraho (continuous approach)

✓ **Itoranywa ry’ibikorwa byo gutorezamo**

Itoranywa ry’ibikorwa byo gutoreza mu itorero runaka, bigendera ku mirongo migari Igihugu cyubakiyeho, gahunda zihutirwa kurusha izindi, ikiciro cy’abatozwa n’ikigamijwe muri iryo torero.

Urugero rw’ibikorwa bishobora gutorezwa mu itorero:

- Indangagaciro na kirazira by’Umuco nyarwanda;
- Umurimo unoze;
- Kubaka no gukomeza ibyagezweho;
- Umuco wo guhanga ibishya;
- Gutozwa kumenya no gukunda u Rwanda;
- Kugira isuku;
- Imibanire y’Abanyarwanda;
- Gahunda ya “Ndi Umunyarwanda”;
- Umuco wo kwizigamira no kwiteza imbere;
- Izindi gahunda z’Igihugu nka: “Ejo Heza”, “Ubwisungane mu kwivuza”, guhanga udushya, “Ikerekezo 2050”, “Umuganda” n’izindi.

2.1.3. Uburyo bwo gusuzuma imitoreze

a) Isuzuma rya mbere yo gutoza

Igikorwa cyo gutoza kigomba kubanzirizwa n’isuzuma rigamije kumenya uko umutozwa ahagaze mu bintu bikurikira:

- | | |
|---|--|
| - Ubumenyi bw’indangagaciro na kirazira | - Ibijyanye n’ubuzima n’ingufu z’umubiri |
| - Ubumenyi ku kerekezo cy’Igihugu | - Ubumenyi ku mitaramire y’intore. |

b) Isuzuma ryo mu gihe cyo gutoza

Isuzuma ryo mu gihe cyo gutoza ryita kuri ibi bikurikira:

- Gusuzuma mu buryo bwimbitse uko intore yumva ikanasobanura ibyo itozwamo;
- Uko imyumvire y'indangagaciro ayigaragariza mu mikoro ngiro no mu bihangano by'igitaramo cy'intore;
- Gusuzuma ubumenyi bw'utozwa bwo kubasha gutoza abandi;
- Gusuzuma impano zihariye za buri ntore;
- Gusuzuma ingeso n'imico byihariye bya buri ntore.

c) Isuzuma rya nyuma yo gutoza

Nyuma yo gutoza hasuzumwa uko imitoreze yagenze, icyo abatozwa babivugaho n'inama batanga.

Ibi byose bijyanye n'isuzuma bishyirwa muri raporo y'imitoreze, gutozwa bikirangira, bigashyikirizwa Komisiyo y'Igihugu y'Itorero.

2.2. Kugaragaza insanganyamatsiko zatozwaho

2.2.1. Gahunda ya “Ndi Umunyarwanda”

✓ Igisobanuro cya “Ndi Umunyarwanda”

“Ndi Umunyarwanda” ni ukwiyumvamo isano ihuza Abanyarwanda batewe ishema no kuba Abanyarwanda bahuriye ku gukunda u Rwanda, kururinda no kuruteza imbere.

“Ndi Umunyarwanda” ikubiyemo **ingingo eshatu z'ingenzi**: kwiyumvamo ubunyarwanda (Rwandan spirit), indangagaciro na kirazira bigamije kwimakaza ubunyarwanda.

Kwiyumvamo ubunyarwanda ni ukwemera kuba uw'u Rwanda, rukaba urwawe, ukarubamo na rwo rukubayeye, ukarutura, ukarukunda, rukakurera kibyeyi, ukamenya kururinda, byaba ngombwa ukaba wanarwitangira; iyo sano ikaba igihango kizira gutatirwa ubuziraherezo.

✓ Indangagaciro z'ubunyarwanda

Zimwe mu ndangagaciro z'ubunyarwanda ni izi zikurikira:

a) Gukunda u Rwanda n'Abanyarwanda no guhora iteka uzirikana kuzaraga ababyiruka Igihugu kiza: Ukunda iwabo ahazirikana iteka, akaharinda icyago, akahagwiza

ibyiza. Ingobyi iduhetse ni iy'agaciro, turayishinzwe. “Aho ujishe igisabo ntuhatera ibuye.” Byongeye kandi, nta waraga abana be ibyamunaniye. Ni yo mpamvu gutunganya Igihugu no kubaka ejo hazaza hazira amacakubiri ari inshingano kuri buri Munyarwanda.

b) Kuba inyangamugayo irangwa n'ukuri, ubworoherane, kwicisha bugufi, gutega amatwi, gutabara no gutabarana. Ibi ni byo bituma ukwizerana gushoboka.

c) Kugira umuco wo kuganira no gusesengura mu gukemura ibibazo: “Ndi Umunyarwanda” idusaba guhora dushaka ukuri ariko tukabikorana ubworoherane nta guhutaza, tukemera aho twagize intege nke tukabisabira imbabazi tugamiye kujya imbere.

d) Guharanira icyateza imbere u Rwanda n'Abanyarwanda: Ni ngombwa ko buri Munyarwanda agira uruhare mu bikorwa bigamiye guteza Igihugu imbere bikaba umuco ku buryo buri Munyarwanda abyibonamo kandi bikaba ishema kubigiramo uruhare.

✓ **Kirazira muri gahunda ya “Ndi Umunyarwanda”**

a) Kirazira gusumbisha inyungu bwite inyungu rusange, bikaba ari na byo bituma bamwe bashobora gusenya ibyubatswe ku kiguzi gikomeye byasabye Abanyarwanda;

b) Kirazira kuba ibikoreshe by'imigambi mibi ku Rwanda n'abarwo;

c) Kirazira kugira ingengabitekerezo ya jenocide n'amacakubiri, urwango, inzika... no kubitoza abana tubyara kuko bibabera umutwaro uremereye w'ibyo batagizemo uruhare.

2.2.2. Imiyoborere myiza

a) Igisobanuro k'imiyoborere myiza

Ijambo **imiyoborere** rikomoka ku nshinga kuyobora, bisobanura guha abantu ikerekezo banyuramo. Imiyoborere bivuga uburyo bwo kuyobora abantu. Iyo bavuze **imiyoborere myiza** baba bashakira kuvuga imiyoborere ishingaye kuri demokarasi no gukorera mu mucyo. Ni igihe ubuyobozi bushyirwaho n'abaturage, bugakorera abaturage kandi na bo bakagira uruhare mu bibakorerwa.

b) Amahame y'imiyoborere myiza

- Kwimakaza imiyoborere n'imitangire myiza ya serivisi;

- Gushyira imbere umuturage mu bikorwa byose bimukorerwa kandi agiramo uruhare nk'umugenerwabikorwa;
- Kurangwa n'ubushishozi n'ubunararibonye mu kuzuza inshingano;
- Guteza imbere ubumwe n'ubwiyunge mu bayoborwa;
- Kwimakaza umuco wo guhanga udushya mu mikorere no mu miyoborere;
- Gukorera muri demokarasi, mu mucyo, kujya no kugisha inama mu mikorere;
- Gukorera ku ntego kandi ku gihe;
- Kurangwa n'ubudakemwa n'ubuziranenge mu mikorere;
- Kurangwa n'indangagaciro zitandukanye zirimo: ukuri, ubutabera n'ubunyangamugayo;
- Kutarutisha inyungu bwite inyungu rusange;
- Gukora ibintu bizaramba no guteganyiriza ejo hazaza.

c) Umusaruro w'imiyoborere myiza

Imiyoborere myiza ituma igihugu kigira ubuyobozi buhamye kandi bufitiwe ikizere n'abayoborwa. Ikindi kandi, iyo abaturage bayobowe neza, bafatanya n'ubuyobozi mu gutegura no gushyira mu bikorwa igenamigambi riganisha ku iterambere ryifuzwa, bityo igihugu kigatera imbere.

2.2.3. Gahunda yo kwigira

✓ Igisobanuro cyo kwigira

Kwigira bisobanura kwihaza mu byo ukenera mu mibereho ya buri muni. Ni gahunda igendana ko kwishakamo ibisubizo hagati y'abagize umuryango/igihugu. Kwigira ni imyumvire n'imikorere Abanyarwanda bihitiramo bashingiye ku mahirwe aboneka mu Gihugu, indangagaciro na kirazira zishingiye ku muco no ku mateka, hagamijwe kwihutisha iterambere ryabo. Iyo mikorere yasubijweho mu Rwanda nyuma ya Jenocide yakorewe Abatutsi mu 1994 hagamijwe gukemura ibibazo byihariye byari bikeneye ibisubizo byihariye. Ibisubizo u Rwanda rwishatse byagize kandi bizakomeza kugira uruhare mu kuzamura urwego rw'ubukungu n'imibereho myiza mu Rwanda, kandi bikazaba inkingi ikomeye Igihugu kizubakiraho mu kugera ku ntego z'Ikerekezo 2050.

Gahunda ya Girinka n'iy'Ubudehe byagize uruhare rutagereranywa mu igabanuka ry'ubukene no guhuza Abanyarwanda.

Urwego rw'Abajyanama b'Ubuzima rwagiye mu 2005 rugira uruhare rukomeye mu iterambere rishimishije mu rwego rw'ubuzima.

Ubwisungane mu kwivuza bwafashije abaturage kubasha kwivuza aho abarenga 85% (2020) bari mu bwisungane mu kwivuza.

Inkiko Gacaca zabashije gutanga ubutabera mu Rwanda nyuma ya Jenocide yakorewe Abatutsi mu 1994 mu gihe Urukiko Mpuzamahanga Mpanabyaha Rwashyiriweho u Rwanda (ICTR) rutabashije kurangiza imanza zose zari ziteganyijwe. Inkiko Gacaca kandi zagize uruhare mu kugarura ubumwe n'ubwiyunge mu Banyarwanda.

Hashyizweho n'izindi gahunda zigamije guha buri wese ubufasha mu by'amategeko by'umwihariko ku batishoboye nk'Urwego rw'Abunzi ndetse n'Urutanga Ubufasha mu by'Amategeko mu nzego z'ibanze zigira uruhare runini mu kugabanya umubare w'imanza zishobora gutinda mu nkiko ari nako bigabanya ikiguzi cyo guhabwa ubutabera ugereranyije no mu nkiko zisanzwe. Intego ni ugusigasira no gukomeza gukoresha ubwo buryo budasanzwe mu guha abaturage ubutabera ariko by'umwihariko abaturage bakagira uruhare mu kwikemurira ibibazo.

Mu rwego rw'imiyooborere, ijwi ry'abaturage ryumvikana binyuze mu nzira zinyuranye nko mu Nama y'Igihugu y'Umushyikirano isuzuma uko ubuzima bw'Igihugu buhagaze n'ingamba zigamije iterambere aho ibyiciro byose by'abaturage biba bihagarariwe.

Itorero ry'Igihugu, nk'ishuri ry'uburere mboneragihugu ritoza Abanyarwanda kurushaho kugira indangagaciro n'umuco wo kwigira.

Imihigo ni uburyo bufasha abantu gukorera ku ntego no kwisuzuma kandi bigakorwa mu nzego zose. Imihigo ifasha kandi gupima ibyakozwe ari nako igaragaza ibikeneye kwitabwaho by'umwihariko mu mwaka w'ingengo y'imari ukurikiraho. Imihigo ubu igenda iba umuco mu nzego zose zaba iza Leta, iz'abikorera cyangwa iza sosiyete siviri. Gahunda y'Imihigo kandi yegerejwe abaturage igera ku rwego rw'urugo kugira ngo buri wese agire uruhare muri iyo gahunda. Ubu abakozi ba Leta bakorera ku mihigo, kandi byatumye barushaho gutanga umusaruro na serivisi nziza.

Umuganda ugira uruhare mu kunganira ingengo y'imari. Nk'uko byagaragajwe na Minisitiri y'Ubutegetsi bw'Igihugu (MINALOC), agaciro k'Umuganda ukabaze mu mafaranga y'u Rwanda kari miliyari 4 muri 2007 karazamuka kagera kuri miliyari 19 muri 2016. Umuganda

kandi ufite n'izindi nyungu nko gukomeza imibanire myiza y'abaturage binyuze mu bikorwa by'umuganda ndetse n'inama zibahuza nyuma yawo.

✓ Akamaro ka gahunda yo kwigira

Gahunda zashyizweho mu rwego rwo kwigira hamwe n'ibindi bisubizo u Rwanda rwishatsemo ni umusingi w'iterambere ry'u Rwanda mu nzego z'ubukungu n'imibereho myiza n'imibanire myiza. Muri gahunda y'Ikerekerezo 2050 harateganywa kuzashyirwaho *ikigo k'ikitegererezo kigamije kunoza imicungire no kubungabunga ibisubizo u Rwanda rwishatsemo.*

✓ Ibikorwa bya gahunda yo kwigira

✚ Umuganda

✚ Ubudehe

✚ Kwihesha agaciro

✚ **Ejo Heza:** Ubwizigame bw'igihe kirekire budufasha kwizigamira ngo tuzagire amasaziro meza.

✚ **Kora Wigire:** Gahunda y'Igihugu igamije kwihutisha ihangwa ry'imirimo idashingiye ku buhinzi (NEP-National Employment Programme) iteza imbere ubumenyi ku bakora imyuga mu Rwanda.

✚ **Ibindi**

2.3. Gukoresha ikibonezamvugo mu mitoreze

2.3.1. Inshinga

Inshoza y'inshinga

Inshinga mu nteruro ni ijamba ribumbatiye cyangwa rigaragaza igikorwa, imico, imiterere cyangwa imimerere bya ruhamwa. Ni yo zingiro ry'ubutumwa bukubiye mu nteruro. Inshinga ishobora kurema interuro yonyine kandi igatanga ubutumwa bwuzuye. Ishobora no kuzuzwa n'indi nshinga nta bundi bwoko bw'ijamba bukoreshajwe.

Ingero z'inshinga zikoresheje muri ubwo buryo bwose tubonye:

- **Uzitabire** inama. (igikorwa)

- Abanyeshuri **barabyibushye**. (imimerere)

- Kagenzi na Gatesi **barakubagana**. (imico, imyitwarire)
- **Ntuzibe**. (imico, imyitwarire)

Umwitozo

1. Mu matsinda ya babiribabiri, mutahure mu nteruro icyo inshinga igaragaza kuri ruhamwa.
 - a) Kamana arwaye umutwe.
 - b) Ntuzasambasane.
 - c) Mukamana ni muremure.
2. Erekana inshinga ziri muri izi nteruro unavuge icyo zigaragaza kuri ruhamwa.
 - a) Ba bana banyu baritonda.
 - b) Ikoranabuhanga ririhuta cyane.
 - c) Uwo ukunda ararwaye.
 - d) Abafundi bubaka amazu.

Amoko y'inshinga

Mu moko y'inshinga hagaragaramo inshinga isanzwe n'inshinga idasanzwe. Inshinga isanzwe ishobora kuba iri mu mbundo cyangwa itondaguye. Ni ukuvuga ko inshinga ishobora kwigaragaza mu nteruro ari:

- Inshinga idasanzwe bita nkene cyangwa mburabuzi.
- Inshinga isanzwe iri mu mbundo.
- Inshinga isanzwe itondaguye.

a) Inshinga idasanzwe

Inshinga idasanzwe bita nkene cyangwa mburabuzi ni inshinga zidakoresheka nk'inshinga zisanze kuko usanga hari ibihe bimwe na bimwe by'inshinga zidatondagurwamo. Ikindi kiziranga ni uko usanga nta zina rishobora gukomoka kuri bene izo nshinga. Ni inshinga zigizwe n'ibicumbi gusa (**-ni, -ri, -fite, -ruzi, -zi**); ntizifite imbundo zizwi ni yo mpamvu ku mikoreshereze y'imisozo yayo, usanga izo nshinga zidakorana n'imisozo **-e, -aga, -ye** na **-a** mu buryo busanzwe. Cyakora iyo zikoreshejweho ingereka zishobora gusesengurwamo imisozo.

b) Inshinga isanzwe iri mu mbundo

Inshinga idatondaguye yitwa imbundo. Ni inshinga itagaragaza ngenga irimo. Imbundo ni ijambo ry'imberabyombi rifite imiterere nk'iy'izina n'iy'inshinga. Iyo imbundo ifashe imiterere y'izina ibarirwa mu nteko ya 15.

Urugero: kugenda (Ukugenda) kwe kwatangaje benshi.

c) Inshinga itondaguye

Ni inshinga igaragaza ngenga yayo, ruhamwa ndetse n'igihe itondaguwemo. **Urugero:** Nzakora Ikitonderwa: Hari bamwe na bamwe bashyira “Ingirwanshinga; -ti,-tya,-tyo, na -te” mu moko y'inshinga zidasanzwe bitwaje ko na zo zijya muri ngenga uko ari eshatu, nyamara ingirwanshinga ni ubwoko bw'ijambo bwihariye kuko usibye kuba zigaragaza ngenga nta rindi huriro zifitanye n'inshinga kuko zitagaragaza igikorwa cyangwa imico n'imimerere ya ruhamwa.

✓ Imiterere y'inshinga

Uturemajambo tw'imbundo

Uturemajambo fatizo tw'inshinga iri mu mbundo ni **dutatu**:

- Indanganshinga **ku-**
- Umuzi (z) – Umusozo (soz)

Ingero:

- Gukora: ku-kor-a $k \rightarrow g/-GR$
- Gukina: ku-kin-a $k \rightarrow g/-GR$
- Kubyina: ku-byin-a $k \rightarrow g/-GR$

Inshinga iri mu mbundo ishobora kugira utundi turemajambo nk'indangagihe **-za-**, ingenantego **-ta-** ingereka zinyuranye n'indangasano z'ibyuzuzo. Cyakora iyo tudahari mu mwanya watwo ntihasimbuzwa “**ø**” kubera ko tuba atari uturemajambo fatizo. Hari bamwe bashyira **ø** inyuma y'indanganshinga **ku-** kugira ngo bagaragaze ko indangagihe idahari nubwo kutagashyiraho nta cyo byaba bitwaye.

Urugero:

- Gukora: ku- ø -kor-a $k \rightarrow g/-GR$
- Gukina: ku- ø -kin-a $k \rightarrow g/-GR$
- Kubyina: ku- ø -byin-a $k \rightarrow g/-GR$

Umusozo w'inshinga iri mu mbundo ni **-a** gusa.

Uturemajambo tw'inshinga itondaguye

Inshinga isanzwe itondaguye igira uturemajambo tw'ibanze **tune (4)**:

- **Indanganshinga** (bamwe bita indangasano ya ruhamwa); RSH mu mpine,

- **Indangagihe** (Bamwe bita ingenantego y'igihe); Rgh mu mpine),
- **Umuzi** (Z)
- **Umusozo** (Soz).

Urugero:

Arahinga: a-ra-hing-a **a-**: Indanganshinga, **-ra-**: indangagihe, **hing-**: umuzi, **-a**: umusozo.

Utu turemajambo fatizo tuba tugomba kugaragara buri gihe mu nshinga. Iyo hagize akataragara gasimbuzwa aka kamenyetso “**ø**”.

Urugero:

- Akora i Kigali. a- **ø**- kor- a
- Mpa iyo kayi. **ø -ø** -n-ha-a n→ m/-h, mh→ mp mu myandikire, a→ø /-J
- Vuga neza twumvikane **ø -ø**-vug-a
- Ajyayo buri munsu a **-ø**-gi-a-(yo) i→y /-J, gy→jy mu myandikire.

Uturemajambo tw'inshinga nkene

Inshinga nkene ni idashobora kugira uturemajambo tw'ibanze rusange.

Ni ukuvuga:

- **Indangashinga ku-** (kuko zitagira imbundo)

- **Umusozo**

Iyo nshinga kandi ibura imiterere imwe n'imwe y'inshinga isanzwe.

Izo ni:

1) **-fite**

3) **-ri; ni** cyangwa **si**

2) **-ruzi**

4) **-zi**

a) N'ubwo izi nshinga ziteye zitya hari imbundo zazo, ariko imbundo zazo usanga nta ho zihuriye n'ishusho ryayo.

Ibisobanuro by'inshinga nkene

1) **-fite** = Kugira

2) **-ruzi** = Kurora, Kureba, Kubona

3) **-ri, ni, si** = Kuba

4) **-zi** = Kumenya

b) Izi nshinga nkene ntizigira umusozo –a uretse ku mbundo zakomotseho, bityo zikaba zidashobora gutondagurwa mu bihe no buryo bivuga igikorwa kitakiriho zikoresheje umusozo –ye.

Aho zidakora zisimburwa n’izindi zisanzwe.

c) Umuzi wazo werekanwa no gukoresha kenshi ingereka:

Ingero:

- Ntibaziranye: nti-ba-z-ir-an-ye

- Uruzwi: u-Ø-ruz-w-i

-Ntwawe unduziye: u-Ø-n-ruz-ir-ye: $r \rightarrow d/n$; $r+y \rightarrow y$

Ikitonderwa:

Iyo **zi** ifite icyuzuzo ngaruka cyangwa indangasano y’icyuzuzo ngaruka **i** cyangwa –iy; -zi iba -izi.

Urugero: Ariyizi: a-ra-iy-izi: $a \rightarrow \emptyset$ / - J

e) Inshinga –ri ntisesengurika. Mu irebero nshize (impitakare) isimburwa na -ba

Urugero: Abaye = a-ba-ye

f) Inshinga –ni na –si ni impindurantego za –ri.

*-ni: Ihuzwa ruhamwa na ruhamya mu nteruro yemeza.

Urugero: Petero ni umunyeshuri.

*-si: Ikabigira mu nteruro ihakana.

Urugero: Petero si umunyeshuri.

Izo zombi na zo ntizisesengurwa.

Ingero zigaragara

1) -fite:

- Mfite: n-Ø/-fite: $n \rightarrow m/f$

- Adufiteye: a-Ø-tu/-fit-ir-ye: $t \rightarrow d$ / -GR; $r+y \rightarrow y$

- Barafitwe: ba-ra-fit-w-ye: $w-ye \rightarrow y-w-e$; $y \rightarrow \emptyset/w$

2) - ruzi:

- nduzi = n-Ø/-ruzi: $r \rightarrow d/n$

- Araruzi = a-ra-ruzi

- Muraruzwi = mu-ra-ruz-w-i

- Turaruzanye: tu-ra-ruz-an-ye

3) -Zi:

- ndazwi = n-ra-z-w-i: $r \rightarrow d/n$; $a \rightarrow \emptyset/-$ J
- Bazi = ba- $\emptyset$ -zi
- Tuzi = tu- $\emptyset$ -zi
- Turabazi = tu-ra-ba-zi
- Turaziranye = tu-ra-z-ir-an-ye
- **Baziranye** gute? = ba- $\emptyset$ -z-ir-an-ye
- **Muzi** he? = n- $\emptyset$ -mu-zi $n \rightarrow \emptyset/-m$
- Ndiyizi: = n-ra-iy-izi: $r \rightarrow d/n$; $a \rightarrow \emptyset/-$ J
- Ndabiyiziye = n-ra-ba-iy-iz-ir-ye: $r \rightarrow d/n$; $a \rightarrow \emptyset/-J$; $r+y \rightarrow y$

4) /-ri, ni, si:

- **Ndi** = n- $\emptyset$ -ri: $r \rightarrow d/n$ -
- **Mwari** mubizi = mu-a-ri: $u \rightarrow w/-$ J

*Ni, si

Buri gihe ziguma gutya ntizisesengurwa.

Umwitozo:

Garagaza intego n'amategeko y'igenamajwi by'amagambo aciyeho akarongo.

- 1) **Barakamfitiye** ariko ntacyo bitwaye.
- 2) Twari **tuziranye**.
- 3) Bari **baruzwi** na benshi.
- 4) Uyu mwana yari umunyeshuri mwiza none ni umwana mubi **sinzi** aho yabikuye.

✓ Uburyo bw'inshinga

Uburyo ni imigendekere y'inshinga ivuga igikorwa cyangwa imimerere. Muri iyi migendekere y'ibikorwa n'imimerere by'inshinga habonekamo kuranga, gutegeka, kugomba, kwifuza no kuziganya. Izi nshoza zishingirwaho **uburyo** bw'ikirango, integeko, ikigombero, inyifuzo n'inziganyo.

Imbundo

Inshinga idatondaguye cyangwa inshinga **iri mu mbundo** ni uburyo bw'inshinga butagaragaza uwakoze cyangwa uwitirirwa igikorwa.

Ingero: Gukina, kunanura, kuvogerwa, gukora, kuruhuka, kwigira...

Uturango tw'inshinga iri mu mbundo

Inshinga iri mu mbundo igaragaza igikorwa, imimerere, imiterere bitagira uwo byitirirwa. Ni ukuvuga ko ukora igikorwa atagaragara.

Ingero:

- Mu nshinga **gukina** ukina ntabwo azwi.ora igikorwa ntabwo azwi.
- Mu nshinga **kwiga** ukora igikorwa cyo kwiga ntabwo agaragara.

Inshinga iri mu mbundo iteka itangizwa na “**ku-**” y’indanganshinga cyangwa “**gu**”. Iyo urebye ku rutonde rw’inteko z’amagambo “ku-” iranga **inteko ya 15**. Ni ukuvuga ko imbundo ihora iteka mu nteko ya 15.

Uturemajambo tw'inshinga iri mu mbundo

Kugaragaza uturemajambo tw'ijambo ni ukugaragaza intego zaryo. Inshinga iri mu mbundo igira **uturemajambo tw'ingenzi dutatu**. Utwo turemajambo ni **indanganshinga (ku-), umuzi (z) n'umusozi (Soz)**. Ni ukuvuga ko intego mbonera y'inshinga iri mu mbundo iteye itya mu mpine: **Ku-z-Soz**

Urugero:

Gukina intego: **ku – kin – a**,

(**Ku-** ni indanganshinga, **-kin-** ni umuzi (z),
-a ni umusozi (Soz))

a) Indanganshinga

Ni akaremajambo **ku-** karanga inshinga iri mu mbundo. Ni na ko karemajambo kagaragaza inteko y'imbundo. Ku nshinga zose ziri mu mbundo, indanganshinga ni yo ibimburira utundi turemajambo.

Ingero:

Gukina: **ku – kin – a**
Gutsinda: **ku – tsind – a**
Kuririmba: **ku – ririmb – a**
Gupfuka: **ku – pfuk – a**

b) Umuzi

Umuzi w'inshinga ni igice kidahinduka k'inshinga, inshinga ihuriraho n'andi magambo yose afitanye isano n'iyi nshinga.

Ingero:

Gukina: **ku – kin – a**

Gutsinda: ku – **tsind** – a
Kuririmba: ku – **ririmb** – a
Gupfuka: ku – **pfuk** – a

c) Umusozo

Umusozo w'inshinga iri mu mbundo ni “-a”.

Ingero:

- Gukora: ku – kor – **a**
- Gutwarana: ku – twar – an – **a**
- Gukoma: ku – kom – **a**

Ikirango

Ikirango ni uburyo buvuga igikorwa cyangwa imimerere by'ihame. Ibyo bikorwa ntibishingira ku gukeka, ku gushidikanya cyangwa ku kwifuza. Ikirango gisanzwe gitondagurwa mu ndagihe, mu mpitagihe no mu nzagihe.

Ingero:

- Inyabarasanya **zomora** ibisebe. (indagihe)
- Mu mwanya **nacurangaga** inanga. (impitagihe)
- Ejo **tuzasoma** inkuru. (inzagihe)

Insano

Insano cyangwa ikinyanshinga cyangwa inshinga itondaguye mu buryo bw'insobanuzi ni ijambo rifite uturemajambo tw'inshinga, uretse kamwe gusa ari ko “indanganteko y'ikinyazina” aho kuba iy'inshinga. Insano isobanura ijambo kandi ikisanisha na ryo. Ivuga imigirire, imiterere cyangwa imimerere. Iyo isimbuye ijambo riyigenga igira indomo.

Ingero:

- Ni nge **uhinga**.
- Ni twe **duhinga**.
- Ni wowe **ukora** uyu muni.
- Ni mwe **mukora** uyu muni.
- **Ukora** uno murimo arahembwa.
- **Abakora** umurimo barahembwa.

Integeko

Integeko ni uburyo inshinga ivuga itegeko rivuye kuri nyakuvuga cyangwa kuri nyakuvugwa. Integeko igira umusozo **-a**

Ingero:

- **Jya** mu ishuri isaha yageze.
- **Andika** vuba wikereza abandi.

 Inziganyo

Inziganyo ni uburyo bw'inshinga buvuga ikintu cyashoboka haramutse habaye ikindi kintu. Ni uburyo bw'inshinga bushidikanya, buteganya cyangwa bukeka. Inziganyo irangwa n'uturemajambo **-a-**, ifite impindurantego **-a-ku-**.

Ingero:

- Twize twatsinda. tu-**a-ø**-tsind-a
- Tutabonye uburyo ntitwakubaka. nti-tu-**a-ku-** ubak-a
- Ugiye ukoresha ikoranabuhanga ryagufasha. ri-**a-ku-ø**-fasha
- Nazagura terefone igezweho ndangije Kaminuza. n-**a-za**-gur-a

 Inyifurizo

Inyifurizo ni uburyo buvuga icyo umuntu yiyifuriza, icyo yifuriza nyakubwirwa cyangwa nyakuvuga. Yifuza ibyiza ikanifuza ibibi.

Ingero:

- **Urakire** ukize n'abandi!
- **Urakabyara** hungu na kobwa.
- **Wo gatunga** we uzatunganirwe.
- **Ntukazavunike** ngo uvunikire ubusa.

 Ikigombero

Ikigombero ni uburyo bufite inyito rusange yo kuvuga ibigomba kuba, gukorwa cyangwa bukavuga ikifuzo. Ikigombero kigira intego imeze nk'iy'itegeko. Uburyo bw'ikigombero bugaragara muri ngenga no mu nteko zose, bukagira umusozo **-e** mu ntego zabwo zose.

Ingero:

- **Nimugende:** mudakererwa.
- **Ntukihebe** Nyagasani azakomeza kukurinda.
- Ndagira ngo **ukore** neza.

✓ **Ibihe bikuru by'inshinga**

 Indagihe

Inshinga iba itondaguye mu ndagihe iyo igikorwa kiba kibera rimwe n'igihe uvuga avugiye.

Ingero

- Amabumba yo mu bishanga byacu **avamo** inkono.
- Diyama **irakunzwe** cyane ku isi yose.
- Uyu muni **turiga** Ikinyarwanda.

Indagihe igaragaramo ibindi **bihe bine** bitewe n'inkuru ibarwa igihe yabereye cyangwa uburyo igikorwa gikorwamo.

a) **Indagihe y'ako kanya:** Ivuga ibihuriranye n'igihe umuntu avuga. Indagihe y'ako kanya ni indagihe y'ubu.

Ingero:

- Hari amabuye **yandagaye** aho iwacu ku misozi.
- Zahabu na Diyama ni amabuye y'agaciro. **Arakunzwe** cyane ku isi.

b) **Indagihe y'ubusanzwe:** Ivuga ibintu biba buri gihe. Ibivugwa biba ari ukuri kutavuguruzwa cyangwa byarafashwe nk'ihame.

Ingero:

- Amabuye **akoreshwa** mu bwubatsi bw'amazu.
- Izuba **rirasira** iburasirazuba.
- Umuntu wize neza **aratsinda**.
- Umuhanga **aratsinda**.

c) **Indagihe ikomeza:** Igikorwa kiba cyarabaye ariko kikaba kigikomeza. Ni ukuvuga ko igikorwa kiba gikomeje cyangwa cyarabaye ariko gishobora kongera.

Ingero:

- Kugeza n'ubu Nyiramugengeri ziri mu Rwanda **ziracyatanga** umusaruro udahagije.
- Umwarimu **arakigisha** abanyeshuri.

d) **Indagihe mbarankuru:** Indagihe mbarankuru ivuga ibyabaye kera nk'aho birimo kuba ubu.

Ingero:

- Nuko **baragenda bagera** aho bacukura amabuye.

- Abantu bamwe **bitwikira** ijoro **baracukura** maze ikirombe **kibagwa** hejuru.

Impitagihe

Impitagihe igaragaramo ibikorwa byabaye cyangwa byari biteganyijwe kuba mu gihe cyashize.

Ingero:

- **Twacukuye** amabuye y'agaciro none **yashize** ku gasozi k'iwacu.
- Icukurwa ry'amabuye **ryinjije** amafaranga menshi mu myaka mike ishize.

Impitagihe igaragaramo ibihe bindi bibiri bito ari byo: **impitakare** n'**impitakera**.

a) **Impitakare:** Ivuga ibimaze kuba mu mwanya ushize cyangwa ibyabaye kare.

Ingero:

- **Bavuze** ko hari imisenyi n'imicanga ishobora gukorwamo ibirahure.
- Mu gitondo, **twinjiye** tudatonze umurongo.

b) **Impitakera:** Inkuru zivugwa mu mpitakera, ziba zarabaye hashize igihe kirekire.

Ingero

- U Rwanda **rwagaragaje** ko rushyigikiye uburinganire n'ubwuzuzanye.
- Mu itumba, imvura **yangije** ibidukikije ku buryo bukabije.

Inzagihe

Inzagihe ni igihe kigaragaramo ibikorwa biteganyijwe kuba mu gihe kizaza.

Ingero

- Amashanyarazi **azunganira** inkwi.
- Umwaka utaha **tuzacana** nyiramugengeri.

Inzagihe igira **inzahato** n'**inzakera**.

a) **Inzahato** ni igihe kigaragaramo ibikorwa biri bube mu kanya.

Ingero: - **Ndaza** kugusura.

- **Ndamubwira** ubutumwa umpaye.

b) **Inzakera** ni igihe kigaragaramo ibikorwa bizakorwa kera.

Ingero: - Nzagukunda kugeza gupfa.
- Ntuzagaruke utamubonye

Umwitozo:

Muri aka gakuru, inshinga ziciyeho akarongo zitondaguye mu bihe bihe?

Mariya na Petero ni abanyeshuri biga mu Ishuri Rikuru ry’Imyuga n’Ubumenyingiro rya Kitabi. Umunsi umwe, aba banyeshuri basuye icyanya cy’Akagera baranezerwa cyane. Mu byo basuye harimo inyamaswa zitandukanye n’ubwoko bw’ibiti bunyuranye. Nuko Petero abwira Mariya ati: “Turakina umupira nimugoroba kugira ngo turusheho kuruhuka.” Barakinnye biratinda bubiriraho. Bahise bigira inama yo gusaba icumbi mu macumbi y’icyanya. Bwenda gucya, Mariya ashaka kujya hanze kwibohora. Petero ni ko kumubwira ati: “Dore haracyari umwijima, wijya hanze udahura n’inyamaswa.” Mu nzira bataha, Petero abaza Mariya ibyerekeranye n’urukundo yigeze kumusaba. Nuko Mariya abwira Petero ko azamusubiza mu minsi mike, ko akibitekerezaho.

2.3.2. Iyiganteruro

✓ Igisobanuro k’iyiganteruro

Iyiganteruro ni uburyo bugamije gusesengura ibinyabumwe bigize amagambo, urujyano, inyangingo. Ni ubumenyi bugamije gusesengura amategeko y’ibyo binyabumwe kugirango bikore interuro.

Interuro

Interuro ni ikinyabumwe/urujyano/ibinyabumwe byigenga bifite umwanya biba birimo n’umumaro muri urwo rujyano bikaba bihujwe n’amategeko y’isanisha muri urwo rujyano.

Ijambo: Mu iyiganteruro, ijambo ni inshoza iba ihuriweho n’iyigantego n’iyiganteruro.

Iyigantego: Ni igice kiga ibice by’ijambo (uturemajambo).

Iyiganteruro: ni igice kiga ijambo mu nteruro. Bityo ijambo rikaba ritandukanye n’akaremajambo.

✓ Amoko y’interuro

Interuro zishyirwa mu matsinda hakurikijwe: umubare n’amoko by’amagambo interuro ziba zifite.

🚦 Interuro yoroheje

Interuro yoroheje bayita kandi **interururo shingiro** cyangwa **interuro fatizo**: Ni interuro igizwe n'amagambo arenze rimwe, ikaba igizwe n'inshinga imwe gusa itondaguye na ruhamwa yayo imwe. Ruhamwa imwe ishobora kuba ari agatsiko k'amagambo ubwo bikitwa itsinda rya ruhamwa (TS-RH) nk'uko inshinga n'ibyuzuzo byayo birema itsinda ry'inshinga TS-SH). Na ho icyuzuzo kirenze kimwe bigakora itsinda ry'icyuzuzo (TS-U).

Urugero: U Rwanda rurangwa n'imisozi myinshi.

🚦 Interuro y'urusobe

Interuro y'urusobe: iyi nteruro igizwe n'inshinga nyinshi zitondaguye.

Urugero: Umunyarwandakazi yabonye ijambo agira urubuga mu nzego, mu buyobozi no mu iterambere muri rusange.

Ikitonderwa: Mu Kinyarwanda habaho n'**interurojambo**: iba igizwe n'ijambo rimwe cyangwa urujyano rw'amagambo rushingiye ku ijambo rimwe. (Monophrase/ mot-phrase)

Ingero:

- | | |
|----------------------------|---------------|
| • Karabaye! | • Kigali. |
| • Soma! | • Urubyiruko. |
| • Asyi! | • Mwiza. |
| • Umuhungu. (Yabyaye iki?) | |
| • Yeee! | • Kuringanira |
| • Twese! | |

✓ Isanisha ry'amagambo mu nteruro

Isanisha mu iyiganteruro ni uburyo bwo guhuza amagambo bukagaragaza amasano ari hagati y'ayo magambo agize interuro.

- a. **Isanisha nyantego (morphologique):** ijambo ry'ibanze riha agace k'intego yaryo amagambo aryungirije.

Urugero: Umwana mwiza akunda kwiga.

Mu Kinyarwanda, isanisha nyantego rigaragara mu magambo afite aho iyo ndanganteko igenda yisanisha mu magambo yungirije ijambo ry'ibanze.

- b. **Isanisha nyanyito (sementics):** rishingira ku gisobanuri k'icyo interuro ivuga. Iyo ikivugwa ari umuntu cyangwa abantu.

Urugero: Data na so ni barebare.

- c. **Isanisha nyurabwenge (logique):** iyo ikivugwa ari imbundo, uruvange rw'abantu n'ibintu (inyamaswa) cyangwa se urw'amagambo adahuje indanganteko.

Urugero: - Umwana n'igitoki byaguye.

- Imbwa n'urukwavu byanyuze hano. (nt. 8)

2.3.3. Umumaro w'amagambo mu nteruro

✓ **Ruhamwa**

Ruhamwa ni ijambo rigaragaza ukora igikorwa cyangwa uwo berekezaho imimerere cyangwa imiterere bikubiye mu nshinga. Muri rusange ruhamwa iba igizwe n'izina ryonyine cyangwa ikaba ari itsinda ry'izina n'andi magambo arisobanura nka ntera, igisantera, n'ayandi. Ruhamwa ishobora no kuba izina ntera, ikinyazina, imbundo, umugereka,...

Ingero:

- **Ababyeyi** bita ku bana babo.
- **Umunyamabanga Nshingwabikorwa** agira imirimo myinshi.
- **Urubyiruko mwese** nimutozwe ikoranabuhanga.
- **Umunyeshuri mwiza** yubaha abarezi n'ababyeyi.
- **Iyo** ikamwa menshi
- **Kwiga** biteza imbere.
- **Ejo hazaza** hazaba heza.
- Niturangara **buzacya** abandi badusize kubera ikoranabuhanga.
- None se urumva **ari** ikoranabuhanga rizana ibibi?
- **Hazabaho** guhuguka kugira ngo ikoranabuhanga ritadusiga.

✓ **Izingiro ry'ubutumwa**

Uyu ni umumaro ugirwa n'inshinga itondaguye gusa mu nteruro.

Urugero:

- Kamanzi **akunda** Gatesi.
- Mugabo na Nyiramwiza **biga** muri kaminuza.
- **Oza** ayo masahani.

✓ **Icyuzuzo**

Icyuzuzo ni ijambo cyangwa urwunge rw'amagambo biherekeza inshinga birushaho gusobanura neza ubutumwa buyikubiyemo.

Ibyuzuzo bishobora kugira amoko atandukanye ariko ay'ingenzi ni:

- ❖ icyuzuzo ruhamya,
- ❖ icyuzuzo mbonera,
- ❖ icyuzuzo nziguro n'icyuzuzo k'ingereka

a) Icyuzuzo ruhamya

Ni ijambo rivuga isano y'imiterere cyangwa isano y'imico icyuzuzo gifitanye na ruhamwa. Ruhamya ihuzwa na ruhamwa n'inshinga z'imimerere cyangwa imiterere hamwe n'inshinga **“kuba”** cyangwa imvugaruhamwa **“ni”**.

Ingero:

- Umwana ni **umutware**.
- Amazi ni **meza ku buzima**.
- Arimo **umunyeshuri mwiza**.

b) Icyuzuzo mbonera

Icyuzuzo mbonera kigizwe n'ijambo cyangwa amagambo aherekeza inshinga akuzura igitekerezo cyayo. Icyuzuzo mbonera giherekeza inshinga kitanyuze ku rindi jambo cyangwa ngo kigire ibindi bisobanuro by'umwihariko cyongeraho.

Ni ukuvuga ko hagati y'inshinga n'icyuzuzo mbonera nta rindi jambo rizamo.

Gishobora kuba kigizwe n'ijambo rimwe cyangwa menshi. Muri rusange gisubiza ibi bibazo: nde?, iki?

Ingero:

- Tuzitabira **ikoranabuhanga**. (Tuzitabira iki? Ikoranabuhanga)
- Iterambere turikesha **abayobozi beza**. (Turikesha nde? Abayobozi beza)
- Muzatsinda **ikizamini k'Ikinyarwanda**. (Muzatsinda iki? Ikizamini k'Ikinyarwanda)

Ikitonderwa: Ibyuzuzo mbonera bishobora gukoreshwa icyarimwe ari bibiri. Icyo gihe tugira icyuzuzo mbonera ntega n'icyuzuzo mbonera ntegesha.

Icyuzuzo mbonera ntega usanga gisubiza ibibazo nka nde? Iki? Zingahe? Gukora iki?

Ingero:

- Nkunda **mwarimu**. Nkunda nde? Mwarimu
- Tuzatsinda **ikizamini**. Tuzatsinda iki? Ikizamini
- Data atunze **inka ijana**. Atunze inka zingahe? Inka ijana
- Bagiye **kuryama**. Bagiye gukora iki? Kuryama

Icyuzuzo mbonera ntegesha usanga kivuga ikigenewe icyuzuzo ntega, icyo bifashisha mu gukorera igikorwa icyuzuzo ntega, icyo icyuzuzo ntega kivamo, ikibereye umutungo icyuzuzo ntega, ikiri ku cyuzuzo ntega, icyo icyuzuzo ntega giteganyirijwe, n'ibindi.

Ingero:

- Umubyeyi agurira umwana **umugati** (ikigenewe icyuzuzo ntega)
- Umushumba yakubise inka **inkoni** (icyo bifashisha)
- Uruganda rukora amavuta mu bihwagari (icyo icyuzuzo ntega kivamo)
- Umujura yibye umuturanyi **intama** (umutungo w'icyuzuzo ntega)
- Umubyeyi yahanaguye umwana amarira (ikiri ku cyuzuzo ntega)
- Ikoranabuhanga ryorohereza abantu imirimo (igiteganyirijwe icyuzuzo ntega)

c) Icyuzuzo nziguro

Icyuzuzo nziguro cyuzuzura inshinga akenshi kibanje guca ku rindi jambo nk'icyungo cyangwa indangahantu, kigasobanura uburyo igikorwa gikorwa, igihe gikorwa, ahantu gikorwa, impamvu gikorwa, inshuro gikorwa n'ibindi.

Ingero:

- U Rwanda rurakataje **mu ikoranabuhanga**. (icyuzuzo nziguro cy'ahantu)
- Abakinnyi bagenda **bushuhe**. (icyuzuzo nziguro cy'uburyo)
- Ubukwe buzaba **ejo mu gitondo**. (icyuzuzo nziguro k'igihe)
- Abanyarwanda benshi ku munsu barya **inshuro eshatu**. (icyuzuzo nziguro k'inshuro)
- Bavuye **ku ishuri**. (icyuzuzo nziguro cy'ahantu)
- Arayura **kuko ashonje**. (icyuzuzo nziguro k'impamvu)
- Ahora ameze **nk'umurwayi** (icyuzuzo nziguro kigereranya)
- Abanyeshuri bagomba guca ukubiri **no gutukana** (icyuzuzo nziguro cyungu)

Ikitonderwa:

Aya moko yombi y'ibyuzuzo (icyuzuzo mbonera n'icyuzuzo nziguro) ashobora gukoreshwa icyarimwe mu nteruro.

Ingero:

- Ikigo cyacu cyaguze **mudasobwa mu mugi**. (“mudasobwa” ni icyuzuzo mbonera; “mu mugi” ni icyuzuzo nziguro).
- Umpere **umwana imiti nimugoroba**. (“umwana, imiti” ni ibyuzuzo mbonera; “nimugoroba” ni icyuzuzo nziguro).

d) Icyuzuzo k'ingereka

Icyuzuzo k'ingereka ni icyuzuzo kizanwa n'uko ingereka yongerewe ku nshinga cyangwa se icyuzuzo k'inshinga kigatuma igira ingereka. Hari n'ingereka zituma inshinga igira icyuzuzo kibanjirijwe n'icyungo.

Ingero:

- Umwana arakinana **inkweto**
- Iyi nzu yubakwa n'**umufundi**
- Gatera yigana na **Mwiza**

Umwitozo

Mu matsinda ya babiribabiri mutahure mu nteruro amoko y'ibyuzuzo byakoreshejwe, munakoreshe neza ibyuzuzo mu nteruro ziboneye.

1. Tahura ibyuzuzo biri mu nteruro zikurikira hanyuma uvuge n'ubwoko bwabyo :

- a) Imyanya y'icyubahiro yicayemo abayobozi.
- b) Abashyitsi bariye kabiri.
- c) Abanyeshuri bacu babonye amanota meza mu bizamini bya Leta.
- d) Muhe uwo mutetsi umuceri n'amavuta.

2. Shaka interuro zawe bwite ebyiri zikoreshejemo ibyuzuzo mbonera n'ebyiri zikoreshejemo ibyuzuzo nziguro unabigaragaze.

✓ **Imfutuzi**

Imfutuzi ni umubaro ugirwa n'amagambo asobanura cyangwa afutura kurushaho andi mu nteruro. Akenshi uyu mumaro ugirwa na ntera, ibinyazina cyangwa amazina abanjirijwe n'ibinazina ngenera n'imigereka.

Ingero:

- Mfite abana **bakuru**.
- Zana umupira w'**umukara**.
- Ntiza amakayi **yose**
- **Iki** giti kirashaje.
- Kamana aya **vuba**.

✓ **Impuza**

Impuza, mu nteruro, ni umumaro ugirwa n'amagambo yunga.

Urugero:

- Gatete **na** Gatera barakundana.
- Nta kibyara nk'intare **n'**ingwe.
- Guhinga **no** gutera birajyana.

IMBUMBE YA 3: GUKORESHA IKINYARWANDA KINOZE MU KWITOZA INSHINGANO ZINYURANYE Z'UBUYOBOZI

Umusaruro w'inyigisho:

Nyuma y'iyi nyigisho, umunyeshuri azaba ashobora:

- Gutegura ijambo ry'ubuyobozi
- Kwandika inyandiko zo mu buyobozi
- Kumurika imiteguro itandukanye

3.1. Gutegura ijambo ry'ubuyobozi

3.1.1. Umuteguro w'imbwirwaruhame

✓ Inshoza y'imbwirwaruhame

Imbwirwaruhame ni ijamba umuntu ategura akarigeza ku bantu benshi bakirinda kumurogoya, ahubwo bakamutega amatwi. Imbwirwaruhame ishobora kuba ndende cyangwa ngufi bitewe n'intego yayo. Uvuga imbwirwaruhame na we agomba kuyitegura agahuza ibitekerezo bye bwite n'insanganyamatsiko y'umunsi, kandi akiyubaha ubwe, akubaha n'abamuteze amatwi. Imbwirwaruhame zivuga ku nsanganyamatsiko zinyuranye: izibwiriza iby'idini, izivuga ibya poritiki, izo kwizihiza iminsi mikuru, izikangurira abantu igikorwa runaka... Ni yo mpamvu imbwirwaruhame zishobora kuvugirwa ahantu hanyuranye nko mu nsengeru, mu ishuri, mu nzu mberabyombi n'ahandi.

✓ Imbata y'imbwirwaruhame

Imbwirwaruhame igizwe n'ibice bine: umutwe, intangiriro, igihimba n'umwanzuro.

a) Umutwe

Umutwe ni igice kibanza k'imbwirwaruhame kigaragaza insanganyamatsiko n'uyivuga.

b) Intangiriro

Mu ntangiriro uvuga imbwirwaruhame atangira asuhuza abo yageneye ikiganiro ahereye ku banyacyubahiro bahari uko bagenda basumbana mu byubahiro byabo.

Urugero:

“Muyobozi w'Umurenge,

Bayobozi b'utugari n'imidugudu,

Baturage b'Umurenge wa Bwishyura, nimugire amahoro!”

Aka ni na ko karango ka mbere k'imbwirwaruhame. Mu ntangiriro kandi ni ho utanga ikiganiro agaragaza ibyo ari buze kuvugaho asa n'utera amatsiko abari buze kumutega amatwi ndetse no kubumvisha akamaro k'icyo kiganiro agiye kubagezaho. Iki gice ntikigomba kuba kirekire.

c) Igihimba

Iki gice ni cyo gice fatizo k'imbwirwaruhame. Ni muri iki gice utanga ikiganiro avuga ingingo yateguye kuvugaho. Ni ngombwa ko izo ngingo azikurikiranya neza ashingiye ku buremere bwazo. Ibi bituma abamutega amatwi bishimira gukomeza kumwumva kuko aba yahereye ku ngingo zibafitiye akamaro cyane. Iyo bibaye ngombwa ko hari ingero zitangwa, uvuga imbwirwaruhame akoresha ingero zijyanye n'abo abwira cyangwa aho avugira. Kubera ko iki

gice gishobora kuba kirekire, utanga ikiganiro mbere yo kuja ku yindi ngingo ashobora kugenda akoresha amagambo yo gukangura abo abwira (Bayobozi, Babyeyi, Nshuti, Bavandimwe ...)

d) Umwanzuro/Umusozo

Muri iki gice utanga imbwirwaruhame asaza yibutsa abamuteze amatwi ingingo z'ingezi baganiriyeho kugira ngo basigarane ishusho y'ikiganiro. Ni muri iki gice kandi ashobora kugaragaza ibyifuzo, ingamba, inama... bitewe n'imiterere y'ikiganiro.

Niba yashishikarizaga abantu kurwanya ibiyobyabwenge arasaza agaragaza ingamba zafatwa mu kubirwanya. Muri iki gice kandi utanga ikiganiro asaza ashimira abari bamuteze amatwi.

✓ Imyandikire y'imbwirwaruhame

Imbwirwaruhame itegurwa yandikwa, ikavugwa isomwa. Igomba gutegurwa kandi ikandikwa neza (hubahirizwa amabwiriza y'imyandikire yemewe, utwatumye no kudacucika inyandiko) mbere yo kuvugwa kugira ngo hirindwe amakosa no kurondogora. Nta guhimbiraho kuko bituma uvugaga ashobora gukora amakosa nubwo tutakwirengagiza ko hari abantu bagira impano yo kuvugira mu ruhame; ariko si ibya bose.

Urugero rw'imbwirwaruhame:

Bayobozi b'umudugudu wacu,

Baturage b'umudugudu wacu, mbanje kubasuhuza. Nimugire amahoro! Uyu munsu nazinduwe no kugira ngo mbaganirire kuri imwe mu ndwara z'ibyorezo zitwugariye kugira ngo dufate ingamba zo kuyirwanya. Turaganira ku ndwara y'igituntu. Turaza kurebera hamwe icyo ari cyo, uko yandura n'uko ikwirakwira, nyuma tuze kureba ingamba zikwiye kugira ngo tuyihashye.

Igituntu ni indwara yandurira mu mwuka duhumeka. Iyo kitavuye, umuntu umwe mu bakirwaye ashobora kwanduza abandi bantu benshi. Igituntu giterwa n'agakoko bita "bacille de Koch", kikaba cyandura cyane ndetse gishobora no guhitana umuntu iyo atipimishije kare ngo afate imiti neza. Abantu bose ntibandura kimwe, kuko batagira ubudahangarwa bw'umubiri bungana. Igituntu cyandurira ahantu aho ari ho hose umuntu ahuriye n'ukirwaye, ariko cyane cyane ahantu hatari umwuka mwiza uhagije nko muri gereza, kwa muganga, mu cyumba, mu ishuri, mu kazi n'ahandi. By'umwihariko abantu bazahazwa cyane n'igituntu ni ababana n'agakoko gatera SIDA, abafata indyo yuzuye, kimwe n'abarwayi ba diyabeti. Impamvu ni uko ubudahangarwa bw'abo bw'umubiri buba budakomeye cyane.

Bayobozi, baturage w’umudugudu wacu bimwe mu bimenyetso by’igituntu ni ibi bikurikira: gukorora birengeje ibyumweru bibiri, kugira umunaniro, umuriro ndetse ukanabira ibyuya cyane cyane nimugoroba, no kugira ikizibakanwa cyangwa kunanuka. Niba ugaragaje kimwe muri ibi bimenyetso ihutire kwisuzumisha ku ivuriro rikwegereye. Ikindi kandi niba ubana n’umuntu urwaye igituntu ukagira kimwe mu bimenyetso na bwo ihutire kwisuzumisha ku ivuriro rikwegereye. Niba mufite umurwayi w’igituntu hakaba hari abana batarengeje imyaka itanu y’amavuko ugomba kubasuzumisha n’iyo baba batagaragaza ibyo bimenyetso.

Ikindi nababwira ni uko imiti y’igituntu igomba gufatirwa kwa muganga kugira ngo utibagirwa kuyifata rimwe na rimwe maze bikakuviramo igikatu. Igituntu k’igikatu ni igituntu gisanzwe kiba cyaravujwe nabi bityo aho kugira ngo imiti yice udukoko, ahubwo tukarushaho gukara. Urwaye icyo gituntu k’igikatu aba ashobora kucyanduza abandi. Icyo gikatu gituruka ku kudafata imiti neza y’igituntu no kwanduzwa n’umuntu usanzwe arwaye igituntu k’igikatu. Imiti y’igituntu k’igikatu ifatwa mu gihe kiri hagati y’amezi 20 na 24. Muri rusange igituntu cyanduzwa n’ukirwaye utivuze neza mu gihe avuga, aseka, akorora cyangwa se yitsamuye, yohereza udukoko dutera igituntu.

Bayobozi, sinarangiza ntabamenyesheje ko igituntu ari yo ndwara ya mbere y’icyorezo ikunze kwibasira ababana n’ubwandu bw’agakoko ka SIDA, nitwirinda SIDA tuzagabanya n’igituntu. Ikindi ndasaba umuntu wese wibonyeho ibimenyetso by’igituntu kwipimisha ku ivuriro rimwegereye, twirinde guha akato umurwayi w’igituntu, kuko iyo atangiye gufata imiti ntaba agishobora kwanduza abandi. Ahubwo mwegere umufashe gukomeza imiti nk’uko bikwiye. Tanga amakuru ku ivuriro niba uyafite, hamenyekane umurwayi wimutse kugira ngo bakomeze kumukurikirana neza ntahagarike imiti. Kingura buri munsu amadirishya y’icyumba cy’umurwayi w’igituntu igihe kinini gishoboka, kugira ngo hinjire umwuka mwiza uhagije, maze wirukane udukoko dutera igituntu. Mbashimiye uko mwanteze amatwi, murakoze.

3.1.2. Umuteguro w’inama

✓ Inshoza y’inama

Inama ni ikoraniro ry’abantu bateraniye hamwe bafite ingingo bigaho kandi bagomba gufataho ibyemezo. Hashobora kuba inama isanzwe yategurwa byimbitse kandi ikanatumizwa

mu gihe runaka giteganywa n'amategeko cyangwa se inama idasanzwe iba itateguwe bihambaye ikanatumizwa mu gihe kigufi.

Haba inama isanzwe n'inama idasanzwe. Inama isanzwe igira ingingo nyinshi ku murongo w'ibygwa kandi ziba zigomba kwigwa zose. Ishobora kongerwamo izindi ngingo abaje mu nama babona ko zihutirwa. Itumizwa iminsi myinshi mbere y'uko iba. Inama idasanzwe itumizwa mu gihe gito. Yiga ikibazo kihutirwa kandi gitunguranye gusa nta yindi ngingo ishobora kongerwamo. Iyo nama iba ngufi kandi igira umuyobozi n'umwanditsi.

✓ Imitegurire y'inama

a) Gutumiza inama

Gutumiza inama no kohereza gahunda bikorwa mbere y'igihe. Ni byiza ko hagati yo gutumirwa mu nama n'inama ubwayo, habonekamo igihe ngo abantu babashe kuyitegura. Bashobora kwibutsa ingingo yibagiranye babona ko ari ngombwa ko zigirwamo.

Inama ishobora gutumizwa mu nyandiko hakoreshejwe ibaruwa y'ubutumire. Hagaragaramo uwayitumije, abatumiwe ndetse n'ibiri ku murongo w'ibygwa. Inama kandi ishobora gutumizwa mu itangazo rinyuze kuri radiyo, tereviziyo cyangwa se kuri murandasi.

b) Gutegura ibikoresho n'aho inama izabera

Umuyobozi w'inama ategura ibikoresho n'aho inama izabera. Iby'ingenzi ni ibi:

- Gutegura aho inama izabera mbere, hakurikijwe umubare w'abazayizamo.
- Gutegura icyumba k'inama (intebe n'ameza, isuku).
- Gutegura icyumba k'inama ukurikije aho abazaza mu nama bazicara n'uko bazicara mu nama: nko mu ishuri, ku ruziga, ku gice cy'uruziga, aho abayobozi bicara.
- Guteganya ibikoresho byifashishwa: ikibaho, amakaye, amakaramu, n'ikindi kintu cyose cyatuma abari mu nama bashobora gukurikira, indangururamajwi, kwitabaza ikoranabuhanga n'ibindi.

c) Gutegura inama nyirizina

Nyuma yo gutekereza no gutegura ibikoresho bikenewe, umuyobozi w'inama ategura inama nyirizina. Umuyobozi w'inama ategura ibizigirwa mu nama agahera ku ngingo z'ingenzi akazitondekanya ahereye ku zifite agaciro kurusha izindi, kuko iyo igihe kibaye gito, iby'ingenzi biba byarangiye.

✓ Imiyoborere y'inama

Uwatumije inama ni we muyobozi wayo kandi ni we uyitangiza akanayiyobora cyangwa bigakorwa n'umuhagarariye. Inama kandi igira umwanditsi ugomba kwandika inyandiko mvugo. **Inama igira ibice by'ingenzi** bigenda bikurikirana, kandi uyiyoboye akaba agomba gukurikirana neza ngo hatagira igisimbukwa, cyanecyane ko ari we ugomba kurangiza kimwe agatangiza ikindi.

Ibice by'inama bikurikirana ku buryo bukurikira:

a) Intangiriro

Intangiriro igizwe n'ibice bikurikira:

- Gusuhuza no gutanga ikaze.
- Kuvuga igihe inama iza kumara (si ngombwa cyane).
- Kurebera hamwe ko umubare w'abitabiriye uhagije ukaba wafata ibyemezo bikemerwa.
- Kuvuga impamvu z'abataje.
- Kuganira ku murongo w'ibygwa no kubyemeranywaho.

b) Igihimba

Igihimba kigizwe no gutangiza inama nyirizina. Mu gutangira inama, hagakurikizwa gahunda iteye itya:

- Gusuzuma inyandiko mvugo iheruka, kuyikorera ubugororangingo no kuyemeza.
- Kureba niba ibyemeranyijweho byarashyizwe mu bikorwa.
- Kwigira ingingo ku yindi nk'uko byateganijwe kandi umuyobozi w'inama akita kuri ibi bikurikira:
- Gutanga ijambo ku barisabye.
- Kugarura abashaka gutana no gutandukira.
- Kubahiriza igihe k'ijambo.
- Kwirinda kuba umunyagitugu.
- Kumva ibitekerezo, kurangwa n'ikinyabupfura n'ubworoherane kuri buri wese.

c. Umusozo

Umusozo ugizwe n'izi ngingo ebyiri z'ingenzi:

- Gutanga inshamake y'ibyizwe.
- Gushimira abaje mu nama, gutanga amatangazo niba ahari no kubasezerera.

✓ Inyandiko mvugo y'inama

Inyandiko mvugo ni umwandiko uvuga ibyakozwe ibyabaye cyangwa ugasubira mu byo uwandika yabonye cyangwa se yanagizemo uruhare. Iyo urebye abo inyandiko mvugo igenewe, usanga hari uburyo bubiri ikorwamo:

- a) Inyandiko mvugo ishobora kuba igenewe umuntu wari uhari igihe ibikorwaho inyandiko mvugo byabaga, kugira ngo atibagirwa ibyabaye abone uko abyigaho neza cyangwa ashyire mu bikorwa ibyumvikanweho.
- b) Inyandiko mvugo igenewe umuntu utari uhari kugira ngo amenye ibyavugiwe cyangwa ibyakorewe aho atari ari.

2. Ibice bigize inyandiko mvugo

Kimwe n'indi myandiko, inyandiko mvugo y'inama igira ibice by'ingenzi bine:

Umutwe, intangiriro, igihimba n'umusozo.

a) Umutwe

Mu mutwe w'inyandiko mvugo hagaragaramo inama nyirizina, igihe yabereye n'aho yabereye.

b) Intangiriro

Mu ntangiriro y'inyandiko mvugo hagaragaramo uko inama yatangiye, abitabiriye inama, ibiri ku murongo w'ibyigwa.

c) Igihimba

Mu gihimba muri rusange hagaragaramo uko inama yagenze n'imyanzuro yafashwe kuri buri ngingo.

d) Umusozo

Mu musozo havugwamo uko inama yarangiye.

3. Uko bakora inyandiko mvugo

Ukora inyandiko mvugo yita kuri ibi bikurikira, agakora ku buryo bitabura mu nyandiko mvugo.

a) Umutwe

Mu mutwe w'inyandiko mvugo hagaragaramo inama nyirizina, aho yabereye n'igihe yabereye.

b) Abari mu nama

Muri iki gice inyandiko mvugo igaragazamo urutonde rw'abitabiriye inama bose. Iyo atari benshi cyane bagaragazwa mu ntangiriro y'inyandiko mvugo. Ariko iyo abitabiriye inama ari benshi cyane bashyirwa ku mugereka w'inyandiko mvugo.

c) Ibyari ku murongo w'ibygwa

Muri iki gice ukora inyandiko mvugo arondora ibyo inama yagombaga kwitaho byose nk'uko biba byavuzwe n'umuyobozi w'inama ndetse n'ibindi byifujwe n'abari mu nama ko byajya mu tuntu n'utundi, n'ibitari byateganijwe ku murongo w'inama.

d) Uko inama yagenze

Muri iki gice ukora inyandiko mvugo yandika muri make icyo bumvikanye kuri buri ngingo. Ntiyandika buri muntu ibyo yavuze ahubwo yandika gusa umwanzuro wafashwe kuri buri ngingo yari ku murongo w'ibygwa kandi bikandikwa ku buryo bwumvikana neza.

Ikitonderwa: Hari kandi ibindi byitabwaho bikurikira:

- Ku ngingo yose yizwe ukora inyandiko mvugo abishyira mu nshamake, impaka zagiwe ndetse n'umwanzuro wa buri ngingo yizwe.
- Ibikorwa byemejwe mu nama, abazabishyira mu bikorwa intego zigamijwe n'itariki ntarengwa yo kuba byashyizwe mu bikorwa iyo bihari.
- Imyanzuro rusange y'inama kuri buri ngingo.
- Umusozo muri rusange.
- Izina ry'umwanditsi w'inyandiko mvugo.
- Izina ry'uwaru uyoboye inama: agomba kuyishyiraho umukono kugira ngo yemezwe nk'inyandiko yemewe iyo atari yayisinye nta bwo iba yakwitwa inyandiko mvugo.

4. Urugero rw'inyandiko mvugo y'inama

Inyandiko mvugo y'inama y'abarezi bo ku kigo cy'amashuri cya Rwezamenyo yo ku wa 3 Mutarama 2019.

a) Abitabiriye inama

GASANA Pierre (umuyobozi w'ishuri)

KAMANA Augustin (umuyobozi ushinze amasomo)

MUPENZI Chantal (umwanditsi w'inama)

Abarimu

b) Ibyari ku murongo w'ibygwa

Itangira ry'igihembwe cya mbere

Uko abarimu bashyizwe mu myanya bazigishamo

Utuntu n'utundi

c) Uko inama yagenze

Inama yatangiye saa yine n'igice iyobowe n'Umuyobozi w'Urwunge rw'Amashuri rwa Rwezamenyo, GASANA Pierre watangiye aha ikaze abitabiriye inama anaboneraho no kubereka abarimu bashya boherejwe n'Akarere kwigisha muri icyo kigo. Uyoboye inama yaboneyeho gusaba abarimu kongera kwibwirana, buri wese n'ibyo yigisha. Nyuma y'aho umuyobozi w'inama abaza impamvu z'abandi batarahagera. Nyuma y'ibyo, uyoboye inama yabajije abari mu nama niba hari ibyo bifuzaga kongera ku murongo w'ibygwa maze hemezwa gahunda y'inama nk'uko yari yateguwe.

Ingingo ya 1: Itangira ry'igihembwe cya mbere

Ku bijyanye n'iyi ngingo abari mu nama bamenyeshejwe ko igihembwe cya mbere kizatangira ku wa 10 Mutarama 2019. Uyoboye inama yaboneyeho kwibutsa abarimu ko nta mwarimu uzitwaza impamvu iyo ari yo yose ngo akorerwe. Bumvikanye ko abarimu bose bagomba kugera ku ishuri umunsi umwe mbere y'itangira ry'amashuri kugira ngo bategure amasomo yabo bityo ku munsi wa mbere w'ishuri bazahite batangira kwigisha.

Ingingo ya 2: Uko abarimu bashyizwe mu myanya bazigishamo

Ku bijyanye n'iyi ngingo Umuyobozi w'ishuri yabwiye abari mu nama ko Akarere kifuje guhindura abarimu banyuranye kubera inyungu z'akazi. Yabasobanuriye ko ari muri urwo rwego ikigo cyabo cyohererejwe abarimu bashya batanu. Yamenyesheje kandi abari mu nama ko hari abarimu babiri bo ku kigo cya Rwezamenyo bazimurirwa ku bindi bigo bakazagenda bamaze kubona amabaruwa avuye ku Karere. Umuyobozi w'inama yashoje iyi ngingo asaba abo bireba kwihanganira izo mpinduka kuko zakozwe kubera inyungu z'akazi.

Ingingo ya 3: Utuntu n'utundi

Mu tuntu n'utundi abari mu nama bifuje ko bazashinga agasanduku k'ingoboka kazajya kabafasha gusura uwagize ibyago cyangwa se uwagize ibyishimo. Bemeranyije ko mu nama itaha, bashyiraho komite izabigira amategeko azagenga ako gasanduku k'ingoboka.

Inama yashojwe saa sita na cumi n'itanu, umuyobozi wayo ashimira abarimu bayitabiriye, nyuma yabyo, abari mu nama bakora ubusabane.

Umwanditsi w'inama

Umuyobozi w'inama

MUPENZI Chantal

GASANA Pierre

Chantal

Gasana

3.1.3. Imitegurire y'ikiganiro mpaka

✓ Igisobanuro k'ikiganiro mpaka

Ikiganiro mpaka gikorwa n'abantu benshi bagamiye kungurana ibitekerezo hagati yabo. Ibiganiro mpaka bigira insanganyamatsiko bityo hakaba impande ebyiri z'abantu bamwe bakayishyigikira abandi ntibayishyigikire.

Impaka zivugwa aha ngaha si za zindi za ngo turwane, si zimwe zibyara amacakubiri. Ahubwo ni impaka zigamiye kugera ku mwanzuro wubaka, abajya impaka bagatahiriza umugozi umwe cyane ko akenshi ziba kugira ngo hagire umurongo ufatirwa ikibazo runaka.

Ibiganiro mpaka biba bigamiye guhuza impande zombi ngo barebe icyo bakumvikanaho gikwiye gukurikizwa ku mpande zombi.

Iyo ari umwitozo wo mu mashuri, ibiganiro mpaka bituma abanyeshuri baba intyoza mu kuvuga. Bakaba imbonera mu gutega amatwi ibivugwa no mu gutanga ingingo zifite ireme. Ntibarondogora; ahubwo bagusha ku ntego kandi bakamenyera gukurikiranya ingingo, bubahiriza inyurabwenge n'injyabihe y'ibivugwa.

By'umwihariko, ibiganiro mpaka bitoza abanyeshuri kuvugira mu ruhame.

✓ **Amoko y'ibiganiro mpaka**

Habaho:

- Ibiganiro mpaka bibera **mu mashuri** abanza, ayisumbuye n'amakuru; umuhuza ashobora kuba ari umuntu umwe ntabamufasha. Impamvu ni uko bimara igihe gito kibarirwa mu masaha.
- Ibiganiro mpaka bitegurwa **ku rwego rw'igihugu cyangwa bihuje impande zishyamiye**; umuhuza agira abamufasha. Impamvu ni uko biba bisaba ubumenyi bwinshi bunyuranye nk'amateka, poritiki, ubukungu n'ibindi. Nta muntu rero waba inzobere mu bintu byose. Iyi mpamvu ituma umuhuza agira abamufasha, ni uko bene ibyo biganiro bishobora no gufata igihe kirekire nk'ibyumweru cyangwa amezi.

✓ **Imiyoborere y'ikiganiro mpaka**

Ikiganiro mpaka kiba kigomba gutegurwa, ndetse n'abajya impaka bakitegura bagakora ubushakashatsi kugira ngo igihe nyirizina nikigera bazatange ingingo zifatika kandi zifite ireme. Mu mitegurire y'ikiganiro mpaka hari ibigomba kwitabwaho nyuma y'uko insanganyamatsiko iboneka n'aho ikiganiro kigomba kubera.

Abagize ibiganiro mpaka:

Ibiganiro mpaka bigirwa n'amatsinda atatu hatabariwemo indorerezi. Uruhare rw'ayo matsinda yose ruba rukenewe mu migendekere myiza y'ikiganiro mpaka.

a) Uruhande rushyigikira insanganyamatsiko: Ni itsinda ry'abashyigikiye insanganyamatsiko. Ibitekerezo, ingingo n'ibisobanuro batanga bigomba kutanyuranya n'insanganyamatsiko.

b) Uruhande rudashyigikiye insanganyamatsiko: Ni itsinda ry'abantu batemera ibitekerezo n'ingingo bikubiye mu nsanganyamatsiko yatanze. Abafata umwanya wo kugira icyo bavuga,

bagerageza kuyirwanya. Bagomba ariko kwifashisha ingingo n'ibisobanuro byumvikana ku buryo n'uruhande rwemeza rushobora kuva ku izima cyangwa bakagamburukaho gato.

c) Umuhuza/umuyobozi w'ibiganiro mpaka: Ni umuntu uba ushinze guhuza izo mpande zombi. Ashobora kuba umwe cyangwa benshi. Umubare w'abafasha umuhuza uterwa n'urwego rw'ikiganiro, igihe ibiganiro bizamara ndetse n'intego y'ibiganiro.

Inshingano z'umuhuza

Inshingano z'umuhuza zishobora kuba nyinshi ariko iz'ingenzi ni izi zikurikira:

- Gusobanura insanganyamatsiko;
- Gutanga umurongo ngenderwaho;
- Gutanga umwanya w'amagambo kuri buri ruhande;
- Kwerekana ingufu n'imbaraga nke z'ibitekerezo bya buri ruhande;
- Gufasha mu kumvikanisha impande zombi;
- Kugeza impande zombi ku mwanzuro;
- Gufasha mu kubahiriza igihe.

Ibyo umuhuza agomba kuba yujuje:

Umuhuza agomba kuba ari:

- Inararibonye
- Umuhanga mu byo baganiraho
- Azwiho kwihangana
- Kuba ashobora kuvuga rikumvikana
- Kuba azwiho kutabogama
- Kuba afite igitsure.

d) Indorerenzi: Ni abantu bose baba bateze amatwi banyirakuraho ijisho impaka zirimo kuba. Abo uretse kumva no kutivanga mu biganiro, nta zindi nshingano baba bafite. icyakora bemerewe kugaragaza amarangamutima batagize uruhande babangamira cyangwa bakabaza ibibazo aho batasobanukiwe.

e) Abakemurampaka: Ni ababa bashinzwe kugaragaza uruhande rwatsinze n'uruhande rwatsinzwe. Iyo ari mu myitozo ibera mu mashuri batanga amanota bakurikije imyitwarire ya buri ruhande. Umwarimu ashobora kuba umukemurampaka mu gihe impaka zabereye ku kigo cy'amashuri cyangwa mu ishuri.

Uko ibitekerezo bitangwa

Buri ruhande rugerageza gutanga ingingo no kuzisobanura hifashishijwe ingero zumvikana neza.

Dore aho wavana zimwe muri zo:

1. Amagambo n'ibitekerezo byatanze n'abahanga bazwi ndetse n'abantu bakomeye byerekeranye n'iyo nsanganyamatsiko.
2. Ubumenyi bwigwa mu mashuri n'ahandi
3. Ubunararibonye bwa buri muntu...

Umwitozo w'ubumenyi ngiro:

Mumaze kwiremamo amatsinda no kureba abagira uruhare bose mu migendekere y'ibiganiro mpaka, nimuge impaka ku nsanganyamatsiko ikurikira: “Urubyiruko rugize uruhare mu kurwanya no kwirinda SIDA, yacika burundu.” Uyu mwitozo mushobora no kuwukorera hanze y'ishuri, mu gihe musubiramo amasomo yanyu.

3.2. Kwandika inyandiko zo mu buyobozi

3.2.1. Imyandikire y'amabaruwa yo mu buyobozi

✓ Inshoza y'ibaruwa

Amabaruwa agira amoko atandukanye bitewe n'uburyo yanditse, uwayanditse cyangwa se uwo yandikiwe. Mu Kinyarwanda habaho ibaruwa ya gicuti ndetse n'ibaruwa y'ubuyobozi. Ibaruwa ya gicuti, uyandika nta mabwiriza runaka aba agomba kubahiriza, mu gihe ibaruwa y'ubuyobozi yo igira amabwiriza n'amategako agomba kubahirizwa.

✓ Amoko y'amabaruwa y'ubuyobozi

Ibaruwa y'ubuyobozi ni ibaruwa ngufi kandi ivuga ibya ngombwa birasa ku ntego, ikirinda uburondogozi no kugaragaza amarangamutima. Igituma iba ngufi ni uko uwandika agomba gusa kwibanda ku mpamvu yatumye yandika.

Amoko y'amabaruwa y'ubuyobozi:

Bene iyi baruwa y'ubuyobozi iba igamije **gusaba akazi**, **gusubiza** uwasabye akazi cyangwa ikindi, **gusaba ibisobanuro** mu kazi, **gutanga ibisobanuro**, **gutanga amabwiriza** n'ibindi.

✓ Imyandikire y'ibaruwa y'ubuyobozi

- Tuvuge niba uwandika asaba akazi, iyo ni yo mpamvu agaragaza ku rupapuro kandi ni yo avugaho muri make agaragaza akazi ashaka ako ari ko, ubushobozi afite bwo kugakora n'uburyo azagakora, kandi byose bikagirwa mu kinyabupfura.
- Nta gutandukira ngo agaragaze ko yababaye, ko ubukene bumumereye nabi, ko aya rimwe mu cyumweru, ko yari afite akazi bakakamwirukanaho ku maherere n'ibindi. Uwo wandikira usaba akazi ntakeneye ko umurondogoraho cyangwa ko umutera imbabazi. Ibyo nta mwanya abifitiye, icyo akeneye ni icyo ugamije kumukorera, ubushobozi ugifitemo, ibyangombwa bibigaragaza.
- Bene iyi baruwa yandikwa ku rupapuro rw'umweru rutariho imirongo bita "A4", rukandikwaho ruhagaze, uwandika agahera ibumoso agana iburyo.
- Hari amagambo yabugenewe agomba gutangira no gusozza ibaruwa y'ubuyobozi.
 - Bwana Muyobozi,
 - Nyakubahwa Minisitiri...

– Mu ibaruwa y'ubuyobozi ntawusuhuza cyangwa ngo asehere. Hari amagambo yabugenewe asozza ibaruwa y'ubuyobozi:

- Mu gihe ngitegereje igisubizo cyanyu kiza, Nyakubahwa, mbaye mbashimiye.
 - Mu gihe ntegerezanyije ikizere, mbaye mbashimiye/
 - Mbaye mbashimiye Nyakubahwa/ Bwana / Madamu/ Madamazera...
- Buri gika gitangirira mu cya kabiri cy'urupapuro mu mpagarike yarwo.

– Ibaruwa y’ubuyobozi igomba kugira impamvu yayo yihariye bitewe n’igitumye uyandika yandika.

Inama zigirwa uwandika ibaruwa y’ubuyobozi

Ibaruwa y’ubuyobozi ni ibaruwa yandikanwa ubwitonzi kuko uburyo yanditse bihesha agaciro nyiri ukuyandika bityo n’ibyifuzo bye bikaba byakoroha kubahirizwa cyangwa bikagorana kubifataho ikemezo kubera uko iyo baruwa iteye.

Dore ibigomba kwitonderwa:

1. Uwandika agomba kubahiriza imbata y’ibaruwa y’ubuyobozi. Ibice byose ni ngombwa ko bibonekamo. Iyo uwandika agiye kwandika ibaruwa y’ubuyobozi agomba kumenya uwo yandikira, bitewe n’impamvu agiye kwandika.
2. Uwandika agomba kugira ikinyabupfura, akubaha uwo yandikira. Uwandika agomba koroshya amagambo, agasobanura ibyo yandika mu kinyabupfura.
3. Uwandika agomba kwirinda kurondogora, akandika ibiri ngombwa gusa, arasa ku ntego.
4. Uwandika agomba kwirinda gusiribanga, akandika ibaruwa ifite isuku.
5. Mu ntangiriro y’ibaruwa, shyiramo ikiguteye kwandika. Tangira ugira uti: «Nejewe no kubandikira iyi baruwa ngira ngo ...». Mu gihimba k’ibaruwa, sobanura neza impamvu wanditse, n’igituma wumva ibyemezo byafatwa byahuza n’ibyifuzo byawe. Niba hari impapuro zarushaho kumvikanisha igitekerezo cyawe uzivuge, kandi buri rupapuro wavuze mu ibaruwa uze kurushyira ku mugereka w’ibaruwa. Mu musozo w’ibaruwa, shimira uwo wandikiye.
- 6. Iyo ibaruwa ishyizwe mu ibahasha,** inyuma ushyiraho izina ry’icyubahiro n’inshingano by’uwo wandikiye. Ntabwo ushyiraho izina rye bwite.

Urugero rw’ibaruwa y’ubutegets (ubuyobozi):

UMUTONIWASE Nadine
Ishuri rya Byimana
Umurenge wa Byimana
Akarere ka Ruhango

Ruhango, ku wa 05 Mutarama 2022

Bwana Umuyobozi w’Akarere ka Nyanza

Binyujijwe:

Bwana Umuyobozi w'Urwunge
rw Amashuri rwa Nyanza

Impamvu: Gusaba guhindurirwa ikigo

Bwana Muyobozi w'Akarere,

Nejejwe no kubandikira ngira ngo mbasabe guhindurirwa ikigo, nkava ku Rwunge rw'Amashuri rwa Byimana nkajya ku Rwunge rw'Amashuri rwa Nyanza.

Mu by'ukuri, Bwana Muyobozi, muri ino minsi iwacu bimukiye i Nyanza, nkaba ngumye mu Byimana ntabona aho niga ntaha. Nigaga mu mwaka wa Kabiri w'amashuri yisumbuye kandi ibizamini by'igihembwe cya mbere nabikoze neza. Ku mugereka w'iyi baruwa murahasanga kopi y'urupapuro rw'amanota hamwe n'ikemezo cy'ubuyobozi bw'ishuri nigagaho.

Mu gihe ntegereje igisubizo cyanyu kiza, Bwana Muyobozi, mbaye mbashimiye uburyo mwakiriye ikifuzo cyange.

UMUTONIWASE Nadine



Bimenyeshejwe:

- Madamu Umuyobozi Ushinzwe Uburezi mu Karere ka Nyanza
- Bwana Umuyobozi Ushinzwe Uburezi mu Murenge wa Busasamana
- Bwana Umuyobozi w'Urwunge rw'Amashuri rwa Byimana

Umwitozo ku ibaruwa y'ubuyobozi

Ugendeye ku miterere y'ibaruwa y'ubuyobozi, andikira umuyobozi w'agashami ubarizwamo ibaruwa umusaba uruhushya rwo kujya iwanyu kubera impamvu runaka zumvikana.

3.2.2. Imyandikire y'umwirondoro

- ✓ Inshoza y'umwirondoro

Mu buzima busanzwe ari na byo bimenyerewe cyane, umwirondoro ukunze gusabwa n’umuntu wese ushaka gutanga akazi. Bityo mu byangombwa yaka ushaka nk’inyandiko yereka umukoresha ishusho y’umukozi akeneye. Nta wakwirengagiza ko umwirondoro ushobora kuba ngombwa iyo umuntu asaba ishuri runaka ngo akomerezemo amasomo ye.

✓ **Imbata y’umwirondoro**

- | | |
|---|------------------|
| – Umutwe | – Ubundi bumenyi |
| – Ibiranga umuntu | – Indimi avuga |
| – Amashuri | – Ibyo akunda |
| – Uburambe | – Abantu bamuzi |
| – Kwemeza ko ari ukuri no gushyiraho umukono we (Indahiro). | |

1. Umutwe

Umutwe w’umwirondoro wandikwa hejuru ukitwa umwirondoro

2. Ibiranga umuntu

Irangamimerere ni igice gitangira umwirondoro, kikaba kigamije kugaragaza muri make uwo ari we. Kigomba kuba cyumvikana kandi kirasa ku ntego. Si ngombwaM gushyiramo ibintu byinshi nubwo bwose waba ubona umwirondoro ari muto.

Mu irangamimerere umuntu avugamo amazina ye. Ni byiza kwandika izina ry’umuryango mu nyuguti nkuru z’icyapa maze iry’idini rikajya mu nyuguti nto.

Nyuma y’amazina hagaragazwa aho umuntu aherereye, ni ukuvuga aho atuye (aha iyo afite agasanduku k’iposita ni byiza kugashyiraho). Aho umuntu atuye hiyongeraho n’uburyo uwamushaka yamubonamo; umurongo wa terefoni na aderesi ya interineti ku buryo uwabishaka yahita amwandikira.

Ikindi kigomba kujya mu irangamimerere ni imyaka umuntu afite. Aha ariko ntawandika umubare ibyiza ni ugushyiraho umwaka yavukiye. Iyo yanditse amatariki, ukwezi akwandika mu izina ryako.

3. Amashuri

Iki gice kigaragaza aho nyiri umwirondoro ahagaze mu rwego rw'ubumenyi ni yo mpamvu uwandika agomba guhera ku mpamyabumenyi nini afite. Mu kwandika umwirondoro, amashuri ntatandukana n'impamyabumenyi, umuntu yandika impamyabumenyi afite bikaba bihwanye no kwandika amashuri yize. Ugaragaza amashuri yize avuga umwaka, aho yigaga, ibyo yigaga n'impamyabumenyi yahakuye.

Hari igihe amashuri ajyana n'ibitabo umuntu aba yaranditse. icyo gihe si ngombwa kubishyiraho keretse iyo bigira icyo byongerera ku kizere umuntu ashobora kugirirwa n'abo ashyikiriza umwirondoro.

4. Uburambe

Uburambe mu kazi ni igice cyo kwitonderwa. Aha ni ho uwandika umwirondoro aba agomba kwereka uwo yandikiye icyo azi gukora n'igihe amaze agikora.

Iyo yakoze mu myanya myinshi, ayishyiraho ahereye ku wa nyuma aherukaho agenda agaragaza igihe yagiye ayimaraho. Hari igihe umuntu aba yarakoze iyimenyerezamwuga ni ngombwa ko abishyiraho cyanecyane iyo ataramara igihe kinini akora cyangwa se ari bwo bwa mbere yatse akazi. Ibyo bishobora kumwongerera amahirwe imbere y'uwo aha umwirondoro.

5. Ubundi bumenyi

Kumenya ibintu byinshi nta cyo bitwaye kuko ibyo umuntu azi byose bishobora kumugirira akamaro mu buzima bwe bwa buri muni. Iyo rero umuntu azi ubundi bumenyi ntashidikanya kubigaragaza ku mwirondoro we cyanecyane iyo bifitanye isano n'akazi asaba.

Urugero: Kuba azi mudasobwa, kuba afite uruhushya rwo gutwara ikinyabiziga...

6. Indimi

Hari igihe umwanya umuntu ashaka uba usaba kumenya indimi z'amahanga. Ni ngombwa rero ko uwandika umwirondoro ashyiramo indimi zose azi. Mu kazi ako ari ko kose kumenya indimi z'amahanga byongerera amahirwe ugasaba. Ukora umwirondoro agaragaza urwego aziho urwo

rurimi atabeshya (nduzi neza cyane, nduzi neza, nduzi bihagije, biciriritse) kuko kubeshya byamugiraho ingaruka mu gihe k'ikizamini k'ibiganiro.

7. Ibyo ukunda

Umuntu ntabaho akora akazi ashinzwe gusa. Na nyuma y'akazi ubuzima burakomeza. Ibyo umuntu akunda rero biza nyuma y'akazi. Bigizwe n'ibyo umuntu akora kandi bimushimisha.

Ariko na none ukora umwirondoro ntiyiyibagize ko ibimushimisha bishobora kumubera imbogamizi yo kutabona umwanya yifuza.

Nk'urugero niba ari umuntu ukunda kumva indirimbo kuri radiyo, bikaba byerekana ko ari umuntu ukunze kuba ari wenyine ko kubana n'abandi byamugora, mu gihe umuntu ukunda gukina umupira aba agaragaza ko abana n'abandi neza ko no mu kazi byagenda bityo.

8. Abantu bamuzi cyangwa abahamya

Iyi ngingo y'abantu bazi nyiri umwirondoro si ngombwa buri gihe. Ariko hari ababisaba mu mwirondoro bikaba ngombwa ko ijyamo. Abantu bakunze gukenerwa si abaturanyi bawe bakomeye cyangwa se bene wanyu bakomeye.

Abazi umuntu baba bakenewe ni abarimu bamwigishije cyangwa abakoresha bamukoresheje kuko ukeneye umwirondoro wawe aba ashobora kubabaza ku bijyanye n'ubumenyi ufite cyangwa se ubushobozi n'imyitwarire byawe mu kazi.

9. Kwemeza ko ibyo uvuze ari ukuri no gushyiraho umukono

Iki ni cyo gice gisoza umwirondoro. Nyiri ukuwandika agomba gusoza yemeza ko amakuru yatanze ari ukuri ko anashobora kugenzurwa. Hanyuma agashyiraho itariki n'umukono we.

Ibi ni byo by'ingenzi biba bikubiye mu mwirondoro. Cyakora ntibibujijwe ko hari andi makuru yakongeramo igihe abona ko hari amahirwe yamwongerera kugira ngo abone akazi yasabaga.

✓ Imyandikire y'umwirondoro

Hagendewe ku mbata y'umwirondoro imaze kugaragazwa, dore urugero rw'umwirondoro:

UMWIRONDO

1. Ibiranga umuntu

Amazina: MUTABAZI Gaspard

Data: KATABARWA Jean

Mama: KANKINDI Marie

Igihe navukiye: 2 Nzeri 1974

Aho navukiye:

Intara: Amajyaruguru

Akarere: Kagano

Umurenge: Mataba

Akagari: Gaseke

Aho ntuye:

Intara: Amajyaruguru

Akarere: Kagano

Umurenge: Mataba

Akagari: Gaseke

Irangamimerere: Ndubitse, mfite abana bane

Aho mbarizwa:

Akarere ka Kagano

Agasanduku k'iposita 70 Kagano

Tel: 0788.....

E-mail: mutabazi-gaspard@yahoo.fr

2. Amashuri nize:

2003-2007: Amashuri makuru: Kaminuza nkuru y' u Rwanda : Impamyabushobozi y'ikiciro cya kabiri mu Ndimi n'Ubuvinganzu Nyafurika

1989-1994: Amashuri yisumbuye muri Seminari ya Runaba: Impamyabumenyi y'amashuri yisumbuye mu ishamba ry'Ikiratini n'indimi zivugwa

1981-1988: Amashuri abanza mu Ishuri Ribanza rya Mataba: Ikemezo cy'uko narangije Amashuri Abanza.

3. Uburambe mu kazi

2000-2003: Umwarimu w'Igifaransa n'Ikinyarwanda mu ishuri ryisumbuye rya Gakurazo.
 2003-2004: Umwarimu w'Igifaransa n'Ikinyarwanda mu ishuri ryigenga APEDER Mataba.
 2008-2010: Umwarimu w' Igiswayiri n'Ikinyarwanda mu Iseminari Nto ya Runaba.
 2011-2017: Umwarimu w'indimi muri kaminuza y'u Rwanda ishami rya Huye.

4. Ubundi bumenyi

Nzi mudasobwa porogaramu ya “Word, Excel, Power Point, Access na Publisher”

Nzi gutwara imodoka, Ikiciro cya B.

5. Indimi mvuga

Ururimi	Kumva	Kuvuga	Kwandika	Gusoma
Ikinyarwanda	Neza cyane	Neza cyane	Neza cyane	Neza cyane
Icyongereza	Neza cyane	Neza cyane	Neza cyane	Neza cyane
Igifaransa	Neza	Neza	Neza	Neza
Igiswayire	Neza	Buhoro	Neza	Neza

6. Ibyo nkunda

Nyuma y'akazi: Nkunda gusoma ibitabo, koga no gukina umupira.

7. Abantu banzi:

- UMUHIRE Jean: Umwarimu wange muri Kaminuza y'u Rwanda, Tel: 0788...
- Padiri KARAKE Samuel: Umukoresha wange igihe nigishaga mu i Seminari Nto ya Runaba, Tel: 0755...
- HAKIZIMANA Paul: Umuyobozi w'Ishami ry'Indimi muri Kaminuza y'u Rwanda aho nigisha ubu, Tel: 0789...

Ngewe **MUTABAZI Gaspard** ndemeza neza ko ibyo maze kuvuga ari ukuri kandi ko bishobora kugenzurwa.

Bikorewe i Kagano, ku wa 25 Nyakanga 2021

MUTABAZI Gaspard



Umwitozo:

Andika umwirondoro wawe ukurikije ingingo ziri hejuru aha ufitiye amakuru.

3.2.3. Inyandiko ntekerezo

✓ Igisobanuro k'inyandiko ntekerezo

Inyandiko cyangwa umwandiko ntekerezo ni umwandiko muhimbano akenshi uvuga ibintu bisanzwe mu buzima. Uwandika umwandiko ntekerezo ahera ku byo abona, ku byo yumva cyangwa atekereza ko byabaho akabyandika ku buryo uzabisoma agira icyo yiyunguraho mu bumenyi. Umwandiko ntekerezo bawita nanone “**umwandiko usanzwe**”. Witwa umwandiko usanzwe mu rwego rwo kuwutandukanya n'indi myandiko y'ubuvanganzo nk'inkuru, ibitekerezo, imivugo n'iyindi. Imyandiko ntekerezo isa nk'imenyeshya amakuru y'ibiriho maze usoma akaba yabifata nk'ukuri cyangwa akabihakana.

– **Ihimbamwandiko ni iki?** Ni uburyo bwo guhanga inyandiko bugamije guhanura, gutanga inama n'ibitekerezo bwite, gushyigikira cyangwa kunenga ikintu runaka cyangwa kwigisha.

– **Uhimba umwandiko agomba kwita kuki kugira ngo agire umwandiko mwiza?** Agomba kwita: ku mbata y'umwandiko no ku mabwiriza agenga ihangamwandiko.

Imbata y'umwandiko ntekerezo

Umwandiko ntekerezo uba ugizwe n'ibice bine by'ingenzi: umutwe, intangiriro, igihimba n'umusozo.

Umutwe

Ni interuro ngufi iba ihina insanganyamatsiko yatanze. Igomba kuba ifitanye isano n'ibivugwa mu mwandiko.

Intangiriro cyangwa interuro

Ni cyo gice kibanza cy'umwandiko kiba ari integuza y'ibivugwa. Iba ari nto kandi ntiba itangwamo ingero. Itera amatsiko ku bigiye kuvugwa.

Igihimba cyangwa indamburangingo

Ni igice cy'umwandiko kiba kibumbatiye ubutumwa bw'umwandiko muri rusange. Iki gice ni cyo uwandika aramburamo buri ngingo akurikije insanganyamatsiko yagennye. Biba byiza iyo uhanga agenda yumvikanisha ukuri yifashishije ingingo rusange n'izizungirije, buri ngingo igenda ifata igika cyayo. Ibika bikwiye gukurikirana ku buryo bw'inyurabwenge.

Umwanzuro cyangwa umusozo

Aha uhimba avuga mu nshamake ku ngingo rusange atanga umuti n'inama kugira ngo abazasoma umwandiko we bazagire ingingo bagenderamo.

✓ **Imitegurire y'inyandiko ntekerezo**

Kumva insanganyamatsiko

Aha umwanditsi atekereza ku nsanganyamatsiko kandi akagerageza kuyisobanukirwa neza mbere yo kugira icyo yandika.

Gukusanya ibitekerezo

Aha umwanditsi, agerageza kwandika ku rupapuro ibitekerezo byose bimujemo ku ngingo nkuru ari buvugeho atitaye ku buryo byagombye gutondekwamo.

Kujora no gutondeka ibitekerezo

Aha ni ho umwanditsi w'umwandiko ntekerezo ashyira ibitekerezo byakusanyije ku murongo areba ikibanza, ibikurikiraho n'igisoza kandi akanavanamo ibyo abona bitari ingenzi cyangwa akanongeramo ibyo yaba yari yibagiwe. Mu gutondeka ibitekerezo, ni ngombwa guhera ku bifite uburemere kurusha ibindi bikaba ari byo bibanza.

Imyandikire y'inyandiko ntekerezo

Iki gice kijyana no kwandukura ibyo wanditse ku rupapuro mu buryo bufite isuku wita no ku mategeko y'imyandikire n'igenabika. Ariko nanone, inyandiko wanditse bwa mbere iba

igomba kongera gusomwa no kujorwa hakosorwa amakosa yaba yagiyemo ubwo wandikaga wihuta.

Uwiyemeje guhanga umwandiko azenzura ko hubahirijwe ibi:

- Isuku n'imigaragarire myiza y'umwandiko (kudasiribanga no kuba umukono usomeka neza),
- Kugaragaza umutwe w'umwandiko,
- Kureka umwanya iburyo n'ibumoso bw'urupapuro,
- Imbata y'umwandiko igomba kuba yigaragaza ukurikije umwandiko: mbese byigaragaza ko ari umutwe, interuro, indamburangingo n'umusozo.
- Imyandikire yemewe y'Ikinyarwanda igomba kubahirizwa: hitabwa ku mategeko y'imyandikire yemewe y'Ikinyarwanda.
- Inozamvugo/ikeshamvugo: mu ihangamwandiko amagambo ntahinwa.

Urugero: kdi/kandi, cg/cyangwa; Kgli/Kigali, ...

- Mu ihangamwandiko kandi imibare n'inyuguti ntibivangwa usibye imibare ivuga itariki n'umwaka.
- Ntihagomba kurangwamo interuro nyobyamvugo nk'interuro zubatse nabi n'ibindi.

Urugero: Ndavuze ati: "Tugende vuba, tuve aha!" bavuga: Ndavuze nti: "Tugende vuba, tuve aha!"

- Uwandika agomba kubahiriza indeshyamba y'umwandiko yasabwe gukora: yita ku mubare w'amagambo cyangwa w'imirongo yasabwe kubahiriza.

3.3. Kumurika imiteguro itandukanye

3.3.1. Inshoza y'imurika

✓ Igisobanuro

Ni igikorwa cyo kuvugira mu ruhame usobanura ibyo akenshi uba wateguye ubikuye mu mutwe cyangwa wakoze ubushakashatsi. Mu imurika, umuntu ahabwa umwanya agasobanura ibyo yateguye yarangiza agaha umwanya abamuteze amatwi ngo bamubaze ibibazo cyangwa bagire icyo bongera ku byo yasobanuye.

✓ Umumaro wo kumurika

Kumurika ni umurimo ufasha gusobanura neza ibyo umuntu aba yateguye ngo byumvikane kurusha uko byakumvikana bisomwe n'utarabiteguye.

3.3.2. Ubugeni bw'imurika

✓ **Imitegurire**

- Gukusanya ibitekerezo bihagije ku nsanganyamatsiko wahawe
- Gutegura inyandiko y'icyo uzavuga
- Kunonosora inyandiko
- Kwimenyereza icyo uvuga mu ruhamye (kora imyitozo, kora imyitozo... bikore kenshi gashoboka)
- Kwifata amajwi n'amashusho (niba ufite ibikoresho)

✓ **Umwifato**

- Kumenya abo ubwira
- Kumenya icyo uvuga (ubutumwa ushaka gutanga)
- Kumenya aho uvugira
- Kwita ku bimenyetso ukoresha
- Kwibuka kureba abo ubwira
- Kuzirikana imyitwarire y'abantu ubwira
- Kwita cyane ku cyo uvugaho kuruta uko ukivuga
- Kwita k'uko ugaragara inyuma
- Kutumva ko uri umwere kuba umwere (kutumva ko nta kosa wakora)
- Kugenzura ibikoresho nkenerwa mbere yo kubikoresha

✓ **Imivugire**

- Kuvuga witonze
- Gukoresha ururimi neza
- Gukoresha ijwi rijyanye n'ingano y'abo ubwira n'aho uvugira (ntuvuge buhoro cyane cyangwa ngo usakuze cyane bitari ngombwa)

3.3.3. Umwihariko w'imurika ku mbwirwaruhame n'umwirondoro

✓ Imbwirwaruhame

Kubera ko imbwirwaruhame ari ikiganiro kiba cyateguwe mbere kugira ngo kizamurikwe imbere y'imbaga y'abayikurikiye imbonankubone (mu ruhame), umurika imbwirwaruhame agomba kuba yayiteguye neza kandi akayisubiramo agezura ko nta makosa ayirimo. Mu gihe cyo kuyimurika, ni ngombwa kwifashisha inyandiko yateguwe neza ariko ukirinda kuba imbata y'urupapuro, ahubwo ukajya unyuzamo ugatanga ingero zitanditse ariko watekerejeho mbere. Si byiza kurambira abakurikiye imbwirwaruhame yawe (bitewe n'igihe yari iteganyirijwe).

✓ Umwirondoro

Umwirondoro nk'inyandiko ikunda gukenerwa nyirayo akeneye akazi, ni ngomwa ko itegurwa neza mbere yo kuyimurika mu ruhame, cyanecyane uyitegura yibanda ku gice cy'uburambe n'ubundi bumenyi afite agerageza kubihuza n'ibyo ukeneye umukozi yifuza (bigaragara mu itangazo ry'akazi) kandi akayisubiramo kugira ngo bize kumworohera gukurikiranya ibice biwugize kandi ntaho abirebera. Mu gihe cyo kuvuga umwirondoro we (imbere y'itsinda ritanga amanota), agomba kwita ku mirimbire, kunoza imivugire no kutarambira abamuteze amatwi (bitewe n'igihe yahawe). Ni ngombwa kandi kwitegura gusubiza neza ibibazo byerekeranye n'umwirondoro wawe nyuma yo kuwumurika.

Ibitabo byifashishishijwe:

1. RWANDA, R. Y. U., & REPUBULIKA, P. Y. (1999). Ubumwe bw'abanyarwanda: mbere y'abazungu n'igihe cy'ubukoloni, mu gihe cya repubulika ya mbere.
2. Ntibanyurwa, S. (2024). Umumaro w'Ibisigo by'Ubuse: Indyoheshabirayi ya Myr Alexis Kagame. *Journal of Indigenous Languages*, 2(1), 21-33.
3. MBONIMANA, G. (1986). ISOKO Y'UBUSIZI NYABAMI: UBUSIZI BWA RUBANDA MU RWANDA. *Etudes d'ethnolinguistique et de littérature orale rwandaise*, 8, 121.
4. Nkejabahizi, J. C. (2013). Ubuvanganzo nyarwanda. *Inkuru ndende n'ikinamico*.
5. Mbonimana, G., & Nkejabahizi, J. C. (2011). *Amateka y'ubuvanganzo Nyarwanda: kuva mu kinyejana cya XVII kugeza magingo aya*. Éditions de l'Université nationale du Rwanda.

6. Nkejabahizi, J. C. (2013). *Ubuvanganzo nyarwanda: inkuru ndende n'ikinamico*. Editions de l'Université nationale du Rwanda.
7. MBONIMANA, G. (1986). ISOKO Y'UBUSIZI NYABAMI: UBUSIZI BWA RUBANDA MU RWANDA. *Etudes d'ethnolinguistique et de littérature orale rwandaise*, 8, 121.
8. Mukama, E., & Nkusi, L. (2019). *Ubushakashatsi mu Bumenyi Nyamuntu n'Imibanire y'Abantu* (p. 180). African Minds.
9. Bizimana, S. (1985). *Igenamugambi ry'Ikibonezamvugo cy'Ikinyarwanda*.
10. Gallagher, J. C., & Wodlinger Jackson, A. M. (2010). How to write curriculum vitae? *American Journal of Health-System Pharmacy*, 67(6), 446-447.
11. Telg, R., & Perry, L. (2011). Speech Writing and Types of Speeches 1. *the University of Florida (Issue August)*.